

# **Tuhan Yesus pung Carita Bae, iko Lukas**

*Kanapa ko Lukas tulis ini carita*

<sup>1-3</sup> Bapa Teofilus\* yang terhormat.

Salamat.

Banya orang su coba tulis carita so'al hal-hal yang su jadi di botong pung teng-tenga. Dong tulis itu carita dong, pake carita-carita yang bataputar dari botong pi botong dari dolu, yang botong dapa tau dari Tuhan Yesus pung orang dalam dong, deng dari orang laen ju yang lia deng mata kapala sandiri. Samua carita tu, iko parsís-parsís ke Tuhan Allah pung janji memang dari dolu.

Jadi beta su pareksa sampe alus-alus itu hal dong samua, mulai dari dia pung akar carita. Ais beta putus ko tulis ame itu samua deng bae-bae, iko dia pung urutan. Deng bagitu, pak bisa tau parsís apa yang su jadi.

<sup>4</sup> Deng pak ju bisa parcaya bilang, apa yang orang dong su carita kasi tu, bukan carita putarbalek. Samua tu, batúl-batúl ada!

*Tuhan pung ana bua dari sorga kasi tau  
memang Yohanis Tukang Sarani pung jadi*

---

\* **1:1-3:** Nama *Teofilus* dalam bahasa Yunani pung arti bilang, ‘orang yang sayang sang Tuhan’. Ini Lukas pung buku partama yang dia tulis kasi sang Teofilus. Yang kadua tu, andia *Utusan dong pung Carita*.

**5** Ini carita pung akar bagini: waktu raja Herodes pegang parenta di propinsi Yudea, ada satu orang, nama Sakaria. Dia tu, satu kapala agama Yahudi. Deng dia ju anggota dari ba'i Abia pung kalompok kapala agama dong. Sakaria pung bini, nama Elisabet. Dia ju dari turunan kapala agama dong, te dia tu, ba'i Musa pung kaka Harun pung turunan.<sup>◊</sup>

**6** Dong dua idop lurus iko Tuhan Allah pung parenta deng atoran samua. Orang ju hormat sang dong.

**7** Dong dua ju su tua, ma sonde ada pung ana, te Elisabet pung tampa ana tu, ada tatutu.

**8** Satu kali, Sakaria deng dia pung kalompok Abia dong dapa roster karjá di Ruma Sambayang Pusat di kota Yerusalem.

**9** Iko dong pung biasa, itu kapala agama dong hela lot, ko mau tau sapa yang dapa tugas maso pi itu Ruma Sambayang Pusat pung Kamar Paling Barisi. Di situ, itu orang musti bakar kayu wangi di Tuhan Allah pung muka. Itu hari, lot jato kaná di Sakaria.

**10** Ais ju dia maso pi. Waktu dia ada bakar kayu wangi dalam itu Kamar, orang bam-banya dong ada sambayang di kintal situ.

**11** Takuju sa, ju Tuhan Allah pung ana bua satu dari sorga, datang badiri di tampa bakar kayu wangi pung sablá kanan.

**12** Lia bagitu, ju Sakaria taku mau mati, sampe sonde tau mau bekin apa.

---

<sup>◊</sup> **1:5:** 1 Sajara Isra'el deng Yahuda 24:10; Kaluar dari Masir 7:7

**13** Ma itu ana bua dari sorga omong bilang, "Sakaria! Jang taku, é! Te Tuhan Allah su dengar lu pung sambayang. Jadi lu pung bini nanti barana satu ana laki-laki kasi sang lu. Lu musti kasi nama sang dia, Yohanis.

**14** Nanti banya orang ju iko sanáng sama-sama deng bosong, tagal bosong su dapa ana. Ini ana nanti bekin lu pung hati babunga.

**15** Tuhan pung Roh yang Barisi pung kuasa ada sama-sama deng dia, mulai dari dia pung mama masih dudu parú. Dia musti pamali minum samua minuman karás. Waktu dia su besar datang, Tuhan Allah pake sang dia jadi orang pantíng.<sup>◊</sup>

**16** Nanti dia buju banya orang Isra'el ko bale iko sang Tuhan Allah, yang ada hak parenta sang dong.

**17** Dia pung sifat deng kuasa nanti parsís ke ba'i Elia, andia Tuhan pung jubir dari dolu. Dia datang lebe dolo dari kotong pung Bos. Dia bekin orang tua pung hati bale sayang sang dong pung ana-ana. Deng orang yang bale balakang sang Tuhan dia oba ju, ko dong bale iko sang Tuhan pung mau. Deng bagitu, dia bekin orang dong sadia dong pung hati ko tarima Bos pung datang."<sup>◊</sup>

**18** Ma Sakaria bale tanya itu ana bua bilang, "Mana bisa?! Beta deng beta pung bini su tua bagini! Karmana ko beta bisa tau ini hal samua bisa jadi?"

**19** Ais, itu ana bua manyao bilang, "Bagini!

<sup>◊</sup> **1:15:** Daftar Sensus 6:3    <sup>◊</sup> **1:17:** Maleaki 4:5-6

Beta ni, Gabriel, Tuhan Allah pung tukang surusuru. Dia sandiri yang suru beta datang ko kasi tau ini kabar bae sang lu.<sup>◇</sup>

**20** Ma lu sonde mau parcaya beta pung omong. Jadi dia pung tanda yang lu minta bagini! Lu pung lida takancing, deng lu sonde bisa omong apa-apa mulai sakarang, sampe deng bosong barana ame itu ana. Nanti lu lia sandiri sa. Te apa yang beta bilang ni nanti jadi, pas deng dia pung waktu.”

**21** Orang banya yang ada sambayang di luar, su tabingung-bingung, tagal Sakaria sonde tau kaluar-kaluar.

**22** Waktu dia kaluar datang, dia su sonde bisa omong apa-apa lai. Ais dia kasi sein sang dong pake tangan, ju dong mangarti bilang, Tuhan su kasi tunju sang dia satu hal yang heran dalam itu Kamar Paling Barisi.

**23** Dong pung tugas abis, ju Sakaria pulang pi dia pung ruma.

**24-25** Sonde lama ju Elisabet dudu parú. Ju dia kurung diri dalam ruma sampe lima bulan. Dia omong bilang, “Puji Tuhan! Ahirnya Tuhan kasi tunju Dia pung hati bae sang beta. Kalo beta su dapa turunan, orang dong su sonde bekin malu sang beta lai.”

*Tuhan pung ana bua dari sorga datang katumu  
deng Maria*

**26** Waktu Elisabet pung parú su jalan anam bulan, ju Tuhan Allah kirim Dia pung ana bua

---

<sup>◇</sup> **1:19:** Daniel 8:16, 9:21

dari sorga, pi satu kampong di propinsi Galilea, nama Nasaret. Itu ana bua pung nama, Gabriel.

<sup>27</sup> Di Nasaret ada satu nona, nama Maria. Maria su batunangan deng satu laki-laki, nama Yusuf. Yusuf tu, raja Daud pung turunan. Naa, Gabriel pi katumu deng itu nona Maria.<sup>☆</sup>

<sup>28</sup> Dia kasi tunju dia pung diri sang itu nona, ju dia bilang, "Salamat, nona, ó! Tuhan Allah su pili ame sang lu, ko mau bekin satu hal bae kasi sang lu. Tuhan Allah ada sama-sama deng lu, Maria."

<sup>29</sup> Dengar bagitu, ju Maria bingung deng itu ana bua pung omong. Dia sonde mangarti dia pung maksud apa.

<sup>30</sup> Ju itu ana bua sambung lai bilang,  
"Maria! Lu sonde usa taku.

Te Tuhan Allah pung maksud kasi tunju Dia  
pung hati bae sang lu.

<sup>31</sup> Sonde lama lai, lu su dudu parú,  
ais nanti lu barana ame satu ana laki-laki.  
Lu musti kasi nama sang Dia, Yesus.<sup>†</sup>

<sup>32</sup> Dia nanti jadi Orang besar.  
Nanti Tuhan subu sang Dia bilang, 'Dia tu,  
Beta pung Ana sandiri.'  
Andia, Ana dari Tuhan Allah yang Paling  
Tinggi.

Nanti Tuhan Allah angka sang Dia ko pegang  
parenta,  
sama ke Dia pung nene-moyang raja Daud.

---

<sup>☆</sup> **1:27:** Mateos 1:18   <sup>†</sup> **1:31:** Dalam bahasa Ibrani, *Yeshua* pung arti bilang, 'Tuhan Allah kasi salamat orang'. 'Yeshua' tu, andia Yesus dalam bahasa Yunani. Lia ju Mateos 1:21.

**33** Dia yang nanti pegang parenta tarús-tarús sang orang Isra'el dong.<sup>‡</sup>

Te Dia pung parenta sonde tau abis-abis.”<sup>◊</sup>

**34** Ma Maria tanya sang Gabriel bilang, “Beta ni, sonde parná tidor bakumpul deng satu laki-laki ju! Karmana ko beta bisa dudu parú?”

**35** Ais Gabriel manyao bilang, “Bagini! Nanti Tuhan pung Roh yang Barisi datang sang lu. Deng Tuhan Allah yang Paling Tinggi pung kuasa nanti tutu ame sang lu. Deng bagitu, Ana yang nanti lu barana ame tu, batúl-batúl barisi. Te Dia tu, Tuhan Allah pung Ana.

**36** Jang heran! Te lu pung kelu satu, nama Elisabet, su dudu parú ju. Orang bilang dia su sonde bisa barana tagal dia su tua. Ma sakarang dia pung parú su jalan anam bulan.

**37** Te buat Tuhan Allah, samua bisa jadi!”<sup>◊</sup>

**38** Ais Maria manyao bilang, “Bae. Beta ni Tuhan Allah pung hamba. Biar ko samua jadi iko ke bapa pung omong tu. Beta sadia iko Tuhan pung mau sa.”

Ais ju itu ana bua dari sorga jalan kasi tengah sang dia.

### *Maria pi lia sang Elisabet*

**39-40** Lewat barapa hari, ju Maria buru-buru barangkati dari Nasaret pi Sakaria pung kampong di propinsi Yudea pung da'era bagunung.

---

<sup>‡</sup> **1:33:** Bahasa Yunani tulis bilang, ‘Dia parenta sang Yakob pung ruma’. Dia pung maksud bilang, ‘Dia parenta sang orang Isra'el dong’. <sup>◊</sup> **1:33:** 2 Samuel 7:12, 13, 16; Yesaya 9:7 <sup>◊</sup> **1:37:** Carita Mula-mula 18:14

Sampe di situ, dia maso memang di Sakaria pung ruma. Ju dia kasi salam sang Elisabet.

<sup>41</sup> Waktu Elisabet dapa dengar Maria pung salam tu, ju itu ana dalam Elisabet pung parú bakosi. Deng Tuhan pung Roh yang Barisi datang maso sang Elisabet.

<sup>42</sup> Ais dia pange kasi tau bilang, "Maria! Nanti orang dong angka nae lu pung nama lebe dari samua parampuan di ini dunya! Nanti orang dong ju angka nae itu Ana yang ada di dalam lu pung parú!"

<sup>43</sup> Beta ju iko ta'angka, tagal beta pung Bos pung mama datang katumu sang beta.

<sup>44</sup> Bagitu lu maso datang kasi salam sang beta, langsung beta pung ana dalam parú ju bakosi tagal sanáng.

<sup>45</sup> Tuhan Allah su kasi tunju Dia pung hati bae sang lu, tagal lu parcaya bilang, Dia mau bekin iko Dia pung janji."

### *Maria puji-puji sang Tuhan Allah*

<sup>46</sup> Maria angka suara bilang,  
"Dari beta pung hati yang paling dalam,  
beta angka nae tinggi-tinggi sang Tuhan!"

<sup>47</sup> Beta pung hati babunga,  
tagal Tuhan Allah kasi salamat sang beta!

<sup>48</sup> Dia su taro mata bae-bae sang beta,  
Dia pung orang suru-suru yang sonde ada  
pung arti ni.

Mulai sakarang samua orang nanti anggap beta  
ni,  
parampuan yang paling ontong, <sup>◊</sup>

---

<sup>◊</sup> **1:48:** 1 Samuel 1:11

- 49 tagal Tuhan bekin hal-hal heran kasi sang beta.  
 Dia tu, yang Paling Kuasa deng Paling Barisi.
- 50 Tuhan Allah salalu kasi tunju rasa kasian sang  
 semua orang yang hormat deng sémba  
 sang Dia,  
 dari turunan satu pi turunan laen.
- 51 Dia pake Dia pung kuasa,  
 ko bekin kaco sang orang yang kapala bésar  
 dong.
- 52 Dia kasi jato orang yang pegang kuasa dong,  
 tagal dong pung tinggi hati.  
 Ma Dia angka nae orang yang randá hati  
 dong.◊
- 53 Dia kasi makan orang lapar dong sampe  
 kinyang,  
 ma Dia usir buang orang kaya dong  
 ko pi deng tangan kosong.
- 54 Dia tolong Dia pung orang Isra'el dong,  
 deng salalu tunju Dia pung rasa kasian sang  
 dong.
- 55 Dolu Dia ika janji deng kotong pung nene-  
 moyang,  
 andia ba'i Abraham deng dia pung turunan  
 semua.  
 Sakarang itu janji ada ta'ika tarús-  
 tarús.”◊
- 56 Ais Maria tengah deng Elisabet sampe tiga  
 bulan. Ju dia pulang pi dia pung rumah di  
 Nasaret.

*Elisabet barana ame sang Yohanis*

---

◊ 1:52: Ayub 5:11, 12:19    ◊ 1:55: Carita Mula-mula 17:7; 1 Samuel 2:1-10

**57** Bagitu dia pung waktu su sampe, ju Elisabet barana ame satu ana laki-laki.

**58** Itu kabar tasiar pi dia pung kelu deng isi kampong dong bilang, Tuhan Allah su kasi tunju Dia pung hati bae deng kasi satu ana sang Elisabet. Ju dong samua iko sanáng.

**59** Waktu itu ana umur dalapan hari, ju dong sunat sang dia, iko orang Yahudi pung atoran. Dong mau kasi nama itu ana, Sakaria, iko dia pung bapa pung nama.<sup>◇</sup>

**60** Ma dia pung mama protes bilang, “Sonde bisa bagitu! Dia pung nama, musti Yohanis!”

**61** Ma dong balas bilang, “Kanapa pili nama Yohanis? Sonde ada satu orang ju di bosong pung kelu, yang ada pake itu nama!”

**62** Ju dong kasi sein sang Sakaria, ko mau cari tau dia mau kasi nama sapa sang itu ana.

**63** Sakaria sein ko minta batu tulis. Dong kasi, ais dia tulis bilang, “Dia pung nama Yohanis!” Ju samua orang taheran-heran.

**64** Takuju sa, ju Sakaria pung lida yang takancing tu, noe memang. Ju dia angka puji sang Tuhan Allah.

**65** Samua orang yang tengah deka-deka di situ dong, taku deng heran. Ju itu carita tasiar dari mulu pi mulu, sampe orang di gunung-gunung di propinsi Yudea dong ju tau abis.

**66** Orang dong yang dengar itu carita, pikir-pikir bilang, “Su jalás, Tuhan pung kuasa ada sama-sama deng itu ana. Nanti dia bésar datang, dia jadi manusia model ke apa, ó?”

---

<sup>◇</sup> **1:59:** Kapala Agama dong pung Atoran 12:3

*Sakaria puji-puji sang Tuhan Allah*

- 67 Ais ju Tuhan pung Roh yang Barisi datang maso di Sakaria. Andia ko dia omong bilang,
- 68 "Puji Tuhan, orang Isra'el pung Allah!  
 Te Dia su datang ko tabús ame Dia pung orang dong,  
 ko biar dong jang sama ke budak.
- 69 Tuhan su angka ame satu Orang yang Dia pung kuasa hebat,  
 ko nanti kasi salamat sang kotong.  
 Dia tu, dari raja Daud pung turunan.
- 70 Tuhan su janji memang ini samua dari dolu-dolu,  
 pake Dia pung jubir yang satia dong.
- 71 Sakarang Dia mau kasi lapás sang kotong  
 dari kotong pung musu-musu,  
 deng dari orang-orang yang saki hati sang kotong.
- 72-73 Dia kasi tunju Dia pung hati bae sang kotong  
 pung nene-moyang dong,  
 tagal Dia inga tarús Dia pung janji sang dong,  
 yang Dia ika deng ba'i Abraham.
- 74 Dia su kasi lapás sang kotong dari kotong pung  
 musu dong,  
 ko kotong bisa sémba sang Dia,  
 deng sonde parlú taku-taku lai.
- 75 Dia su kasi lapás sang kotong,  
 ko biar kotong bisa idop barisi deng lurus  
 tarús-tarús di Dia pung muka.
- 76 Anis! Lu ni, beta pung ana.  
 Orang nanti kanál sang lu bilang, lu ni,  
 Tuhan Allah yang Paling Tinggi pung jubir.  
 Lu nanti pi kasi tau orang dong,

ko dong buka tangan tarima Bos pung  
datang.<sup>◇</sup>

<sup>77</sup> Lu nanti pi kasi tunju jalan sang Tuhan pung  
orang dong,

ko dong dapa tau bilang, dong dapa salamat,  
tagal Tuhan hapus buang dong pung  
sala-sala dong.

<sup>78-79</sup> Tagal Tuhan pung hati noe deng kasian sang  
kotong,

andia ko Dia kasi kotong kasampatan baru,  
sama ke hari baru bawa taráng yang  
baru.

Kotong yang jalan dalam galáp,  
deng kotong yang taku mati,  
tagal balóm babae deng Tuhan,  
nanti dapa taráng ko antar sang kotong pi  
jalan dame.”<sup>◇</sup>

<sup>80</sup> Ais ju Yohanis tamba hari, tamba bésar.  
Deng Tuhan pung Roh bekin kuat sang dia. Dia  
bésar datang, ju dia pi tengah di tampa sunyi,  
sampe dia mulai angka dia pung karjá kasi orang  
Isra'el dong.

## 2

### *Maria barana sang Tuhan Yesus (Mateos 1:18-25)*

<sup>1-2</sup> Satu kali, waktu Kirenius jadi kapala da'era  
di Siria, ais raja bésar, nama Agustus, kasi  
kaluar parenta bilang, “Samua orang yang di  
bawa pamarenta Roma pung kuasa musti pulang

---

<sup>◇</sup> **1:76:** Maleaki 3:1    <sup>◇</sup> **1:78-79:** Yesaya 9:2

kampong ko iko sensus!" Itu kali partama ko pamarenta Roma itong dia pung rakyat bagitu.

<sup>3</sup> Jadi samua orang pulang kampong ko iko sensus.

<sup>4-5</sup> Naa, itu waktu, Yusuf tengah di kampong Nasaret di propinsi Galilea. Dia su batunangan deng satu nona, nama Maria, yang ada dudu parú. Yusuf tu, raja Daud pung turunan, jadi dia musti pulang pi Daud pung kota Betlehem di propinsi Yudea ko iko sensus.

Andia ko dong dua barangkat pi kota Betlehem.

<sup>6</sup> Waktu dong su ada di sana, Maria pung waktu mau barana su sampe.

<sup>7</sup> Ma di situ, dong sonde dapa kamar di losmen. Andia ko dong maso pi dalam kandang. Ais ju dia barana Ana partama, Ana laki-laki. Ju dong bungkus sang Dia deng kaen, ko kasi tidor dalam binatang dong pung tampa makan.

### *Tuhan Allah kasi tau sang gambala dong*

<sup>8</sup> Itu malam, ada gambala barapa orang yang mete jaga dong pung kambing-domba di padang di luar kota.

<sup>9</sup> Takuju sa, dong dapa lia Tuhan Allah pung ana bua dari sorga. Ais Tuhan pung taráng bacaya kuliling sang dong, ju dong taku mau mati.

<sup>10</sup> Ma itu ana bua kasi tau bilang,  
"Bosong jang taku dolo! Dengar bae-bae, é! Te  
beta ni, datang mau kasi tau satu kabar  
bae kasi bosong. Samua yang dengar ini  
kabar, pasti sanáng.

<sup>11</sup> Ini kabar bae pung isi bagini:

Ini hari satu mama su barana sang Kristus  
di Betlehem, di raja Daud pung kota.

Kristus tu, Orang yang Tuhan Allah su  
janji memang dari dolu.

Tuhan kirim datang sang Dia ko kasi salamat  
orang dari dong pung sala-sala!

Dia ni, yang nanti orang dong pange, 'Bos',  
te Dia yang hak parenta samua!

**12** Nanti bosong dapa kanál sang Dia bagini:  
bosong katumu satu Ana mea yang ada  
tabungkus deng kaen. Dia ada tidor dalam  
binatang dong pung tampa makan."

**13** Itu ana bua omong abis ju, takuju sa, Tuhan  
Allah pung ana bua yang laen dong dari sorga  
datang bam-banya ko bakumpul deng dia. Ju  
dong puji Tuhan Allah deng manyanyi bilang,

**14** "Botong angka nae tinggi-tinggi Tuhan Allah  
pung nama!"

Dia yang dudu parenta di langit yang paling  
tinggi.

Tuhan Allah mau kasi dame sang orang di bumi,  
yang bekin sanáng Dia pung hati!"

**15** Ais ju Tuhan pung ana bua dong pulang  
kambali pi sorga. Ju itu gambala dong ba'omong  
bilang, "We! Mari kotong pi Betlehem ko pi lia  
itu Ana dolo! Te Tuhan su kirim itu kabar kasi  
kotong."

**16** Ais dong jalan capát-capát pi Betlehem. Ju  
dong katumu sang Maria deng Yusuf. Dong ju  
dapa lia itu Ana mea, yang ada tidor dalam  
binatang pung tampa makan.

**17** Waktu dong dapa lia itu Ana, ju dong carita  
bilang, "Tadi Tuhan Allah pung ana bua dari

sorga dong su kasi tau so'al ini Ana sang botong!"  
Ju dong carita samua sampe abis.

<sup>18</sup> Samua orang Maheran-heran dengar itu gambala dong pung carita.

<sup>19</sup> Ma Maria taro dalam dia pung hati samua yang su jadi tu. Deng dia pikir diam-diam ko mau cari tau dia pung arti bilang apa.

<sup>20</sup> Ais ju itu gambala dong bale pi dong pung kambing-domba dong. Ju dong angka nae tinggi-tinggi Tuhan Allah pung nama. Dong minta tarima kasi sang Dia, tagal yang dong dengar deng lia, sama parsís ke apa yang Tuhan pung ana bua su omong tu.

### *Itu Ana mea, dong kasi nama Yesus*

<sup>21</sup> Barana abis dalapan hari, ju dong sunat itu Ana mea iko ba'i Musa pung atoran. Ju Dia pung mama-bapa kasi nama sang Dia, 'Yesus'. Itu nama tu, nama yang ana bua dari sorga su kasi tau sang dong, waktu Dia pung mama balóm dudu parú sang Dia.<sup>◊</sup>

### *Dong bawa Ana mea Yesus pi Ruma Sambayang Pusat*

<sup>22</sup> Ada satu atoran dari ba'i Musa yang bilang, parampuan yang su barana abis ampa pulu hari, musti pi bekin iko adat kasi barisi diri di Ruma Sambayang Pusat. Deng bagitu, dong su bisa maso di ruma sambayang sama ke biasa. Andia ko Yusuf deng Maria pi kota Yerusalem, ko mau bekin iko itu adat. Ju dong bawa dong pung

---

<sup>◊</sup> **2:21:** Lukas 1:31; Kapala Agama dong pung Atoran 12:3

Ana mea tu pi dalam Ruma Sambayang Pusat, ko sarakan sang Dia jadi Tuhan pung milik.◊

<sup>23</sup> Dong iko Tuhan pung atoran yang bilang, "Tiap parampuan yang barana ana partama, kalo laki-laki, na, dia musti sarakan itu ana jadi Tuhan pung milik."◊

<sup>24</sup> Iko Tuhan pung atoran, kalo sarakan itu ana sang Tuhan, na, dia pung orang tua musti kasi korban burung takukur satu pasang, ko, burung pompa muda dua ekor. Andia ko Yusuf deng Maria ju bekin iko itu atoran.◊

*Ba'i Simeon bilang itu Ana mea Yesus tu, andia Kristus yang Tuhan Allah su janji*

<sup>25-26</sup> Itu waktu, ada satu ba'i tua, nama Simeon, yang tengah di kota Yerusalem. Dia tu, orang yang hati lurus deng rindu sang Tuhan. Tuhan pung Roh yang Barisi su kasi tau sang dia bilang, dia nanti dapa lia sang Kristus dolo, baru dia mati. Kristus tu, yang nanti kasi salamat sang orang Isra'el dong.

<sup>27</sup> Itu waktu, Tuhan pung Roh antar bawa sang Simeon pi Ruma Sambayang Pusat. Itu pas deng Yesus pung mama-bapa ada bawa sang Dia pi situ, ko sarakan sang Dia jadi Tuhan pung milik.

<sup>28</sup> Lia ame itu Ana, ais ba'i Simeon koko ame sang Dia, ju dia angka puji kasi Tuhan Allah bilang,

<sup>29</sup> "Puji Tuhan!

Tuhan su bekin iko Dia pung janji sang beta.

◊ **2:22:** Kapala Agama dong pung Atoran 12:1-8   ◊ **2:23:** Kaluar dari Masir 13:2, 12   ◊ **2:24:** Kapala Agama dong pung Atoran 12:6-8

Jadi sakarang Tuhan su bisa kasi lapás sang beta,  
 ko biar beta bisa mati deng tanáng,  
 30 te beta su lia ame Orang yang Tuhan kirim  
 datang,  
 ko kasi salamat sang botong dari botong  
 pung sala-sala dong!

31 Tuhan mau pake ini Ana  
 ko kasi salamat samua suku-bangsa.

32 Dia nanti sama ke cahaya,  
 yang bawa hormat kasi Tuhan pung bangsa  
 Isra'el dong.  
 Dia ju sama ke taráng,  
 yang kasi tunju Tuhan pung jalan  
 kasi samua suku-bangsa laen dong.”<sup>☆</sup>

33 Dengar bagitu, ju Yusuf deng Maria tahaner-heran deng apa yang ba'i Simeon omong so'al  
 dong pung Ana.

34 Ais itu, Simeon omong kasi berkat sang  
 dong. Tarús dia kasi tau sang Maria bilang,  
 “Yesus pung mama, é! Nanti banya orang di  
 Isra'el tola buang mama pung Ana ni. Ma dong  
 pung bekin-bekin sang Dia tu, nanti kasi jato bale  
 sang dong. Mama pung Ana ni, ju bekin banya  
 orang dong hati babunga.

35 Deng bagitu, nanti Tuhan buka talanjang  
 orang dong pung isi hati. Ma lu, Maria, nanti lu  
 dapa sangsara barát, sama ke kalewang tikam  
 maso di lu pung ulu hati.”

*Nene Hana minta tarima kasi sang Tuhan,  
 tagal Yesus*

---

<sup>☆</sup> 2:32: Yesaya 42:6, 49:6, 52:10

**36-37** Di Ruma Sambayang Pusat ju ada satu nene, nama Hana. Dia pung umur su 84 taon. Dia pung bapa, nama Fanuel, dari suku Aser. Dia kawin tuju taon, ju dia pung laki mati kasi tengah sang dia. Nene Hana tu, Tuhan Allah pung jubir. Dia pung karjá, andia sambayang deng puasa di Ruma Sambayang Pusat, ko sémba sang Tuhan Allah siang-malam.

**38** Waktu Simeon ada ba'omong deng Yusuf deng Maria, itu nene datang deka-deka. Ju dia dengar sang dong, ais dia angka puji-puji sang Tuhan Allah. Tarús dia omong so'al Yesus kasi samua orang yang ada tunggu-tunggu Raja yang Tuhan su janji mau kirim datang ko kasi bebas bangsa Isra'el.

### *Mama-bapa deng Ana kambali pi kampong Nasaret*

**39** Waktu Yusuf deng Maria su bekin iko ba'i Musa pung atoran samua di kota Yerusalem, ju dong pulang pi propinsi Galilea, di dong pung kampong Nasaret.<sup>☆</sup>

**40** Ju Yesus bésar datang. Ais Dia tamba kuat, tamba pintar, deng mangarti banya hal. Tuhan Allah ju kasi tunju hati bae sang Dia.

### *Nyong Yesus di Ruma Sambayang Pusat*

**41** Tiap taon, Yusuf deng Maria jalan pi kota Yerusalem, ko makan pesta Paska di situ.<sup>☆</sup>

**42** Satu kali, waktu Yesus pung umur dua blas taon, ju dong jalan sama-sama pi Yerusalem ko iko itu pesta sama ke biasa.

---

<sup>☆</sup> **2:39:** Mateos 2:23    <sup>☆</sup> **2:41:** Kaluar dari Masir 12:1-27; Carita Ulang so'al Jalan Idop 16:1-8

**43-44** Waktu hari-hari Paska su abis, ju Yusuf deng Maria mulai jalan pulang pi Nasaret sama-sama deng banya orang yang mau pulang pi Galilea. Ma dong sonde tau, Yesus ada tatenga di Yerusalem. Dong sangka Dia ada jalan sama-sama deng Dia pung tamán dong. Ma sampe sore, dong sonde dapa lia sang Dia. Ais dong mulai pal pi-datang cari sang Dia di dong pung kelu deng tamán dong.

**45** Tagal sonde tau-tau dapa katumu sang Dia, ju dong jalan kembali pi Yerusalem, ko mau cari sang Dia di sana.

**46** Sampe di sana, dong cari-cari sang Dia sampe tiga hari, baru dapa katumu sang Dia dalam Ruma Sambayang Pusat. Dia ada dudu baso'al-jawab deng guru agama Yahudi dong.

**47** Orang dong samua yang ada dengar sang dong taheran-heran, tagal Dia batúl-batúl mangarti isi dari Tuhan Allah pung Tulisan Barisi, deng Dia bisa jawab dong pung so'al-so'al deng bae.

**48** Lia bagitu, ju Dia pung mama-bapa dong heran. Ais Dia pung mama bilang, "Yesus! Akurang ko Lu bekin botong susa bagini? Lu pung bapa deng beta su tabingung-bingung bataputar pi-datang cari sang Lu!"

**49** Ma Yesus manyao bilang, "Akurang ko mama-bapa susa-susa cari sang Beta? Tau sa, to? Beta ada urusan di Beta pung Bapa pung Ruma."

**50** Ma dong sonde mangarti batúl Dia pung maksud.

**51** Ais ju dong samua pulang pi Nasaret. Yesus iko Dia pung mama deng bapa pung parenta

dong. Ju Dia pung mama taro itu hal dong samua dalam dia pung hati.

<sup>52</sup> Bagitu su, Yesus tamba dewasa, deng tamba pintar bawa diri. Tuhan Allah deng manusia ju ada sayang sang Dia.<sup>◇</sup>

### 3

*Yohanis Tukang Sarani angka dia pung karjá  
(Mateos 3:1-12; Markus 1:1-8; Yohanis 1:19-28)*

<sup>1-2</sup> Itu waktu, Tiberius jadi keser yang pegang parenta di Roma su lima blas taon. Pontius Pilatus jadi gubernor di propinsi Yudea. Herodes jadi gubernor di propinsi Galilea. Herodes pung kaka Filipus jadi gubernor di propinsi Iturea deng propinsi Trakonitis. Deng Lisanias jadi gubernor di propinsi Abilene.\*

Itu waktu ju, Hanas deng Kayafas jadi kapala agama Yahudi pung bos besar di kota Yerusalem.

<sup>◇ 2:52:</sup> 1 Samuel 2:26; Kata-kata Mutiara 3:4      <sup>\*</sup> **3:1-2:** Pamarenta Roma pake satu orang Yahudi, nama Yosefus, ko tulis sajara Isra'el di ini jaman. Dia ju tulis so'al orang yang pegang parenta deng dong pung kelu. Andia ko kotong tau bilang, Herodes di sini, pung nama laen, andia *Herodes Antipas*. Dia pung bapa, andia *Herodes Bésar* (Mateos 2:1-22; Lukas 1:5). *Filipus* di sini, andia Herodes Antipas pung kaka. Filipus pung bapa, andia Herodes Bésar; dia pung mama, nama Kleopatra dari Yerusalem. Dia kawin deng Salome, andia Herodias pung ana. Di ayat 3:19 di bawa, ada *Filipus* laen. Dia tu, Herodes Antipas pung adi. Dia pung bapa, Herodes Bésar ju; ma dia pung mama, nama Mariamne. Dia kawin deng Herodias. Dong dua pung ana nona, nama Salome. Ma dia pung kaka Herodes Antipas rampas ame dia pung bini. (Mateos 14:3; Markus 6:17; Lukas 3:19).

Itu waktu, Yohanis, Sakaria pung ana tu, ada tengah di tampa sunyi yang jao dari kampong. Di situ, Tuhan kasi pasan sang dia.

<sup>3</sup> Dengar abis, ju Yohanis jalan pi samua kampong yang deka-deka deng kali Yarden, ko kasi tau orang dong bilang, "Bosong musti mangaku deng kasi tengah bosong pung sala samua, ko biar Tuhan Allah hapus buang itu sala dong. Ais bosong musti sarani dolo, ko jadi tanda bilang, bosong su babae deng Tuhan."

<sup>4</sup> Dolu-dolu Tuhan pung jubir ba'i Yesaya ada tulis so'al Yohanis ni bilang,

"Ada orang di tampa sunyi yang batarea bilang,  
'Samua orang siap-siap bekin bae jalan, ko tarima Tuhan pung datang!

Bekin lurus jalan ko sambut sang Dia.

<sup>5</sup> Tutu bekin rata tiap jurang.

Puku bekin rata tiap gunung.

Bekin lurus jalan bengko dong,  
bekin licin jalan kasar dong.

<sup>6</sup> Biar ko orang dari samua suku-bangsa  
bisa dapu tau bilang, Tuhan mau kasi salamat orang  
dari dong pung sala-sala.'"<sup>5</sup>

<sup>7</sup> Orang banya datang dari mana-mana ko minta Yohanis sarani sang dong. Ma dia masparak sang dong bilang, "Weh! Bosong tukang putar-balek! Bosong sama ke ular baracon sa!  
Jang kira bosong bisa talapas dari Tuhan pung hukuman deng tobat pura-pura sa! Sonde! Tar

---

<sup>5</sup> **3:6:** Yesaya 40:3-5

lama lai, Tuhan kasi hukum samua orang yang sonde tobat batúl.<sup>◊</sup>

<sup>8</sup> Bosong jang pikir bilang, ‘Beta ni sonde kaná hukum tagal beta ni, ba'i Abraham pung turunan.’ Dapa di mana bagitu? Itu sonde bisa bantu bosong, tagal sonde bekin bosong jadi orang barisi. Tuhan mampu bekin ini batu dong ko jadi ba'i Abraham pung turunan. Beta kasi tau, é! Kasi tunju deng bosong pung idop bilang, bosong su bale balakang kasi tengah bosong pung sala dong, deng bosong su bale iko sang Tuhan.<sup>◊</sup>

<sup>9</sup> Bosong musti bekin hal yang bae. Kalo sonde, Tuhan pung hukum barát jato kaná sang bosong, sama ke orang pake kapak ko potong buang pohon dari dia pung akar. Bagitu su! Pohon sonde ada pung guna, kalo dia sonde ada pung hasil bae! Jadi lebe bae potong sang dia, ais lempar buang pi dalam api.”<sup>◊</sup>

<sup>10</sup> Ais, itu orang banya dong tanya sang Yohanis bilang, “Jadi botong musti bekin apa?”

<sup>11</sup> Ju dia manyao bilang, “Kalo lu ada pung baju dua, na, kasi satu di orang yang sonde ada pung baju. Kalo lu ada pung makanan, na, bagi kasi sang orang yang sonde ada pung makanan.”

<sup>12</sup> Ais tukang tagi bea ju datang ko minta Yohanis sarani sang dong. Dong tanya bilang, “Bapa guru! Botong musti bekin karmana?”<sup>◊</sup>

<sup>13</sup> Dia manyao bilang, “Bosong suka maen putar-balek. Ma sakarang bosong musti karjá jujur. Jang hela pajak lebe-lebe dari pamarenta

---

<sup>◊</sup> **3:7:** Mateos 12:34, 23:33    <sup>◊</sup> **3:8:** Yohanis 8:33    <sup>◊</sup> **3:9:** Mateos 7:19    <sup>◊</sup> **3:12:** Lukas 7:29

pung atoran. Biar ko rakyat bayar pajak pas-pas deng atoran.”

<sup>14</sup> Ada ju barapa tantara di situ. Dong tanya sang Yohanis bilang, “Kalo botong, karmana? Botong musti bekin apa?”

Ais dia manyao bilang, “Jang maen bapajak orang dong pung doi, iko bosong pung suka. Deng jang maen batudu orang sambarang. Bosong musti sukur deng puas tarima barisi bosong pung gaji.”

<sup>15</sup> Dengar dia pung omong tu, ju samua orang mulai bakorek ko bakusu-kusu bilang, “Awii! Jang-jang Yohanis ni, Kristus, yang Tuhan su janji mau kirim datang dari dolu tu!”

<sup>16</sup> Ma Yohanis togor sang dong bilang, “Dengar bae-bae! Nanti ada satu Orang yang lebe hebat dari beta mau datang. Biar cuma jadi Dia pung tukang suru-suru sa, ju beta sonde pantas.<sup>†</sup> Beta cuma bisa sarani sang bosong pake aer sa, ma nanti Dia bekin lebe dari beta, te Dia bekin ponu bosong pung hati deng Tuhan pung Roh yang Barisi. Dia nanti bekin barisi sang bosong, sama ke orang pake api ko bakar buang kotoran.

<sup>17</sup> Dia hukum orang yang bekin sala dong, sama ke orang tani yang pake angin ko pisa buang kotoran dari padi. Ais dia simpan padi yang barisi dalam sokal, ma bakar buang dia pung kotoran. Bagitu ju, nanti Kristus hukum orang yang bekin sala dong, deng lempar buang

---

<sup>†</sup> **3:16:** Tulisan bahasa Yunani asli bilang, ‘mau buka dia pung tali sapatu sa ju, beta sonde pantas.’ Dia pung arti bilang, Yohanis cuma orang kici sa, biar jadi Tuhan Yesus pung tukang suru-suru ju, dia rasa sonde pantas.

sang dong pi dalam api yang sonde tau putus-putus."

**18** Deng bagitu, Yohanis kasi inga orang macam-macam hal, deng kasi tau Tuhan pung Kabar Bae sang dong.

**19-20** Itu waktu, Yohanis ju mulai omong taráng-taráng so'al Herodes pung bekin-bekin. Dia pung parkara bagini: Herodes tu, gubernor di propinsi Galilea. Dia pung sala su satu mal'unuk pung. Conto ke dia su rampas bawa dia pung adi pung bini, nama Herodias. Padahal dia pung adi masih idop, deng balóm bacere deng Herodias. Herodes pung cara idop yang sonde batúl tu, bekin Yohanis togor sang dia taráng-taráng, sampe Herodes doak sang dia. Ais Herodes tangkap ame sang dia, ju lempar buang sang dia pi dalam bui.<sup>‡</sup>

### *Yohanis sarani sang Tuhan Yesus*

(Mateos 3:13-17; Markus 1:9-11)

**21** Dulu waktu dong balóm tangkap sang Yohanis, dia ada sarani orang banya. Deng dia ju sarani sang Yesus. Ais itu Yesus sambayang, ju langit tabuka.

**22** Tarús Tuhan pung Roh yang Barisi turun datang pi Dia. Itu Roh pung rupa sama ke burung pompa. Ju ada suara dari langit bilang, "Lu ni, Beta pung Ana sayang.

Lu salalu bekin sanáng sang Beta."<sup>◊</sup>

---

<sup>‡</sup> **3:19-20:** Baca catatan kaki di Lukas 3:1-2. Lia ju Mateos 14:3-4; Markus 6:17-18. <sup>◊</sup> **3:22:** Carita Mula-mula 22:2; Lagu Puji dong 2:7; Yesaya 42:1; Mateos 3:17; Markus 1:11; Lukas 9:35

*Tuhan Yesus pung nene-moyang dong, iko bapa Yusuf  
 (Mateos 1:1-17)*

**23** Waktu Yesus mulai kasi tau orang so'al Tuhan pung jalan idop, Dia pung umur kira-kira tiga pulu taon. Orang kanál bilang, Yesus tu, Yusuf pung Ana. Yusuf pung nene-moyang dong, andia:

Yusuf pung bapa, Eli.

**24** Eli pung bapa, Matat.

Matat pung bapa, Lewi.

Lewi pung bapa, Melki.

Melki pung bapa, Yanai.

Yanai pung bapa, Yusuf.

**25** Yusuf pung bapa, Matatias.

Matatias pung bapa, Amos.

Amos pung bapa, Nahum.

Nahum pung bapa, Hesli.

Hesli pung bapa, Nagai.

**26** Nagai pung bapa, Maat.

Maat pung bapa, Matatias.

Matatias pung bapa, Semein.

Semein pung bapa, Yosek.

Yosek pung bapa, Yoda.

**27** Yoda pung bapa, Yohanan.

Yohanan pung bapa, Resa.

Resa pung bapa, Serubabel.

Serubabel pung bapa, Sealtiel.

Sealtiel pung bapa, Neri.

**28** Neri pung bapa, Melki.

Melki pung bapa, Adi.

Adi pung bapa, Kosam.

Kosam pung bapa, Elmadam.

Elmadam pung bapa, Er.  
**29** Er pung bapa, Yosua.  
 Yosua pung bapa, Elieser.  
 Elieser pung bapa, Yorim.  
 Yorim pung bapa, Matat.  
 Matat pung bapa, Lewi.  
**30** Lewi pung bapa, Simeon.  
 Simeon pung bapa, Yahuda.  
 Yahuda pung bapa, Yusuf.  
 Yusuf pung bapa, Yonam.  
 Yonam pung bapa, Elyakim.  
**31** Elyakim pung bapa, Melea.  
 Melea pung bapa, Mena.  
 Mena pung bapa, Matata.  
 Matata pung bapa, Natan.  
 Natan pung bapa, Daud.  
**32** Daud pung bapa, Isai.  
 Isai pung bapa, Obet.  
 Obet pung bapa, Boas.  
 Boas pung bapa, Salmon.  
 Salmon pung bapa, Nahason.  
**33** Nahason pung bapa, Aminadab.  
 Aminadab pung bapa, Admin.  
 Admin pung bapa, Arni.  
 Arni pung bapa, Hesron.  
 Hesron pung bapa, Peres.  
 Peres pung bapa, Yahuda.  
**34** Yahuda pung bapa, Yakob.  
 Yakob pung bapa, Isak.  
 Isak pung bapa, Abraham.  
 Abraham pung bapa, Tera.  
 Tera pung bapa, Nahor.  
**35** Nahor pung bapa, Seruk.

Seruk pung bapa, Rehu.  
 Rehu pung bapa, Pelek.  
 Pelek pung bapa, Eber.  
 Eber pung bapa, Sela.  
<sup>36</sup> Sela pung bapa, Kenan.  
 Kenan pung bapa, Arpaksad.  
 Arpaksad pung bapa, Sem.  
 Sem pung bapa, Noh.  
 Noh pung bapa, Lamek.  
<sup>37</sup> Lamek pung bapa, Metusalak.  
 Metusalak pung bapa, Henok.  
 Henok pung bapa, Yared.  
 Yared pung bapa, Mahalalel.  
 Mahalalel pung bapa, Kenan.  
<sup>38</sup> Kenan pung bapa, Enos.  
 Enos pung bapa, Set.  
 Set pung bapa, Adam.  
 Adam tu, Tuhan Allah pung ana cipta'an.

## 4

*Setan dong pung bos coba sang Tuhan Yesus  
 (Mateos 4:1-11; Markus 1:12-13)*

<sup>1</sup> Waktu Yohanis sarani abis sang Yesus, ju Yesus jalan kasi tengah kali Yarden. Tuhan pung Roh yang Barisi ada sama-sama deng Dia. Ais, itu Roh bawa sang Dia pi tampa sunyi.

<sup>2</sup> Yesus tengah di situ sampe ampa pulu hari. Itu waktu ju Dia sonde makan apa-apa, sampe Dia lapar mati pung. Ju setan dong pung bos datang coba hiki sang Dia.

<sup>3</sup> Dia omong sang Yesus bilang, “Kalo Lu memang Tuhan Allah pung Ana, Lu ada pung

kuasa. Jadi suru ini batu dong jadi roti, ko Lu makan sang dong.”

<sup>4</sup> Ma Yesus manyao bilang, “Lu pung mau lai! Sonde tau, ko? Ada tulis dalam Tuhan Allah pung Tulisan Barisi bilang,

‘Manusia bukan cuma idop dari makanan to!’”<sup>◎</sup>

<sup>5-6</sup> Ais itu, setan dong pung bos bawa sang Dia pi satu tampa tinggi, ju kasi tunju abis sang Dia samua pamarenta di bumi deng dong pung hebat samua. Ais dia kokoe sang Yesus bilang, “Samua pamarenta deng dong pung kuasa tu, beta pung samua. Bagitu ju deng dia pung hebat samua! Jadi beta ada pung hak mau kasi sapa sa yang beta suka.

<sup>7</sup> Beta mau kasi samua sang Lu. Cuma Lu musti bekin satu hal dolo, baru beta kasi. Gampang sa! Lu cuma sémba sang beta. Itu sa!”

<sup>8</sup> Ma Yesus manyao bale bilang, “Dapa di mana bagitu? Te dalam Tuhan Allah pung Tulisan Barisi ada tulis bilang,

‘Lu musti sémba sang Tuhan Allah sa.

Deng lu musti layani ame sang Dia sa.’”<sup>◎</sup>

<sup>9</sup> Ais itu, setan dong pung bos ame bawa sang Yesus pi kota Yerusalem. Di situ, dia bawa nae sang Yesus pi Ruma Sambayang Pusat pung tampa paling tinggi. Ais dia bilang, “Kalo Lu memang Tuhan Allah pung Ana, na, Lu buang diri pi bawa su!

<sup>10</sup> Te ada tulis di Tuhan Allah pung Tulisan Barisi bilang,

---

<sup>◎</sup> 4:4: Carita Ulang so'al Jalan Idop 8:3; Mateos 4:4      <sup>◎</sup> 4:8: Carita Ulang so'al Jalan Idop 6:13

'Tuhan Allah nanti suru Dia pung ana bua dari sorga,  
ko jaga ame sang Lu.

<sup>11</sup> Nanti dong datang tada sang Lu,  
ko biar Lu pung kaki sonde tasonto sadiki ju di batu.' <sup>⊗</sup>

<sup>12</sup> Ma Yesus manyao bilang, "Jang maen paricuk deng Beta. Te ada tulis dalam Tuhan Allah pung Tulisan Barisi bilang,  
'Jang coba Tuhan Allah!' " <sup>⊗</sup>

<sup>13</sup> Setan dong pung bos coba sang Yesus deng jalan macam-macam, ma sonde dapa ontong sang Dia. Ais dia jalan kasi tengah sang Yesus, ko tunggu waktu yang bae.

*Tuhan Yesus pi Galilea ko mulai kasi tau orang so' al Tuhan pung Kabar Bae*

(Mateos 4:12-17; Markus 1:14-15)

<sup>14</sup> Ais itu, ju Yesus kambali lai pi propinsi Galilea, te Tuhan pung Roh yang Barisi ada kasi kuasa sang Dia. Sonde lama, ju orang di itu da'era dong mulai kanál Dia pung nama.

<sup>15</sup> Dia ajar di orang Yahudi pung ruma sambayang di mana-mana. Ju orang-orang puji sang Dia bilang, "Yesus tu, Orang hebat, ó!"

*Orang dong sonde tarima sang Tuhan Yesus di Nasaret*

(Mateos 13:53-58; Markus 6:1-6)

<sup>16</sup> Satu kali, Yesus datang di Dia pung kampong Nasaret. Pas deng orang Yahudi dong pung hari sambayang, andia 'hari Sabat', Dia maso pi ruma

---

<sup>⊗</sup> **4:11:** Lagu Puji dong 91:11-12    <sup>⊗</sup> **4:12:** Carita Ulang so' al Jalan Idop 6:16

sambayang, sama ke Dia pung biasa. Ais Dia bangun badiri ko mau baca dari Tuhan Allah pung Tulisan Barisi.

<sup>17</sup> Ju dong sorong kasi sang Dia ba'i Yesaya pung tulisan. Tarús Dia buka, ais cari ayat, ju baca bilang,

<sup>18</sup> "Tuhan Allah pung Roh pung kuasa ada di Beta.

Andia ko Dia tunju sang Beta,  
ko kasi tau Tuhan pung Kabar Bae sang  
orang kasian dong.

Dia su utus sang Beta,

ko kasi tau bilang,

yang di bui dong, nanti bebas;

yang buta dong, nanti bisa lia kambali;

yang kaná tendes dong, nanti idop bebas.

<sup>19</sup> Te sakarang ni, Tuhan pung waktu su sampe,

ko kasi salamat Dia pung orang dong."\*

◊

<sup>20</sup> Baca abis itu tulisan, ju Yesus gulung kambali ko sorong pi pamimpin ibadat, tarús Dia dudu. Samua orang yang ada dalam itu ruma sambayang lia tarús sang Dia.

<sup>21</sup> Ais Dia kasi tau sang dong bilang, "Apa yang bosong dengar dari Tuhan Allah pung Tulisan Barisi tadi tu, sakarang su jadi!"

<sup>22</sup> Ju samua orang yang ada di situ mulai omong angka-angka sang Yesus bilang, "Awii!

\* <sup>4:19:</sup> Ini dua ayat ni iko pas-pas tulisan bahasa Yunani asli. Alkitab bahasa Indonesia (TB) taro angka dari ayat 19 di tampa yang sonde pas. ◊ <sup>4:19:</sup> Yesaya 61:1-2

Apa yang Dia omong tadi tu, pung bagus lai! Ma Dia ni, Usu pung Ana, wuang? Karmana ko bisa bagini?"

<sup>23</sup> Ju Yesus kasi tau sang dong bilang, "Tantu bosong samua tau ada bahasa kata, 'We, dokter! Bekin bae lu pung diri sandiri dolo!' Bosong ada mau pake itu bahasa ko puku bale sang Beta bilang, 'Akurang ko Lu sonde bekin tanda heran satu kasi botong di sini, sama ke yang Lu su bekin di kota Kapernaum sana?'

<sup>24</sup> Dia pung batúl bagini: orang sonde mau tarima sang Tuhan pung jubir di dia pung kampong sandiri.<sup>☆</sup>

<sup>25-26</sup> Ame conto dari Tuhan pung jubir, ba'i Elia. Satu kali, ujan su sonde turun tiga taon satenga. Itu waktu, ada banya janda di Isra'el. Ma Tuhan sonde kirim Elia ko tolong sang dong di Isra'el. Tuhan cuma kirim sang dia pi satu mama janda di kampong Sarfat deka deng kota Sidon. Padahal mamatua tu, bukan orang Yahudi. Ma dia parcaya Tuhan Allah pung kuasa.<sup>☆</sup>

<sup>27</sup> Ame conto laen lai dari Tuhan pung jubir Elisa. Itu waktu, ada banya orang Yahudi yang saki kusta di Isra'el. Ma Tuhan sonde bekin bae sang dong. Tuhan cuma suru Elisa bekin bae satu orang kusta, nama Naaman. Padahal dia tu, orang Siria, bukan orang Yahudi. Ma dia parcaya Tuhan Allah pung kuasa."<sup>☆</sup>

<sup>28</sup> Waktu dong dengar Yesus pung omong bagitu, ju dong samua maruak sang Dia.

---

<sup>☆</sup> **4:24:** Markus 6:4; Yohanis 4:44    <sup>☆</sup> **4:25-26:** 1 Raja-raja dong 17:1, 8-16    <sup>☆</sup> **4:27:** 2 Raja-raja dong 5:1-14

**29** Ais dong bangun rame-rame, ju usir buang sang Dia dari itu ruma sambayang. Tarús dong hela bawa sang Dia pi kampong pung pinggir, ko mau tola buang sang Dia pi dalam jurang di situ.

**30** Ma Dia cuma jalan kaluar lewat itu orang banya dong pung teng-tenga, abis kasi tengah sang dong di situ.

*Tuhan Yesus usir setan dari satu orang  
(Markus 1:21-28)*

**31** Ais itu, Yesus turun pi kota Kapernaum di dano Galilea pung pinggir. Tiap hari sambayang Dia ajar orang dong dalam ruma sambayang.

**32** Orang dong tahanan-heran dengar Dia pung omong, te Dia tau batúl itu ajaran pung isi.◊

**33** Satu kali, waktu Yesus ada mangajar di itu ruma sambayang, ada satu orang yang takaná setan mulai batarea ukur kuat pung bilang,

**34** “Woi! Yesus, Orang Nasaret! Lu ada pung urusan apa deng botong! Lu datang ko mau bekin ancor sang botong, ko? Botong kanál sang Lu. Lu ni, itu Orang Barisi yang dolu Tuhan Allah janji ko mau kirim datang.”

**35** Ma Yesus masparak sang dia bilang, “Tutu lu pung mulu! Kaluar dari itu orang!” Takuju sa, itu setan angka banting itu orang di lante di orang dong pung teng-tenga. Banting abis, ju itu setan kaluar kasi tengah itu orang, deng sonde bekin saki sang dia.

**36** Orang dong samua tanganga bilang, “Heran, é! Ini Orang pung omong tu, ada kuasa hebat!

---

◊ **4:32:** Mateos 7:28-29

Sampe-sampe setan dong ju iko Dia pung parenta ko kaluar dari orang!"

<sup>37</sup> Ais carita so'al Yesus mulai tasiar di itu da'era samua.

*Tuhan Yesus bekin bae Simon pung mama mantu, deng banyak orang lai*  
*(Mateos 8:14-17; Markus 1:29-34)*

<sup>38</sup> Waktu dong kaluar dari itu ruma sambayang ju, Yesus pi satu orang pung ruma. Itu orang pung nama, Simon.<sup>†</sup> Simon pung mama mantu ada saki damám, jadi dia pung badan ada panas tinggi. Ais dong minta sang Yesus bilang, "Bapa! Tolong bekin bae sang mamatua dolo!"

<sup>39</sup> Yesus pi badiri di pinggir koi, ais usir kaluar itu damám dari mamatua. Itu sa'at ju, dia pung damám ilang memang. Ais ju dia bangun memang ko pi sadia makan kasi sang dong.

<sup>40</sup> Itu sore, waktu matahari su mulai tanggalám, orang dong bawa datang samua orang saki pi sang Yesus. Dong pung panyaki macam-macam. Ais Dia taro tangan di orang saki dong, ju bekin bae sang dong samua.

<sup>41</sup> Di itu orang saki dong ju, ada barapa yang takaná setan. Ais Yesus parenta sang setan dong ko kaluar dari itu orang dong. Dong kaluar deng batarea bilang, "Lu ni, Tuhan Allah pung Ana!" Te itu setan dong tau bilang, Dia tu, Kristus, yang Tuhan Allah su janji dari dolu ko mau kirim datang. Tagal itu, Yesus togor sang dong ko sonde bole ba'omong satu kata ju so'al Dia pung diri.

---

<sup>†</sup> **4:38:** Simon tu, andia Petrus pung nama laen.

*Tuhan Yesus pi kasi tau Kabar Bae di ruma  
sambayang dong  
(Markus 1:35-39)*

<sup>42</sup> Dia pung beso amper siang, ju Yesus bangun ko pi satu tampa sunyi di luar kota. Orang dong cari sang Dia di mana-mana. Waktu katumu, ju dong noki sang Dia bilang, “Bapa tengah deng botong sa! Sonde usa jalan pi tampa laen!”

<sup>43</sup> Ma Dia manyao bilang, “Beta ju musti pi kampong laen dong, ko pi kasi tau Kabar Bae so’al Tuhan Allah pung parenta. Te Tuhan su utus sang Beta ko kasi jalan itu tugas.”

<sup>44</sup> Ju Dia jalan dari satu kampong pi kampong laen ko mangajar di ruma-ruma sambayang di propinsi Yudea.

## 5

*Dong pukat dapa ikan bam-banya  
(Mateos 4:18-22; Markus 1:16-20)*

<sup>1</sup> Satu kali, Yesus ajar orang dong di dano Galilea pung pinggir.\* Banya orang datang ko mau dengar Tuhan Allah pung Kata-kata. Sampe-sampe dong baseti makarubu ame sang Yesus.

<sup>2</sup> Deka-deka di situ, ada nelayan yang bekin barisi dong pung pukat di darat. Ju Yesus dapa lia dua parahu kosong ada sandar di situ.

<sup>3</sup> Satu dari itu parahu dong, andia Simon pung. Ais Yesus nae pi Simon pung parahu, ju minta

---

\* **5:1:** Alkitab bahasa Yunani bilang ‘di dano Genesaret pung pinggir’. Dano Genesaret pung nama laen, andia dano Galilea.

sang dia ko tola itu parahu pi aer dalam sadiki. Tarús Dia dudu ko ajar itu orang banya dong.<sup>◊</sup>

<sup>4</sup> Ajar abis, ju Dia omong sang Simon bilang, "Mon! Pi tampa yang sadiki dalam ko kasi turun pukat di situ. Te nanti bosong dapa ikan banya."

<sup>5</sup> Ma Simon manyao bilang, "Bos lai ju! Botong su karjá banting tulang satu malam anteru, ma satu ekor ju, botong sonde dapa! Ma tagal Bapa su bilang bagitu, na, neu sa! Beta coba kasi turun sa."<sup>◊</sup>

<sup>6</sup> Ais dong kasi turun pukat. Waktu mau hela kasi nae kambali, tau-tau te itu pukat su ponu deng ikan satu mal'unuk, sampe-sampe pukat su mulai tarobe.<sup>◊</sup>

<sup>7</sup> Ju Simon batarea pange dia pung kawan dong dari parahu laen ko datang bantu. Ais dong ra'u kasi maso ikan di parahu, sampe itu dua parahu ponu deng ikan ko su amper tanggalám.

<sup>8-10</sup> Simon pung kawan nalayan, Yakobis deng Yohanis, andia bapa Sabadeus pung ana-ana dong, ju ada. Dong ju heran mau mati, tagal dong dapa ikan bam-banya bagitu. Waktu Simon Petrus lia apa yang su jadi, ju dia langsung tikam lutut di Yesus pung muka bilang, "Beta ni, satu orang yang su bekin sala talalu banya. Jadi lebe bae Bos jang deka-deka sang beta lai."<sup>†</sup>

Ma Yesus manyao bilang, "Mon! Jang talalu bapikir itu so'al, te Beta ada mau pake sang bosong. Bosong ni, biasa cari ikan. Ma sakarang Beta ajar bosong cari orang ko iko sang Beta."

---

<sup>◊</sup> **5:3:** Mateos 13:1-2; Markus 3:9-10, 4:1    <sup>◊</sup> **5:5:** Yohanis 21:3

<sup>◊</sup> **5:6:** Yohanis 21:6    <sup>†</sup> **5:8-10:** Simon, ko Petrus, ko Simon Petrus, itu nama dari satu orang sa.

**11** Ais ju dong langsung hela dong pung parahu ko simpan di darat. Ju dong jalan kasi tengah samua-samua, ko iko sang Yesus.

*Tuhan Yesus bekin bae satu orang yang kaná panyaki kusta*  
**(Mateos 8:1-4; Markus 1:40-45)**

**12** Di satu kampong, Yesus dapa katumu sang satu orang yang dia pung badan su ponu deng panyaki kusta. Waktu dia dapa lia sang Yesus, ju dia pi tikam lutut deng tondo dia pung muka sampe di tana. Ju dia bilang, “Bapa, é! Tolong beta dolo! Te beta tau, Bapa bisa kasi ilang beta pung panyaki ni, ko biar orang jang noju lai sang beta. Asal Bapa mau.”

**13** Ais Yesus sorong tangan ko raba sang dia. Ju Dia omong bilang, “Beta mau sa! Lu bae su!” Omong abis, te itu orang pung kusta ilang buang memang.

**14** Ju Yesus kasi inga sang dia bilang, “Inga bae-bae! Lu su bae, ma sonde bole kasi tau sapa-sapa, é! Lu musti iko ba'i Musa pung parenta dolu. Jadi pi di kapala agama, ko dia pareksa lu pung badan, biar dia tau lu pung panyaki su ilang batúl, ko sonde. Ais lu musti kasi persembahan tanda tarima kasi, ko orang samua tau bilang, lu su bae batúl.”<sup>✳</sup>

**15** Biar Yesus larang, ma itu carita so'al Dia pung kuasa tu, tasiar dari mulu pi mulu pi manama. Jadi orang dong maen malele datang ko mau dengar Dia ajar sang dong. Ais Dia

---

<sup>✳</sup> **5:14:** Kapala Agama dong pung Atoran 14:1-32

bekin bae banya orang dari dong pung panyaki macam-macam.

<sup>16</sup> Ma Yesus ju suka ondor diri dari orang banya, ko pi sambayang di tampa sunyi.

*Tuhan Yesus bekin bae satu orang lumpu  
(Mateos 9:1-8; Markus 2:1-12)*

<sup>17</sup> Satu kali, Yesus ajar orang di satu ruma. Itu waktu ada orang dari partai agama Farisi deng guru agama barapa orang, datang ko iko dengar sang Dia. Dong datang dari kampong-kampong di propinsi Galilea, dari propinsi Yudea, deng dari kota Yerusalem. Tuhan Allah ada kasi kuasa sang Yesus ko bekin bae orang saki dong.

<sup>18-19</sup> Itu waktu, ada barapa orang dorok bawa satu orang lumpu di atas tandu. Dong usaha karás bawa itu orang lumpu, ko Yesus bekin bae sang dia. Ma itu ruma su talalu sesak deng orang, sampe-sampe mau paksa maso ju, sonde bisa. Andia ko dong bawa nae itu orang lumpu pi atas ruma. Ais dong bongkar bekin lobang, ko loos kasi turun itu orang lumpu di atas tandu. Dong kasi turun sang dia di teng-tenga orang banya dong, parsís di Yesus pung muka.

<sup>20</sup> Lia bagitu ju, Yesus tau bilang, dong parcaya Dia bisa bekin bae sang dong pung kawan tu. Ju Dia omong sang itu orang lumpu bilang, "Ana, é!  
Beta su hapus buang lu pung sala dong."

<sup>21</sup> Dengar Yesus omong bagitu, ju itu orang Farisi deng guru agama dong mulai batanya bilang, "He'e! Cuma Tuhan Allah sandiri sa yang ada pung hak ko hapus buang orang pung sala dong. Ko dia ni, sapa, sampe bekin diri sama ke Tuhan Allah! Ini ni, hojat barát!"

**22** Ma Yesus tau dong pung dalam hati. Ais Dia omong bilang, “Akurang ko bosong pikir Beta ni, ada omong hojat?

**23-24** Beta ni, Manusia Tulen. Deng Beta ada pung hak ko kasi ampon orang pung sala. Kalo Beta cuma kasi tau sang ini orang lumpu ni bilang, ‘Beta su kasi ampon lu pung sala,’ bosong sonde lia Beta pung kuasa di ini dunya. Ma kalo Beta bilang, ‘Bangun suda! Angka lu pung tandu ko pulang.’ Kalo dia bangun memang, bosong baru dapa lia Beta pung kuasa. Andia ko Beta mau bekin bae ini orang lumpu ko biar bosong ju tau Beta ada pung hak ko kasi ampon orang pung sala.”

Ju Dia bale ko omong sang itu orang lumpu bilang, “Badiri su! Angka lu pung tandu, ko jalan pulang!”

**25** Takuju sa, ju itu orang bangun badiri di orang banya dong pung muka, ais angka ame dia pung tandu. Tarús dia jalan pulang deng angka puji sang Tuhan Allah.

**26** Lia bagitu ju, samua orang heran. Ais dong angka nae tinggi-tinggi Tuhan Allah pung nama bilang, “Tuhan hebat, ó! Ini hari kotong su lia hal luar biasa deng kotong pung mata kapala sandiri!”

*Tuhan Yesus pange sang Lewi ko iko sang Dia  
(Mateos 9:9-13; Markus 2:13-17)*

**27** Sonde lama ju, Yesus kaluar dari itu ruma, ju Dia dapa lia satu orang tukang tagi bea yang ada dudu di dia pung tampa pajak. Itu orang pung

nama, Lewi.<sup>‡</sup> Ais Yesus ajak sang dia bilang, “Mari iko sang Beta!”

<sup>28</sup> Dengar bagitu, ju Lewi bangun memang, ais jalan kasi tengah samua-samua di situ, ko iko sang Jesus.

<sup>29</sup> Ais itu, Lewi bekin pesta bésar ko undang Jesus datang pi dia pung ruma. Dia ju undang dia pung kawan tukang tagi bea dong, deng tamu laen dong, ko datang makan pesta.

<sup>30</sup> Ma ada barapa orang partei agama Farisi deng guru agama dong, yang mangomel di Jesus pung ana bua dong bilang, “Akurang ko bosong dudu makan deng orang tar laku-laku dong, sama ke itu tukang tagi bea deng itu orang tar bae dong? Orang bae jang bacampor deng orang model ke dong!”<sup>\*</sup>

<sup>31</sup> Ma Yesus kasi tau sang dong bilang, “Orang saki memang parlú dokter. Ma orang su bae, sonde parlú.”

<sup>32</sup> Beta datang ko urus orang tar bae dong. Ma sonde datang ko urus orang yang su rasa diri batúl.”

*Guru agama dong bakanjar deng Tuhan Yesus so'al puasa*

*(Mateos 9:14-17; Markus 2:18-22)*

<sup>33</sup> Ais, itu orang dari partei agama Farisi deng guru agama dong ju mangomel di Jesus bilang, “Bagini, Bapa! Yohanis Tukang Sarani pung ana bua dong puasa deng sambayang ulang kali. Orang Farisi pung ana bua dong ju bagitu. Ma akurang ko Bapa pung ana bua dong maen

---

<sup>‡</sup> **5:27:** Lewi pung nama laen, Mateos.    <sup>\*</sup> **5:30:** Lukas 15:1-2

makan-minum tarús? Dong tu, sonde tau puasa, ko?”

<sup>34</sup> Ma Yesus balas pake umpama sang dong bilang, “Memang bosong su tau, kalo ada pesta kawin, tamu dong sonde puasa, ma dong makan sampe kinyang. Kalo baroit laki-laki masih ada di situ, tantu dong samua makan rame-rame.

<sup>35</sup> Ma nanti satu kali, kalo orang laen tangkap bawa itu baroit laki-laki dolo, dia pung tamán dong rasa susa, baru dong puasa.”

<sup>36</sup> Ais ju Yesus kasi satu umpama lai bilang, “Sonde ada orang yang ame kaen baru sapo'ong, ko tempel pi di baju lama yang tarobe. Te nanti kalo cuci itu baju, kaen tempel yang baru tu batakundur, deng itu baju lama tamba tarobe.

<sup>37-38</sup> Bagitu ju, orang sonde isi tuak baru pi dalam haik yang su lapuk. Te nanti itu haik pica, ju itu tuak malele buang. Jadi tuak baru musti po'a pi dalam haik yang baru. [Deng bagitu, Jesus ajar sang dong bilang, Dia pung ajaran baru, jang kasi campor deng orang Farisi dong pung ajaran lama.]

<sup>39</sup> Orang yang su parná minum aer anggor yang lama, sonde suka minum yang baru. Te dia tau bilang, ‘Anggor yang su tasimpan lama tu, yang paling enak na!’”

## 6

*Orang karistik sang Tuhan Yesus dong so'al*

---

§ 5:37-38: Tulisan bahasa Yunani asli bilang, “Jang isi aer anggor yang baru pi dalam tas kulit yang lama, ko jang sampe dia pica ko tarobe.”

*hari barenti karjá*

(Mateos 12:1-8; Markus 2:23-28)

**1** Satu kali, pas deng orang Yahudi dong pung hari barenti karjá, Yesus deng Dia pung ana bua dong ada jalan iko orang pung kabón. Ju Dia pung ana bua dong koru ame padi-gandum pung buler yang ada di dong pung muka idong. Ais dong ma'isi ko makan.<sup>◊</sup>

**2** Di situ, ada barapa orang dari partei agama Farisi yang pegang karás dong pung adat Yahudi. Lia Yesus pung ana bua dong bekin bagitu, ju dong togor sang Dia bilang, “Akurang ko Lu pung ana bua dong langgar kotong pung atoran agama? Dong ada karjá pas deng hari barenti karjá! Lia tu! Dong ada koru padi-gandum. Sonde bole bagitu!”

**3-4** Ma Yesus balas bilang, “Karmana, ó? Bosong sonde inga ba'i Daud pung carita tu? Ba'i Daud deng dia pung ana bua dong pung parú su karoncong tagal lapar mau mati. Ju dong maso pi dalam Tuhan Allah pung Tenda Sambayang, ko ame itu roti yang kapala agama dong su kasi sang Tuhan, ko dong makan. Padahal cuma kapala agama dong sa yang bole makan itu roti. Orang laen sonde bole. Ais ba'i Daud dong makan, ma sonde ada orang kasi sala sang dong. Bosong tingka ke sonde tau baca Tuhan Allah pung Tulisan Barisi sa!<sup>◊</sup>

**5** Pasang talinga ko dengar bae-bae! Beta ni, Manusia Tulen. Beta ada pung hak ko putus

---

<sup>◊</sup> **6:1:** Carita Ulang so'al Jalan Idop 23:25    <sup>◊</sup> **6:3-4:** 1 Samuel 21:1-6; Kapala Agama dong pung Atoran 24:9

bilang, orang bole bekin apa pas deng hari barenti karjá.”

*Tuhan Yesus bekin bae satu orang yang tangan mati sablá*

*(Mateos 12:9-14; Markus 3:1-6)*

<sup>6</sup> Satu hari, pas deng hari barenti karjá yang laen ju, Yesus pi ajar di ruma sambayang. Di situ, ada satu laki-laki yang dia pung tangan mati sablá.

<sup>7</sup> Di situ, ju ada barapa guru agama deng orang dari partei agama Farisi yang ada cari salák ko mau ga'e kasi jato sang Yesus. Ais dong ada tunggu-tunggu kalo Dia mau bekin bae itu orang yang tangan mati sablá, pas deng hari barenti karjá. Deng bagitu, dong bisa tudu sang Dia di muka-muka.

<sup>8</sup> Ma Yesus tau parsís dong pung maksud. Andia ko Dia pange itu orang tangan mati sablá bilang, “Bu, é! Mari badiri di teng-tenga sini doo!” Ju dia pi badiri memang.

<sup>9</sup> Ais Yesus tanya sang itu orang dong bilang, “Coba Beta tanya sang bosong doo. Iko kotong pung atoran agama, kotong bole bekin apa sa, pas deng hari barenti karjá? Kotong bekin bae ko, bekin jahat? Kotong kasi salamat orang ko, bekin ancor dia pung idop?”

<sup>10</sup> Tarús Yesus lia kuliling sang dong, ju Dia omong deng itu orang yang tangan mati sablá tu bilang, “Sorong datang lu pung tangan!” Ais dia sorong, ju dia pung tangan bae memang.

<sup>11</sup> Lia bagitu, ju Yesus pung musu-musu dong maruak. Ais dong mulai ator siasat bilang,

“Botong musti cari jalan laen lai, ko mau kasi jato sang Dia!”

*Tuhan Yesus pili ame Dia pung ana bua dua blas orang*

(*Mateos 10:1-4; Markus 3:13-19*)

<sup>12</sup> Sonde lama lai, ju Yesus pi satu gunung ko sambayang. Ais Dia sambayang di situ satu malam anteru.

<sup>13</sup> Dia pung beso papagi, ju Dia pange ame Dia pung ana bua dong. Ais dari dong samua, Dia pili ame dua blas orang ko jadi Dia pung utusan. Orang yang Dia pili tu, andia:

<sup>14</sup> Simon (yang biasa Yesus pange ‘Petrus’), Anderias (Simon pung adi),

Yakobis,

Yohanis (Yakobis pung adi),

Filipus,

Bartolomeos,

<sup>15</sup> Mateos,

Tomas,

Yakobis (Alpius pung ana),

Simon (yang iko partei politik Selot),\*

<sup>16</sup> Yudas (Yakobis pung ana), deng

Yudas Iskariot (yang nanti jual buang sang Yesus).

*Tuhan Yesus bekin bae banya orang*

(*Mateos 4:23-25*)

<sup>17</sup> Waktu turun dari gunung tu, Yesus deng Dia pung ana bua dong badiri di tana rata. Di situ ju, ada orang banya bakumpul. Dong tu, datang

\* **6:15:** Partei Selot ni, ada cari jalan ko dong mardeka dari Roma pung pamarenta. Dong ju kasi nama ini partei bilang, ‘Patriot’.

dari propinsi Yudea, dari kota Yerusalem, dari Tirus deng Sidon, andia dua kota di pinggir laut.

<sup>18</sup> Dong datang ko mau dengar sang Yesus, deng ada yang mau minta Dia bekin bae orang saki. Ju Dia bekin bae sang dong. Dia ju bekin bae orang yang takaná setan, deng usir setan kaluar dari itu orang dong.

<sup>19</sup> Samua orang mau sonto ame sang Dia, te kalo dong sonto kaná, na, ada kuasa kaluar dari Dia yang bekin bae sang dong.

*Orang yang dapa ontong, deng orang yang dapa calaka*

(Mateos 5:1-12)

<sup>20</sup> Ais Yesus bale mangada pi Dia pung ana bua dong, ju ajar bilang,  
“Orang kasian dong!

Bosong ontong,  
tagal Tuhan Allah sandiri bosong pung  
Raja yang bae.

<sup>21</sup> Orang lapar dong!

Bosong ontong,  
tagal Tuhan yang nanti bekin bosong  
jadi kinyang.

Orang yang manangis deng hati susa dong!

Bosong ontong,  
tagal bosong nanti hati babunga deng  
katawa sanáng.

<sup>22-23</sup> Orang yang kaná susa tagal iko sang Beta,  
Manusia Tulen ni!

Bosong ontong,  
tagal Tuhan nanti balas sang bosong di  
sorga.

Biar orang binci sang bosong,

ko, bekin rusak bosong pung nama bae,  
 ko, inji-inja sang bosong,  
 ko, usir kasi iskarobis sang bosong sama  
     ke orang jahat,  
 bosong ontong,  
     tagal Tuhan nanti inga sang bosong di  
         sorga.<sup>☆</sup>

Jadi, kalo orang bekin susa sang bosong bagitu,  
 na, bekin bosong pung hati babunga sa! Deng  
 balompa sanáng! Sonde usa heran, tagal itu  
 orang yang bekin susa sang bosong sakarang ni,  
 dong pung nene-moyang sandiri yang bekin susa  
 sang Tuhan Allah pung jubir dolu-dolu dong.

Jadi, kalo bosong dapa susa macam bagitu,  
     bekin bosong pung hati babunga sa,  
     tagal Tuhan nanti balas sang bosong  
         bam-banya di sorga!<sup>☆</sup>

<sup>24</sup> Ma orang kaya dong!

Bosong calaka,  
     tagal bosong pung idop sanáng, cuma  
         sampe di sini sa.

<sup>25</sup> Orang kinyang dong!

Bosong calaka,  
     tagal musim lapar yang hebat nae kaná  
         sang bosong.

Orang kiki-kaka sambarang dong!

Bosong calaka,  
     tagal sangsara datang bekin bosong  
         manangis makarereu pung.

<sup>26</sup> Orang gila hormat dong!

---

<sup>☆</sup> **6:22-23:** 1 Petrus 4:14    <sup>☆</sup> **6:22-23:** 2 Sajara Isra'el deng  
 Yahuda 36:16; Utusan dong pung Carita 7:52

Bosong calaka,  
tagal dolu bosong pung nene-moyang dong,  
ju puji-puji sang jubir tukang omong  
kosong dong!"

*Bosong musti sayang bosong pung musu dong  
(Mateos 5:38-48, 7:12a)*

<sup>27</sup> Ju Yesus sambung bilang, "Pasang talinga ko dengar bae-bae! Lu musti sayang lu pung musu dong, deng bekin hal bae kasi orang yang binci sang lu.

<sup>28</sup> Sambayang ko minta Tuhan Allah ko bekin hal bae kasi orang yang kutuk sang lu. Deng minta Dia bekin hal bae kasi orang yang bekin-bekin sang lu.

<sup>29</sup> Kalo ada orang yang tampeleng lu pung pipi sablá, na, kasi loos ko dia tampeleng tamba lai lu pung pipi sablá. Kalo ada yang rampas ame lu pung baju panas, na, kasi tamba lai lu pung baju sang dia.

<sup>30</sup> Kalo ada orang minta lu pung barang satu, na, kasi pi sa. Deng kalo ada yang angka bawa lu pung barang satu, tengah pi ko dia soa sa. Jang pi minta pulang lai!

<sup>31</sup> Lu musti bekin sang orang laen dong, parsís ke lu mau dong bekin bagitu sang lu.◊

<sup>32</sup> Lu suka kasi tunju sayang sang lu pung orang sandiri dong. Itu bae. Ma dia pung hebat, apa? Te orang jahat dong ju sayang dong pung orang sandiri!

<sup>33</sup> Kalo lu cuma bekin bae sang orang yang bekin bae sang lu, dia pung hebat di mana? Te

---

◊ **6:31:** Mateos 7:12

orang jahat dong ju ada maen babalas bekin bae bagitu.

<sup>34</sup> Kalo lu cuma kasi pinjam doi sang orang yang bisa bayar kambali, na, dia pung hebat apa? Te orang jahat dong ju tau kasi pinjam doi sang orang laen, asal beso-lusa dong tarima kambali anteru.

<sup>35</sup> Ma yang hebat tu, andia bagini: sayang lu pung musu dong! Deng bekin hal bae kasi sang dong. Apa yang dong parlú, na, kasi pinjam sa. Sonde usa pikir bilang, dong bisa kasi kambali, ko sonde. Deng bagitu, Tuhan Allah nanti balas sang lu. Deng lu jadi Tuhan Allah yang Paling Tinggi pung ana. Tagal lu idop sama ke lu pung Bapa yang suka bekin hal bae kasi orang jahat. Dia ju bekin hal bae kasi orang yang sonde tau minta tarima kasi.

<sup>36</sup> Jadi lu musti kasi tunju rasa kasian sang orang, sama ke lu pung Bapa di sorga ju kasi tunju rasa kasian sang lu.”

*Jang maen karitik sambarang  
(Mateos 7:1-5)*

<sup>37</sup> Yesus ajar tarús bilang, “Jang nilei orang, ko biar orang jang nilei bale sang lu. Jang karitik orang, te nanti orang dong karitik bale sang lu. Lupa buang orang pung sala, ko biar dong ju lupa buang lu pung sala.

<sup>38</sup> Kalo lu kasi orang apa yang dong parlú, nanti lu tarima bale. Te nanti Tuhan ator ko lu tarima bale ponu-ponu. Itu sama ke orang ada po'a kacang bam-banya dalam balék ukur, ais ro'o-ro'o sang dia, tendes kasi turun sang dia, ais isi lai sampe konde ju tapo'a. Yang lu tarima

tu, macam ke bagitu. Kalo lu kasi sadiki, lu ju tarima bale sadiki. Ma kalo lu kasi banya, lu ju tarima bale bam-banya.”

<sup>39</sup> Yesus ju ajar pake umpama. Dia carita bilang, “Orang buta sonde mungkin kasi tunju jalan kasi orang buta yang laen. Te nanti dong dua rame-rame jato maso pi dalam lobang!\*

<sup>40</sup> Ana murid sonde mungkin lebe hebat dari dia pung guru! Ma kalo dia iko bae-bae dia pung guru pung ajaran, dia bisa jadi sama ke dia pung guru.\*

<sup>41</sup> Lu suka tanda bae-bae orang pung sala kici ana sa. Ma lu pung sala yang bésar, lu anggap ke sonde ada sa. Itu sama ke lu lia abu satu titik di orang pung mata. Padahal ada balok bésar pele lu pung mata, ma lu sonde rasa!

<sup>42</sup> Karmana ko lu barani omong bilang, ‘Konco! Mari ko beta tolong lap kasi kaluar itu abu dari lu pung mata biji dolo.’ Padahal lu sandiri sonde bisa lia apa-apa, te ada balok pele lu pung mata na! Woe! Dasar lu tu, orang muka-balakang batúl! Tolong doo! Angka buang itu balok dari lu pung mata sandiri dolo. Baru lu bisa lia, ko tolong lap buang abu sapo'ong ana dari lu pung kawan pung mata.”

*Orang pung asli kantara dari dia pung bekin  
(Mateos 7:16-20, 12:33-35)*

<sup>43</sup> Yesus tamba lai satu umpama bilang, “Sonde mungkin pohon yang bae, kasi kaluar bua yang sonde bae. Deng sonde mungkin pohon yang sonde bae, kasi kaluar bua yang bae.

---

\* <sup>6:39:</sup> Mateos 15:14    \* <sup>6:40:</sup> Mateos 10:24-25; Yohanis 13:16, 15:20

**44** Orang bisa tanda, kalo satu pohon tu, bae ko sonde, andia dari itu pohon pung bua dong. Samua orang tau bilang, sonde mungkin orang ketu ame bua jambu, ko bua anggor dari pohon baduri.<sup>†</sup> <sup>✡</sup>

**45** Bagitu ju orang yang hati barisi, bisa bekin hal-hal yang bae. Ma orang yang hati kamomos bekin hal-hal jahat. Te dari orang pung omong, kasi tunju dia pung asli.”<sup>✡</sup>

*Orang pintar deng orang bodo bangun ruma  
(Mateos 7:24-27)*

**46** Ais Yesus sambung lai bilang, “Bosong maen pange tarús sang Beta bilang, ‘Bos’. Ma akurang ko bosong sonde mau iko Beta pung omong?

**47** Orang yang datang dengar sang Beta, ais bekin iko Beta pung omong, dia tu, sama ke

**48** orang yang mau kasi badiri ruma yang kuat. Dia gali bae-bae lobang fanderen di tana isi dolo, sampe dapa kaná batu isi. Ais dia bekin fanderen pas di atas itu batu, baru dia bangun ruma. Kalo banjer datang, na, itu ruma sonde tagoyang, tagal dia pung dasar su kuat.

**49** Ma orang yang cuma dengar satenga hati deng sonde iko Beta pung omong, dia tu sama ke orang yang mau bangun ruma deng gampang sa. Dia sonde bekin fanderen, ma dia cuma tempel itu ruma di atas tana isi di kali pung pinggir.

---

<sup>†</sup> **6:44:** Alkitab bahasa Yunani tulis bilang, orang sonde ketu ame σῦκον (*sukon*) dari ἀκανθά (*akantha*). Dong ju sonde dapa σταφυλή (*stafulē*) dari βάτος (*batos*). Dia pung arti bilang, dari satu pohon, kotong dapa bua iko dia pung asli. <sup>✡</sup> **6:44:** Mateos 12:33    <sup>✡</sup> **6:45:** Mateos 12:34

Ais waktu banjer datang, ju sapu bekin ancor itu ruma!"

## 7

*Tuhan Yesus bekin bae tantara Roma pung ana karjá*

(Mateos 8:5-13)

<sup>1</sup> Ajar abis bagitu, ju Yesus bale pi kota Kaper-naum.

<sup>2</sup> Di situ ada satu komandán tantara Roma. Dia ada pung satu ana karjá yang dia parcaya. Itu orang karjá tu, ada jato saki ko amper mati.

<sup>3</sup> Waktu itu komandán dapa dengar so'al Yesus, ju dia kirim barapa orang tua Yahudi ko pi minta Yesus datang bekin bae itu ana karjá.

<sup>4</sup> Dong noki-noki sang Yesus, ko kalo bisa, na, Dia iko datang deng dong pi bekin bae itu orang. Dong buju sang Dia bilang, "Bapa! Ini orang Roma ni, orang bae! Dia tu, pantas Bapa tolong.

<sup>5</sup> Te dia su bangun satu ruma sambayang kasi sang kotong, ko dia sayang sang kotong orang Yahudi na."

<sup>6</sup> Ju Yesus iko deng dong.

Dong balóm sampe di ruma, ma itu komandán su kirim dia pung kawan datang bawa pasán sang Yesus bilang, "Bos sonde usa cape-cape datang lai, te beta sonde pantas tarima Bos di beta pung ruma.

<sup>7-8</sup> Deng beta ju sonde pantas datang mangada sang Bos. Su jalás bilang, Bos ada pung kuasa. Jadi asal Bos omong sa dari situ, pasti beta pung ana karjá bae memang. Beta mangarti ini hal, tagal beta pung bos dong ada kuasa ko parenta

sang beta. Deng beta ju ada pung kuasa ko parenta beta pung tantara dong. Kalo beta kasi parenta beta pung ana bua bilang, ‘Pi sana!’ pasti dia pi. Kalo beta bilang, ‘Datang sini!’ pasti dia datang. Deng kalo beta suru beta pung orang karjá bilang, ‘Karjá ini!’ pasti dia bekin bagitu. Jadi asal Bos omong sa, pasti beta pung ana karjá ni, bae memang.”

<sup>9</sup> Dengar bagitu ju Yesus heran. Dia putar badan ko mangada sang itu orang banya yang ada iko deng Dia. Ju Dia bilang, “Heran, é! Su bagini lama, ma Beta balóm parná katumu satu orang Yahudi ju yang parcaya sama kuat ke ini orang Roma!”

<sup>10</sup> Jadi Yesus cuma jalan sampe di situ sa. Ais komandán pung kawan dong bale pulang. Sampe di itu komandán pung ruma, ju dong dapa lia itu ana karjá su bae memang.

### *Tuhan Yesus kasi idop satu janda pung ana*

<sup>11</sup> Dia pung beso, ju Yesus deng Dia pung ana bua dong barangkat pi satu kampong, nama Nain. Ada banya orang yang jalan sama-sama deng dong.

<sup>12</sup> Waktu dong su mau deka di itu kampong pung pintu maso, ada satu rombongan orang mau kaluar pi kubur orang mati. Yang mati tu, satu mama janda pung ana laki-laki satu biji sa.

<sup>13</sup> Waktu Yesus lia itu mama janda, ju Dia jato kasian. Tarús Dia omong deng itu mama bilang, “Mama! Suda lai, sonde usa manangis!”

<sup>14</sup> Ais Yesus pi deka-deka, ju sonto itu tandu orang mati. Ju itu orang yang dorok itu tandu,

barenti tahan. Tarús Yesus omong sang itu orang mati bilang, "Nyong! Bangun su!"

<sup>15</sup> Ais, itu ana idop kambali, ju dia bangun dudu memang. Tarús dia mulai ba'omong deng orang-orang yang ada badiri kuliling sang dia. Ais Yesus kasi tau sang itu mama bilang, "Mama! Ini mama pung ana."

<sup>16</sup> Samua orang yang ada di situ dong taku mau mati! Ju dong puji-puji sang Tuhan Allah bilang, "Tuhan Allah su utus Dia pung jubir hebat satu kasi kotong!" Ada laen lai yang bilang, "Tuhan Allah su datang di kotong pung teng-tenga, ko kasi tunju Dia pung hati bae!"

<sup>17</sup> Ju itu carita tasiar pi mana-mana di propinsi Yudea, sampe di da'era laen ju.

*Yohanis Tukang Sarani kirim utusan pi Tuhan  
Yesus*  
*(Mateos 11:2-19)*

<sup>18-20</sup> Yohanis Tukang Sarani pung ana bua dong su dengar samua hal yang Yesus bekin. Ais dong pi carita kasi sang Yohanis dalam bui. Ju dia kirim dua orang pi sang Yesus ko tanya sang Dia bilang, "Bapa ni, batúl-batúl Kristus, yang botong ada tunggu-tunggu, ko? Ko, botong musti tunggu sang orang laen lai?"

Ais dong katumu sang Yesus, ju dong tanya bagitu.

<sup>21</sup> Waktu itu utusan ada di situ, Yesus ada bekin bae banya orang dari dong pung panyaki macam-macam. Deng ada usir kaluar setan dari orang yang takaná setan. Deng ada bekin bae orang buta ko dong bisa dapa lia.

**22** Ais Yesus kasi tau sang Yohanis pung ana bua dong bilang, “Bosong pulang pi kasi tau sang bu Anis, samua-samua yang bosong su dengar deng su lia sandiri, sama ke Tuhan Allah pung jubir Yesaya ada tulis bilang,

‘Orang buta, dapa lia.

Orang kaki lumpu, bangun bajalan.

Orang panyaki kusta, jadi barisi.

Orang tuli, dapa dengar.

Orang mati, idop kambali.

Orang kasian, dengar Kabar Bae.’<sup>✳</sup>

**23** Pulang pi kasi tau sang bu Anis bilang, ‘Orang yang sonde malu tarima sang Beta, nanti dong ontong batúl.’”

**24** Waktu Yohanis pung ana bua dong su pulang, ju Yesus omong deng itu orang banya dong so'al Yohanis bilang, “Waktu bosong pi cari Yohanis di tampa sunyi sana tu, bosong pikir mau katumu deng manusia model ke apa? Sonde mungkin bosong pi sana ko katumu orang yang noe-noe, sama ke bambu yang tagoyang-goyang iko angin sa!

**25** Sonde mungkin bosong pi ko lia orang yang pake pakean mahal-mahal, te orang macam bagitu cuma tengah di istana sa!

**26** Jadi bosong pi lia sapa di sana? Bosong pikir bosong pi cari Tuhan Allah pung jubir? Batúl! Ma dia tu, jubir yang paling hebat.

**27** Te Tulisan Barisi ada tulis memang so'al Yohanis bilang,  
‘Dengar! Beta utus Beta pung orang,

---

<sup>✳</sup> **7:22:** Yesaya 35:5-6, 61:1

ko pi buka jalan kasi sang Lu.'<sup>☆</sup>

<sup>28</sup> Di ini dunya, sonde ada satu orang ju, yang lebe hebat dari Yohanis. Ma di Tuhan pung karaja'an, orang yang paling kakorek sa su lebe hebat dari Yohanis."

<sup>29</sup> Orang yang dengar Yesus pung omong tu, dong su mangarti bilang, Tuhan pung jalan tu, jalan idop yang batúl. Tukang tagi bea dong ju bagitu. Tagal dolu Yohanis su sarani deng ajar sang dong.

<sup>30</sup> Ma orang dari parti agama Farisi deng ahli hukum Yahudi dong su sonde mau iko Tuhan Allah pung mau-mau. Andia ko dong sonde minta Yohanis sarani sang dong.<sup>☆</sup>

<sup>31</sup> Ais Yesus tanya bilang, "Beta mau banding orang sakarang ni, deng apa? Manusia macam apa dong ni?

<sup>32</sup> Dong tu, sama ke ana-ana yang ada dudu-dudu di pasar. Dong maen babatarea deng bamangomek bilang,

'Botong tiop suling rame-rame,  
ma bosong sonde manari sanáng.

Ais botong manyanyi lagu mete,  
ma bosong sonde manangis.'

<sup>33</sup> Te Yohanis Tukang Sarani sonde minum anggor, deng suka puasa, na, bosong cap sang dia bilang, 'Dia takaná setan!'

<sup>34</sup> Ma sakarang Beta, Manusia Tulen ni, minum anggor deng makan roti ke biasa. Ju bosong cap sang Beta bilang, 'Dia tu, dasar manusia balalas! Pamabok barát lai! Pi bakawan deng tukang tagi

---

<sup>☆</sup> **7:27:** Maleaki 3:1    <sup>☆</sup> **7:30:** Mateos 21:32; Lukas 3:12

bea dong! Satu partei deng orang tar laku-laku dong! Sonde tau diri lai!’

<sup>35</sup> Ma bosong tanda sa, Be pung omong, é! Orang yang mangarti batúl, dong iko Tuhan pung mau-mau.”

### *Tuhan Yesus makan pesta di Simon pung ruma*

<sup>36</sup> Di itu kota, ada orang Farisi satu, nama Simon. Satu kali, dia undang Jesus dong datang makan di dia pung ruma. Tarima ame itu undangan, ju Jesus dong pi ko mau dudu makan.

<sup>37</sup> Itu waktu, ada satu parampuan nakal yang dapa dengar bilang, Jesus ada mau makan di situ. Ju dia maso datang, deng pegang bawa satu botol minya wangi yang mahal pung.

<sup>38</sup> Dia datang deka sang Jesus dari Dia pung balakang. Ais dia pi tikam lutut di Jesus pung kaki. Tarús dia manangis makarereu sampe dia pung aer mata jato kaná Jesus pung kaki. Dia seka Jesus pung kaki pake dia pung rambu sandiri, deng ciom barmaen Jesus pung kaki. Ais ju dia po'a itu minya wangi pi Jesus pung kaki. <sup>✳</sup>

<sup>39</sup> Simon tu, kanál itu parampuan pung dudu-badiri. Andia ko dia pikir dalam hati bilang, “Ini su jadi bukti Jesus ni, bukan Tuhan Allah pung jubir! Kalo batúl-batúl Tuhan Allah yang kirim sang Dia, su tantu Jesus tau bilang, parampuan yang ada sonto sang Dia tu, parampuan nakal. Tuhan Allah pung jubir sonde macam ke Dia tu, te orang barisi sonde bole badeka deng orang kamomos dong!”

---

<sup>✳</sup> **7:38:** Mateos 26:7; Markus 14:3; Yohanis 12:3

**40** Ma Yesus baca apa yang Simon ada pikir. Ju Dia bilang, "Bu Mon! Bagini, bu. Beta mau kasi tau sang bu satu hal."

Ju Simon manyao bilang, "Neu! Bapa Guru, omong sa."

**41** Tarús Yesus buang bahasa sang dia bilang, "Ada satu orang yang tukang kasi pinjam doi sang orang laen. Dia parná kasi pinjam doi sang dua orang. Yang satu, dia kasi pinjam 500 doi perak; yang laen, cuma 50 sa.

**42** Ma sampe dia pung waktu kasi pulang itu doi, na, dong dua sonde mampu. Ju itu tukang kasi pinjam doi tu, jato kasian sang dong dua. Andia ko dia kasi bebas itu dua orang pung utang. Naa, kalo iko bu Mon pung pikir, dari itu dua orang yang pinjam doi tu, mana yang lebe sayang sang itu tukang kasi pinjam doi?"

**43** Simon sambar langsung bilang, "Tantu yang pung utang paling besar, é!"

Yesus manyao bilang, "Batúl, bu!"

**44** Ju Dia bale mangada sang itu parampuan, ko bilang sang Simon, "Coba bu Mon taro mata di ini parampuan ni. Waktu Beta maso datang di bu pung ruma, bu sonde sadia aer ko cuci Beta pung kaki iko kotong pung adat. Ma ini parampuan kasi basa Beta pung kaki pake dia pung aer mata, abis seka kasi barisi pake dia pung rambu.

**45** Deng tadi waktu sambut sang Beta pi dalam bu Mon pung ruma, bu Mon sonde ciom sang Beta, iko kotong pung biasa. Ma mulai dari Beta maso pi dalam ini ruma, ini parampuan sonde barenti ciom Beta pung kaki.

**46** Bu Mon ju lupa itu adat po'a minya di tamu pung kapala, waktu Beta maso tadi. Ma ini parampuan su po'a minya wangi yang mahal mati pung di Beta pung kaki.

**47** Bu Mon dengar bae-bae doo! Ini parampuan pung sala memang banya. Ma Tuhan su hapus buang samua, tagal dia su kasi tunju dia pung sayang deng rasa sukur bam-banya kasi sang Beta. Ma orang yang rasa diri sonde bekin sala banya, dia ju rasa sonde parlú dapa ampon banya. Andia ko dia sonde tau sayang, deng sonde tau rasa sukur bale kasi sang Tuhan."

**48** Ais ju Yesus omong sang itu parampuan bilang, "Beta su hapus buang lu pung sala dong!"

**49** Orang-orang yang ada dudu makan sama-sama, mulai bakusu-kusu bilang, "Woeh! Dia pikir Dia ni, sapa?! Dia barani kasi ampon orang pung sala, ó! Padahal cuma Tuhan Allah sandiri sa yang ada pung hak ko hapus buang orang pung sala! Cue!"

**50** Ma Yesus kasi tau sang itu parampuan bilang, "Tagal lu su parcaya sang Beta, andia ko Tuhan su kasi salamat sang lu. Pulang su deng dame!"

## 8

### *Parampuan dong yang iko sang Tuhan Yesus*

**1** Sonde lama lai, ju Yesus deng Dia pung ana bua dua blas orang, ada jalan kuliling pi kota-kota deng kampong-kampong di situ. Dia jalan kasi tau orang dong so'al Tuhan Allah pung parenta. Itu jadi kabar bae kasi sang dong.

<sup>2</sup> Dalam itu rombongan ada barapa parampuan yang iko ju. Ini parampuan dong ni, ada yang parná saki macam-macam, deng ada yang parná takaná setan. Ma Yesus su bekin bae sang dong samua. Macam ke Maria dari kampong Magdala. Dolu Yesus parná usir buang tuju setan kaluar dari dia.

<sup>3</sup> Ada ju Susana, deng mama Yohana. Mama Yohana ni, andia bapa Kusa pung bini. Kusa tu, kapala urusan di raja Herodes pung ruma jabatan. Deng masih ada banya parampuan laen yang jalan sama-sama deng Yesus dong. Ini parampuan dong pake dong pung doi sandiri ko tanggong Yesus dong pung ongkos di jalan.◊

*Umpama so'al orang yang tanam bibit di tana macam-macam*  
(Mateos 13:1-9; Markus 4:1-9)

<sup>4</sup> Satu kali, orang dong kaluar datang dari banya kampong ko cari sang Yesus. Waktu orang banya su bakumpul, ju Dia carita kasi sang dong satu umpama bilang,

<sup>5</sup> “Ada satu orang tani pi siram bibit di dia pung kabón. Bibit saparu jato di jalan. Waktu orang jalan di situ, dong injá-inja itu bibit dong. Ais burung datang ko toto bekin abis.

<sup>6</sup> Bibit saparu lai jato di tana babatu. Itu bibit mulai banupuk, ma dong layu buang, tagal kurang aer.

<sup>7</sup> Bibit saparu yang laen jato di tampa baduri. Ma waktu itu bibit dong mulai banupuk, pohon baduri dong gepe kasi mati sang dong.

---

◊ **8:3:** Mateos 27:55-56; Markus 15:40-41; Lukas 23:49

<sup>8</sup> Ma babit yang laen lai, jato kaná di tana isi yang subur. Dong banupuk, ais tumbu jadi bésar sampe babua. Itu babit dong kasi bale hasil saratus kali.”

Carita abis bagitu, ju Yesus konci itu umpama, ais omong deng suara karás bilang, “Bosong yang ada pasang talinga, na, pikir ame bae-bae!”

*Tuhan Yesus kasi tau kanapa Dia suka pake umpama*

*(Mateos 13:10-17; Markus 4:10-12)*

<sup>9</sup> Ais ju Yesus pung ana bua dong tanya itu umpama pung arti.

<sup>10</sup> Dia manyao bilang, “Bagini! Tagal bosong su iko batúl-batúl Tuhan Allah pung mau-mau, andia ko Beta buka taráng-taráng ko bosong tau, karmana Tuhan mau parenta Dia pung orang dong. Ma orang laen dong sonde mau toe Tuhan pung mau-mau. Andia ko Beta ajar sang dong pake umpama sa. Te Tuhan pung jubir su tulis memang so'al ini orang dong bilang,

‘Dong su lia,

ma sonde mau mangarti.

Dong su dengar,

ma sonde mau tau.’”<sup>◇</sup>

*Tuhan Yesus kasi tau itu umpama babit pung arti*

*(Mateos 13:18-23; Markus 4:13-20)*

<sup>11</sup> Ju Yesus kasi tau itu umpama pung arti bilang, “Babit tu, andia Tuhan Allah pung Kata-kata.

<sup>12</sup> Babit yang jato di jalan tu, andia orang yang dengar Tuhan pung Kata-kata, ma ais setan dong

---

<sup>◇</sup> **8:10:** Yesaya 6:9-10

pung bos datang rampas bawa itu Kata-kata dari dong pung hati. Deng bagitu, dong sonde parcaya sang Tuhan, deng sonde dapa salamat.

<sup>13</sup> Bibit yang jato di tana babatu tu, andia orang yang dengar Tuhan pung Kata-kata deng sanáng. Ma dong pung akar sonde maso dalam-dalam. Dong mulai parcaya, ma kalo susa su nae kaná sang dong, dong gampang jato.

<sup>14</sup> Bibit yang jato pi tampa baduri tu, andia orang yang dengar deng tarima Tuhan pung Kata-kata. Ma sonde lama ju, dong lupa buang itu Kata-kata, te dong lebe barepot deng dong pung urusan sandiri sa, deng dong pung harta macam-macam, deng mau idop sanáng-sanáng sa. Andia ko, dong pung parcaya tu, sonde ada pung hasil apa-apa.

<sup>15</sup> Ma bibit yang jato di tana isi yang subur tu, andia orang yang pung hati bae deng hati lurus. Waktu dong dengar Tuhan Allah pung Kata-kata, ju dong taro bae-bae dalam hati. Deng bagitu, dong parcaya tarús, deng bekin banya hal yang bae.”

*Umpama so'al tutu lampu pake pareu tana  
(Markus 4:21-25)*

<sup>16</sup> Ais Yesus omong lai bilang, “Sonde mungkin orang kasi manyala lampu te'oek, ais tutu ame deng pareu tana. Deng sonde ada orang yang taro lampu pi kolong koi. Te kalo bekin bagitu, na, orang sonde bisa dapa lia dia pung taráng lai. Lampu yang ada pung guna, andia yang ada

taro di tampa tinggi, ko biar dia pung cahaya kasi taráng orang yang maso datang.<sup>☆</sup>

<sup>17</sup> Samua yang tasambunyi sakarang, nanti jadi kantara. Deng samua hal yang orang sonde tau sakarang, nanti orang dapa tau.<sup>☆</sup>

<sup>18</sup> Jadi bosong musti pikir ame bae-bae ini hal dong. Orang yang mau cari tau batúl-batúl Tuhan pung mau, dia tamba pintar. Ma orang yang sonde pusing deng Tuhan pung mau, dia tamba bodo.”<sup>☆</sup>

*Tuhan Yesus pung kelu yang batúl dong  
(Mateos 12:46-50; Markus 3:31-35)*

<sup>19</sup> Satu kali, Jesus ada sibuk deng orang banya dong. Ju Dia pung mama deng adi-adi dong datang ko mau katumu deng Dia. Ma dong sonde bisa deka-deka deng Dia, tagal orang talalu banya.

<sup>20</sup> Ju ada orang pi kasi tau sang Jesus bilang, “Bapa! Bapa pung mama deng adi-adi dong ada di luar. Dong ada mau katumu deng Bapa.”

<sup>21</sup> Ju Dia manyao bilang, “Hoo! Ma bagini. Beta pung mama deng sodara yang batúl dong, andia orang yang dengar Tuhan Allah pung Kata-kata, ais bekin iko.”

*Tuhan Yesus bekin tadó angin ribut  
(Mateos 8:23-27; Markus 4:35-41)*

<sup>22</sup> Satu kali, Jesus ajak Dia pung ana bua dong bilang, “Mari kotong nae parahu, ko pi dano pung sablá.” Ju dong nae parahu satu, ko dong mulai star.

---

<sup>☆</sup> **8:16:** Mateos 5:15; Lukas 11:33    <sup>☆</sup> **8:17:** Mateos 10:26; Lukas 12:2    <sup>☆</sup> **8:18:** Mateos 25:29; Markus 4:25; Lukas 19:26

**23** Waktu dong ada balayar, Yesus tidor. Sonde lama ju, angin ribut datang. Galombang puku maso dalam parahu. Ju dong su mau calaka.

**24** Lia bagitu, ju ana bua dong kasi bangun sang Yesus bilang, “Bos! Bos, é! Bangun ko tolong dolo! Kotong su mau mati tanggalám ni!”

Ju Yesus bangun. Ais Dia togor itu angin deng galombang bilang, “Barenti su!” Ju galombang deng angin jadi tadó memang.

**25** Ais Dia togor sang Dia pung ana bua dong bilang, “Akurang ko bosong masi balóm parcaya sang Beta ju?”

Dong taku deng heran. Ju dong batanya satu deng satu bilang, “Awii! Yesus ni, sapa? Karmana ko Dia bisa parenta angin deng galombang, ko dong iko Dia pung mau?”

*Tuhan Yesus usir setan dari orang gila  
(Mateos 8:28-34; Markus 5:1-20)*

**26** Sonde lama ju dong sampe di da'era Gerasa, di dano Galilea pung sablá.\*

**27-29** Di situ ada satu orang yang su lama takaná setan dong. Dia sonde ada pung ruma, deng dia cuma tengah di kuburan sa. Tiap hari dia pal pidatang deng talanjang bulat sa. Te setan dong parenta sang dia tarús-tarús. Orang su ika sang dia ulang kali pake rante deng galáng besi, ma dia kasi putus buang sa. Ais setan dong maen paksa dia ko lari pi tampa sunyi.

---

\* **8:26:** Tulisan bahasa Yunani yang paling bae tulis bilang, ‘Gerasa’. Ada tulisan saparu yang tulis bilang, ‘Gadara’. Deng ada saparu lai yang tulis bilang, ‘Gergesa’.

Waktu Yesus dong turun dari parahu, itu orang gila datang sang Dia. Itu orang batarea, ais buang diri di Yesus pung kaki. Tarús Yesus parenta bilang, “Weh, setan! Kaluar dari ini orang!”

Ju itu orang gila batarea bilang, “Woi! Jang ganggu sang beta! Te beta tau Lu ni, Yesus, Tuhan Allah yang Paling Tinggi pung Ana! Lu jang siksa sang beta!”

<sup>30</sup> Yesus tanya sang dia bilang, “Lu pung nama sapa?”

Ju itu setan manyao bilang, “*Legion*, te botong ada banya, tingka ke tantara ribu-ribu.” Dia bilang bagitu, tagal ada banya setan yang maso tengah di dia pung diri.

<sup>31</sup> Itu setan dong maen minta tarús sang Yesus ko jang suru sang dong pi Lobang Siksa, andia tampa tahan kuasa jahat dong.

<sup>32</sup> Ma deka-deka di situ, ada babi satuh kalompok besar yang ada do'i-do'i tana ko cari makan di gunung pung pinggir. Ju itu setan dong minta sang Yesus bilang, “Suru sa ko botong maso pi dalam itu babi dong!” Ju Yesus ia bae.

<sup>33</sup> Ais, itu setan dong kaluar kasi tengah itu laki-laki, ju dong maso pi dalam itu babi dong. Itu babi dong samua jadi gila, tarús dong lari tabodo-bodo turun dari itu gunung, ko jato pi dalam dano. Ju dong samua mati tanggalám.

<sup>34</sup> Lia bagitu ju, tukang jaga babi dong lari pi kuliling kampong-kampong di situ, ju dong carita samua-samua.

<sup>35</sup> Dengar dong pung carita bagitu, orang banya dong kaluar pi itu tampa. Dong mau lia

sandiri apa yang su jadi. Sampe di situ, ju dong dapa lia itu orang yang takaná setan ada dudu tanáng-tanáng deka Jesus pung kaki. Dia su pake pakean, deng dia su sonde gila lai. Lia bagitu, ju dong samua jadi taku.

<sup>36</sup> Ais orang-orang yang tadi dapa lia itu parkara, kasi tau orang yang baru datang dong karmana ko itu orang gila su jadi bae kambali.

<sup>37</sup> Ju orang Gerasa samua yang tengah di itu da'era dong, minta sang Jesus ko Dia jalan kasi tengah sang dong, te dong samua ada taku mau mati.

Ju Jesus dong pi nae dalam parahu, ko mau pulang kambali pi dano Galilea pung sablá.

<sup>38</sup> Ma itu orang yang tadi takaná setan tu, maen noki-noki sang Jesus bilang, "Bapa! Biar ko beta iko deng Bapa ju!"

Ma Jesus balas bilang,

<sup>39</sup> "Bagini sa! Lebe bae lu pulang pi lu pung kelu dong, ko carita sang dong so'al Tuhan Allah pung bae, yang Dia su bekin kasi sang lu."

Ais, itu orang pi kuliling itu kota, ju dia carita kasi samua orang so'al Jesus bekin bae sang dia.

*Tuhan Jesus kasi idop kambali Yairus pung ana nona, deng bekin bae parampuan yang saki dara loos*

*(Mateos 9:18-26; Markus 5:21-43)*

<sup>40</sup> Ais ju Jesus dong balayar pulang pi dano Galilea pung sablá. Waktu dong turun dari parahu, orang banya dong su tunggu-tunggu sang Dia. Dong datang makarubu ko mau sambut sang Dia.

**41-42** Di situ ju, ada satu orang, nama Yairus. Dia tu, kapala ruma sambayang di itu kota. Dia pung ana, cuma satu biji sa; ana nona, umur dua blas taon. Sakarang itu nona ada saki karás amper mati. Waktu Yairus lia Yesus pung datang, dia pi tikam lutut di Yesus pung muka. Dia minta ko Yesus datang di dia pung ruma, ko tolong sang dia pung ana nona.

Waktu Yesus manyao ia sang dia, ju dong jalan pi Yairus pung ruma. Ma orang banya dong ju tar sampat ko mau iko ju. Andia ko dong jalan baseti-baseti.

**43** Ada satu parampuan ju yang jalan iko deng dong. Dia pung datang bulan sonde tau barenti batúl su dua blas taon. Dia su kasi abis dia pung doi deng harta dong, ko pake bayar kasi dokter dong. Ma sonde ada yang bisa bekin bae sang dia. Dia pung panyaki tu, maen foe tarús.<sup>†</sup>

**44** Ju dia datang deka-deka sang Yesus dari Dia pung balakang. Ais dia sonto ame Yesus pung ujung baju. Waktu dia sonto abis, ju dia pung dara loos barenti memang.

**45** Takuju Yesus badiri, ais Dia tanya bilang, “Sapa yang ada sonto sang Beta ni?”

Ma sonde ada satu orang yang mangaku ju. Ais Petrus bilang, “Bos lai, ju! Ko orang banya ada jalan baseti bagini! Dong su, yang maen batola dari balakang.”

**46** Ma Yesus bilang sang dia, “Sonde! Tadi Beta rasa ada kuasa yang kaluar dari Beta. Jadi

---

<sup>†</sup> **8:43:** Tulisan bahasa Yunani saparu sonde tulis “Dia su kasi abis dia pung doi deng harta dong, ko pake bayar kasi dokter dong.”

Beta tau ada satu orang yang sangaja sonto sang Beta.”

**47** Waktu itu parampuan sadar kalo dia sonde bisa sambunyi, ju dia taku mau mati. Dia gamatar, ko tikam lutut di Yesus. Ais dia carita dia pung akar masala di muka orang dong samua. Tarús dia kasi tau bilang, pas dia sonto sang Yesus, ju dia bae memang.

**48** Ais Yesus omong sang dia bilang, “Susi! Lu su jadi bae, tagal lu parcaya sang Beta. Pulang rumah deng dame su!”

**49** Waktu Yesus masih ba'omong deng itu parampuan, ju Yairus pung orang satu datang kasi tau sang dia bilang, “Aduu, Bapa, é! Bapa pung ana su sonde ada lai! Dia su mati, jadi sonde usa bekin repot lai sang Bapa Guru.”

**50** Ma waktu Yesus dapa dengar itu orang pung laporan, ju Dia bilang sang Yairus, “Bu! Tanáng sa! Jang kawatir! Parcaya sang Tuhan Allah sa. Dia yang kasi salamat sang bu pung ana.”

**51-53** Waktu dong sampe di Yairus pung rumah, orang dong su ponu di situ. Dong ada manangis makarereu. Ju Yesus togor sang dong bilang, “Bosong barenti manangis su! Ini ana sonde mati. Dia cuma tidor sa!”

Ma orang dong cuma katawa bengko mulu sang Dia sa, te dong yang su lia sandiri itu ana pung putus napas. Ais ju Yesus minta itu ana nona pung mama-bapa, Petrus, Yohanis, deng Yakobis, maso pi dalam sama-sama deng Dia. Yang laen dong Dia suru tunggu di luar sa.

<sup>54</sup> Dong maso, ju Yesus pegang itu ana pung tangan, deng pange bilang, "Nona! Bangun suda!"

<sup>55</sup> Takuju sa, itu ana idop kambali, abis dia bangun memang. Ais Yesus suru itu nona pung mama bilang, "Kasi ini ana makan doo!"

<sup>56</sup> Itu nona pung mama-bapa heran mau mati. Ma Yesus kasi inga sang dong, ko jang kasi tasiar itu kabar pi orang dong.

## 9

*Tuhan Yesus utus Dia pung ana bua dua blas orang*

*(Mateos 10:5-15; Markus 6:7-13)*

<sup>1</sup> Satu kali, Yesus kumpul Dia pung ana bua dua blas orang. Ais Dia kasi sang dong kuasa ko bisa usir setan, deng bisa bekin bae orang saki dari dong pung panyaki macam-macam.

<sup>2</sup> Dia utus sang dong, ko jalan kasi tau orang so'al Tuhan Allah pung pegang parenta. Dia ju utus sang dong ko bekin bae orang saki dong di mana-mana.

<sup>3</sup> Ma Dia kasi tau sang dong bilang, "Inga bae-bae! Bosong sonde usa bawa apa-apa di jalan. Jalan deng baju di badan sa. Sonde usa bawa tongkat, ko tas, ko bakál, ko doi. Baju ganti ju, sonde usa bawa!

<sup>4</sup> Kalo bosong maso di satu kampong, ko ada orang yang mau tarima sang bosong, na, pi tengah di dong pung ruma sa. Jang bapili-pili ruma. Tenga di situ tarús, sampe bosong barangkat kasi tengah itu kampong.

<sup>5</sup> Kalo bosong maso pi satu kampong, ais orang di situ sonde mau tarima deng sonde mau dengar sang bosong, na, angka kaki kasi tengah sang dong sa. Kalo bosong kaluar dari situ, bekin iko adat ko kabás buang abu dari bosong pung kaki. Kasi tau sang dong bilang, ‘Bosong sonde mau dengar, na, biar ko bosong pikol tanggong-jawab sandiri!’ ”<sup>☆</sup>

<sup>6</sup> Ais ju itu ana bua dong jalan dari kampong pi kampong. Dong kasi tau orang dong so'al Tuhan Allah pung Kabar Bae. Ais dong ju bekin bae orang saki dong.

*Raja Herodes bingung so'al Tuhan Yesus  
(Mateos 14:1-12; Markus 6:14-29)*

<sup>7</sup> Itu waktuh, carita macam-macam so'al Yesus su sampe di raja Herodes Antipas\* pung talinga. Dengar itu carita dong, ju dia bingung, tagal ada barapa orang yang bilang, “Yesus tu, andia Yohanis Tukang Sarani yang su idop kambali.”

<sup>8</sup> Ada saparu lai yang bilang, “Dia tu, ba'i Elia yang su idop kambali.”

Ada laen lai yang bilang, “Dia tu, satu dari Tuhan pung jubir dolu-dolu yang laen dong.”<sup>☆</sup>

<sup>9</sup> Ma Herodes inga bilang, “Tempo hari, beta su suru potong bekin putus Yohanis pung kapala. Dia su idop kambali, ko apa? Ais ini satu ni, sapa lai?” Ju dia usaha ko mau katumu muka deng Jesus.

---

<sup>☆</sup> **9:5:** Lukas 10:4-11; Utusan dong pung Carita 13:51      \* **9:7:**  
Herodes Antipas tu, Herodes Bésar pung ana. Herodes Bésar tu, yang parenta bunu bekin mati ana-ana kici di Betlehem pas Tuhan Yesus pung lahir. Lia Mateos 2:16-18.      <sup>☆</sup> **9:8:** Mateos 16:14; Markus 8:28; Lukas 9:19

*Tuhan Yesus kasi makan lima ribu orang  
(Mateos 14:13-21; Markus 6:30-44; Yohanis 6:1-14)*

**10** Satu waktu, ana bua yang Yesus su utus tu, dong pulang ko bakumpul ulang lai deng Dia. Dong kasi tau sang Dia samua yang dong su bekin ame. Ais Yesus dong jalan diam-diam pi satu tampa deka deng kampong Betsaida, ko dong pi barenti cape di situ.

**11** Ma orang banya dong dapa ciom Yesus dong mau pi mana, ais dong ba'ekor sang Dia pi. Jadi Yesus tarima bae sang dong, tarús Dia bekin bae orang saki dong samua, deng Dia carita sang dong so'al Tuhan Allah pung pegang parenta.

**12** Waktu su sore, ju Dia pung ana bua dua blas orang dong, bawa usul sang Yesus bilang, "Lebe bae Bapa suru ini orang dong pi kampong-kampong yang badeka di sini, ko bisa cari dong pung makanan sandiri. Deng biar dong pi cari tampa ko dong manumpang tidor. Te tampa sunyi bagini, karmana ko dong bisa dapa makan?"

**13-14** Ma Yesus manyao bilang, "Bagini! Biar bosong sa yang kasi makan sang dong!"

Ma dong protes bilang, "Awe', Bapa lai! Mana bisa bagitu? Ini orang dong ni, ada lima ribu lebe! Itu cuma laki-laki sa, balóm itong parampuan deng ana-ana lai! Ais kotong pung roti cuma lima bua, deng ikan dua ekor sa. Kalo Bapa mau botong yang kasi makan ini orang banya dong, na, karmana ko botong bisa béli makan bam-banya kasi sang dong?!"<sup>✳</sup>

---

<sup>✳</sup> **9:13-14:** Mateos 14:21

Ju Yesus suru sang dong bilang, “Ator ini orang dong dudu bakumpul lima-lima pulu, satu kalompok.”

<sup>15</sup> Ais dong pi ator bagitu.

<sup>16</sup> Waktu dong su dudu, ju Yesus ame itu roti lima bua deng ikan dua ekor. Ais Dia mangada pi langit, ko sambayang minta tarima kasi. Ais Dia kasi pica-pica itu roti deng ikan, ju Dia sorong kasi ana bua dong ko pi bagi-bagi kasi itu orang dong.

<sup>17</sup> Dong samua makan sampe kinyang. Ais dong kumpul ame itu makanan sisa dong, sampe ponu dua blas bakul.

*Petrus mulai sadar bilang, Tuhan Yesus tu, Kristus, andia Orang yang Tuhan Allah su janji memang dari dolu*

(Mateos 16:13-19; Markus 8:27-29)

<sup>18</sup> Satu kali, Yesus ada sandiri ko sambayang di satu tampa. Ais Dia pung ana bua dong bakumpul deng Dia. Sambayang abis, ju Dia tanya sang dong bilang, “Bosong dengar-dengar orang omong bilang, Beta ni, sapa?”

<sup>19</sup> Dong manyao bilang, “Ada yang bilang Bapa ni, Yohanis Tukang Sarani. Laen lai bilang, mangkali Bapa ni, ba'i Elia. Kalo sonde, na, satu dari Tuhan Allah pung jubir dolu-dolu yang su idop kambali.”<sup>✳</sup>

<sup>20</sup> Tarús Yesus tanya lai sang dong bilang, “Kalo iko bosong sandiri, na, bosong anggap Beta ni, sapa?”

---

<sup>✳</sup> **9:19:** Mateos 14:1-2; Markus 6:14-15; Lukas 9:7-8

Ais ju Petrus manyao bilang, “Bapa ni, Kristus, andia Orang yang Tuhan Allah su tunju memang dari dolu!”<sup>⊗</sup>

<sup>21</sup> Ais Yesus larang sang dong ko jang kasi tau sapa-sapa bilang, Dia tu, Kristus.

*Tuhan Yesus omong so' al Dia pung mati, deng Dia pung idop kambali*

(Mateos 16:21-28; Markus 8:31—9:1)

<sup>22</sup> Ais ju Yesus omong tamba bilang, “Beta ni, Manusia Tulen. Beta musti pikol sangsara barát macam-macam. Nanti orang Yahudi pung tua-tua adat, kapala agama pung bos-bos, deng guru agama dong sonde mau tarima bilang, Beta ni, Kristus. Ais nanti dong bunu bekin mati sang Beta. Memang Beta mati, ma dia pung lusa, beta idop kambali!”<sup>†</sup>

<sup>23</sup> Ais ju Dia kasi tau orang banya dong bilang, “Orang yang mau iko sang Beta, na, dia musti batahan iko tarús tiap hari. Dia musti lapás buang dia pung mau-mau sandiri. Dia musti iko tarús, biar orang ada mau bunu sang dia, sama ke orang pikol dia pung kayu palang ko pi di dia pung tampa mati.”<sup>⊗</sup>

<sup>24</sup> Te orang yang sadia mati tagal dia iko sang Beta, nanti dia dapa idop tarús deng Tuhan. Ma orang yang cuma mau idop buat dia pung diri

---

<sup>⊗</sup> **9:20:** Yohanis 6:68-69   <sup>†</sup> **9:22:** Bahasa Yunani pung cara itong hari, andia, ini hari = hari partama; beso = hari kadua; lusa = hari katiga. Jadi Tuhan Yesus pung mati, itong hari partama (Jumat Agung), deng Dia pung idop kambali, itong hari katiga, andia dia pung lusa (Minggu Paska).   <sup>⊗</sup> **9:23:** Mateos 10:38; Lukas 14:27

sandiri sa, nanti dia tapisa buang dari Tuhan Allah.<sup>24</sup>

<sup>25</sup> Kalo orang dapa dunya pung isi samua, ma Tuhan Allah tola buang sang dia, na, dia dapa ontong apa?

<sup>26</sup> Beta ni, Manusia Tulen. Jadi orang yang malu iko sang Beta, deng malu pegang Beta pung ajaran, Beta ju nanti malu mangaku sang dia di Tuhan Allah pung muka waktu Beta kambali dari sorga. Te nanti Beta turun datang deng Bapa pung kuasa yang hebat, sama-sama deng Dia pung ana bua dari sorga.

<sup>27</sup> Beta kasi tau batúl-batúl sang bosong. Ada barapa dari bosong yang ada di sini ni, yang nanti dapa lia sandiri Tuhan pung pegang parenta, ais baru dong bisa mati.”

*Tuhan Yesus jadi laen di atas gunung  
(Mateos 17:1-8; Markus 9:2-8)*

<sup>28</sup> Abis dia pung dalapan hari, ju Yesus ame bawa sang Petrus, Yohanis deng Yakobis pi nae di satu gunung ko mau sambayang.

<sup>29</sup> Waktu Yesus ada sambayang, ju Dia pung rupa ba'oba, deng Dia pung pakean jadi puti mangkilat.

<sup>30</sup> Takuju sa, dua orang muncul datang. Dong dua tu, andia ba'i Musa deng ba'i Elia. Ju dong ada ba'omong deng Yesus.

<sup>31</sup> Dong ju kantara hebat luar biasa. Dong tiga ba'omong so'al Yesus pung mati nanti di Yerusalem.

---

<sup>24</sup> **9:24:** Mateos 10:39; Lukas 17:33; Yohanis 12:25

<sup>32</sup> Itu waktu, Petrus deng dia pung kawan dua orang manganto sonde bisa-bisa, sampe dong tatidor. Waktu dong bangun, ju dong dapa lia Yesus ada badiri deng dua orang. Dong ju lia Yesus bacaya taráng.

<sup>33</sup> Waktu ba'i Musa deng ba'i Elia su mau kasi tengah sang Yesus, ju Petrus bingung, sonde tau dia mau bekin apa. Ju dia omong sambarang sa bilang, "Bos! Botong rasa enak di sini, é! Jadi lebe bae botong kasi bangun tiga laak. Satu kasi sang Bos, satu kasi ba'i Musa, deng satu lai kasi ba'i Elia."

<sup>34</sup> Ma waktu dia masih ba'omong bagitu, ada satu awan turun datang ko tutu sang dong. Ais Petrus dong jadi taku.

<sup>35</sup> Ju dong dapa dengar suara dari dalam itu awan bilang,

"Ini, Beta pung Ana yang Beta su pili memang!  
Dia omong, na, dengar bae-bae sang Dia!"<sup>☆</sup>

<sup>36</sup> Omong abis, ju Petrus dong cuma lia Yesus sandiri sa. Dong tiga tutu mulu ko sonde carita kasi sapa-sapa ju, apa yang dong dapa lia tu. Lama-lama baru dong buka mulu ko carita kasi orang laen.

*Tuhan Yesus bekin bae ana yang takaná setan jahat*

*(Mateos 17:14-18; Markus 9:14-27)*

<sup>37</sup> Dia pung beso, waktu Yesus deng Petrus dong turun dari itu gunung, orang banyak dong datang katemu sang Yesus.

---

<sup>☆</sup> **9:35:** 2 Petrus 1:17-18; Yesaya 42:1; Mateos 3:17, 12:18; Markus 1:11; Lukas 3:22

**38** Ju ada satu orang batarea sang Dia bilang, “Bapa Guru, é! Tolong lia beta pung ana laki-laki satu biji doo!

**39** Te ada setan yang maen pegang ame sang dia, ko bekin dia batarea takuju, deng ro'o-ro'o sang dia sampe busafafudik kaluar dari dia pung mulu. Itu setan ju maen pok-pak pok-pak sang dia, deng maen ganggu sang dia tarús-tarús.

**40** Beta su minta tolong sang Bapa pung ana bua ko usir kasi kaluar itu setan, ma dong sonde ontong sang dia!”

**41** Dengar bagitu, ju Yesus masparak sang dong samua bilang, “Weh! Bosong sonde parcaya kalo Tuhan bisa bekin bae orang, ko? Bosong tu, dasar manusia yang sonde tau idop iko jalan lurus! Beta musti sama-sama deng bosong barapa lama, baru bosong mau parcaya sang Beta? Beta musti sabar sang bosong sampe kapan lai!?”

Ais Dia bale omong deng itu bapa bilang, “Bawa lu pung ana datang sini su!”

**42** Waktu dong bawa itu ana pi Yesus, ju itu setan banting itu ana di tana, ro'o-ro'o barmaen sang dia. Ma Yesus parenta itu setan ko kaluar kasi tengah itu ana, ju itu ana bae memang. Ais Yesus sarakan itu ana pi dia pung bapa.

**43a** Orang yang dapa lia Tuhan pung kuasa yang hebat tu, dong samua jadi taheran-heran.

*Tuhan Yesus omong ulang lai so'al Dia pung mati*

*(Mateos 17:22-23; Markus 9:30-32)*

**43b** Waktu orang dong samua masi ba'omong so'al tanda-tanda heran yang Jesus ada bekin, Dia kasi tau sang Dia pung ana bua dong bilang,

**44** "Bosong tanda bae-bae Beta pung omong ni! Sonde lama lai, te orang mau jual buang sang Beta, Manusia Tulen ni. Ais dong sarakan Beta pi orang luar dong."

**45** Ma Dia pung ana bua dong tabingung-bingung. Dong sonde mangarti dia pung mak-sud. Dong ju taku tanya dia pung arti apa.

*Sapa yang jadi orang nomer satu*

(Mateos 18:1-5; Markus 9:33-37)

**46** Satu kali, Jesus pung ana bua dong mulai bakanjar so'al sapa dari dong yang nanti jadi orang nomer satu.<sup>☆</sup>

**47** Ma Jesus tau apa yang dong bakanjar. Ju Dia pange satu ana kici, ais kasi badiri sang itu ana di Dia pung sablá.

**48** Ais Dia kasi tau sang dong bilang, "Dengar bae-bae! Orang yang iko Beta ko layani orang kici sama ke ini ana, dia pung arti, itu orang ju ada layani sang Beta. Deng dia ju ada layani sang Beta pung Bapa di sorga yang utus sang Beta datang di ini dunya. Ada banya orang yang suka pandang enteng sang dong. Macam ke orang kesian, orang susa, orang tar bae, orang sial, deng orang kici dong. Naa! Orang yang suka layani orang macam bagitu yang Tuhan Allah anggap paling hebat."<sup>☆</sup>

---

<sup>☆</sup> **9:46:** Lukas 22:24    <sup>☆</sup> **9:48:** Mateos 10:40; Lukas 10:16;  
Yohanis 13:20

*Orang yang sonde malawan, dia tu kotong pung kawan  
(Markus 9:38-40)*

<sup>49</sup> Ais Yohanis kasi tau sang Yesus bilang, “Bapa! Satu kali, botong lia satu orang usir kaluar setan deng subu Bapa pung nama. Jadi botong larang sang dia ko jang subu-subu pake Bapa pung nama, tagal dia tu bukan kotong pung orang.”

<sup>50</sup> Ma Yesus manyao bilang, “Sonde usa! Te orang yang sonde malawan sang kotong, dia pung arti, dia tu kotong pung kawan sandiri.”

*Orang di satu kampong di Samaria sonde mau tarima sang Tuhan Yesus*

<sup>51</sup> Yesus tau bilang, Dia pung hari nae pi sorga su deka-deka. Ais Dia putus ko barangkat pi kota Yerusalem.

<sup>52</sup> Dia utus orang ko jalan kamuka dari dong, ko biar dong bisa ator makan-minum. Ju dong maso pi satu kampong di propinsi Samaria ko mau urus tampa manumpang.

<sup>53</sup> Ma itu orang Samaria dong sonde mau tarima sang Yesus dong, tagal Dia ada mau jalan pi sémba sang Tuhan Allah di kota Yerusalem.<sup>‡</sup>

<sup>54</sup> Waktu Yakobis deng Yohanis dapa dengar itu orang Samaria dong pung bekin-bekin, ju dong babuju sang Yesus bilang, “Bos! Karmana kalo kotong minta Tuhan Allah kirim api datang dari langit ko bakar abis sang dong?”<sup>§</sup>

---

<sup>‡ 9:53:</sup> Orang Samaria pung tampa sémba sang Tuhan ada di gunung Gerisim di dong pung da'era. Dong su lama baparkara deng orang Yahudi yang sémba sang Tuhan Allah di kota Yerusalem.   <sup>§ 9:54:</sup> 2 Raja-raja dong 1:9-16

**55** Ma Yesus mangada sang dong dua, ju togor bilang, “Sonde usa pikir bagitu.”

**56** Ais dong jalan tarús pi kampong laen.

*Sarat iko sang Tuhan Yesus  
(Mateos 8:19-22)*

**57** Waktu dong ada jalan, ada satu orang omong sang Yesus bilang, “Bapa! Bapa pi mana sa, na, beta mau iko tarús deng Bapa!”

**58** Ma Yesus manyao bilang, “Bae, ju! Ma inga bagini. Samua orang deng binatang ada dong pung tampa tengah sandiri. Anjing utan kambali pi dia pung lobang. Burung kambali pi dia pung sarang. Ma Beta, Manusia Tulen ni, sonde ada pung ruma sandiri ko pulang di situ. Tampa alas kapala, ju sonde ada.”

**59** Satu kali, Yesus pange satu orang laen bilang, “Mari iko sang Beta, ko jadi Beta pung orang.”

Itu orang manyao bilang, “Neu! Ma bagini, Bos. Biar beta pulang ko urus orang tua dong dolo. Kalo beta pung bapa su mati, na, baru beta iko.”

**60** Ma Yesus kasi tau sang dia bilang, “Bagini! Kasi tengah ko orang yang sonde ada pung parcaya sang Tuhan dong, urus dong pung orang mati. Ma bosong yang parcaya sang Tuhan, bosong pung tugas pi jalan kasi tau so'al Tuhan Allah pung pegang parenta.”

**61** Ada satu orang lai bilang, “Bae ju, Bos! Beta mau iko sang Bos tarús. Ma kasi isin ko beta pi ciom bapisa deng beta pung kelu dong dolo, baru beta kambali iko sang Bos.”<sup>◊</sup>

---

<sup>◊</sup> **9:61:** 1 Raja-raja dong 19:20

**62** Ma Yesus kasi tau sang dia bilang, “Bagini! Kalo orang mulai bale tana, ais batasibu deng urusan laen sampe lupa tanam, na, dia pung kabón sonde jadi. Bagitu ju deng orang yang putus mau iko sang Beta, ma maen inga tarús dia pung idop dolo. Orang macam bagitu sonde ada guna jadi orang karjá di Tuhan Allah pung parenta.”

## 10

*Tuhan Yesus utus ana bua tuju pulu dua orang*

**1** Ais itu, Yesus pili ame ana bua laen, 72 orang.\* Ais Dia bagi-bagi sang dong dua-dua orang, ko dong pi lebe dolo dari Dia di tampa-tampa yang nanti Dia mau datang.

**2** Dia utus sang dong bilang, “Ada orang bambanya yang sama ke padi yang su kuning. Tenga tuan kabón kirim dia pung orang karjá ko datang koru sa. Jadi bosong musti sambayang minta Tuhan Allah kirim tamba Dia pung orang karjá ko kumpul ame orang-orang yang mau iko sang Beta. Tagal orang yang mau iko sang Beta tu, banya. Ma orang karjá dong cuma sadiki sa.◊

**3** Sakarang bosong barangkat suda! Beta utus sang bosong ko pi di orang banya dong. Ma inga bagini. Bosong sama ke domba ana yang hati manis, yang pi teng-tenga anjing utan yang jahat dong.◊

\* **10:1:** Tulisan Bahasa Yunani saparu ada tulis bilang, ‘ana bua 72 orang’. Saparu lai bilang, ‘ana bua 70 orang’. Terjemahan moderen dong, banya yang pili ‘72’.

◊ **10:3:** Mateos 9:37-38

**4** Bosong sonde usa bawa doi, ko tas pakean, ko sandal lebe di jalan. Jang buang-buang waktu parcuma deng maen batogor orang di jalan.

**5-8** Kalo bosong maso pi dalam satu kampong, bosong sonde usa pinda-pinda dari satu ruma pi ruma laen. Kalo orang tarima bae sang bosong di satu ruma, na, tengah di situ sa, sampe bosong barangkat dari itu kampong. Kalo bosong maso pi satu ruma, bosong musti minta ko Tuhan Allah kasi berkat sang orang di itu ruma. Kalo tuan ruma di situ tarima bae sang bosong, tantu Tuhan kasi tunju Dia pung hati bae sang itu isi ruma dong. Ma kalo dong sonde mau tarima sang bosong, na, biar ko Tuhan kasi tunju Dia pung hati bae sang bosong sandiri sa. Kalo bosong maso di satu ruma ko, satu kampong ko, makan-minum apa sa yang dong kasi. Tarima deng sanáng hati, te pantas kalo dong kasi bosong bagitu ko ganti bosong pung karingat.<sup>◊</sup>

**9** Bekin bae dong pung orang saki. Deng kasi tau sang dong bilang, ‘Tuhan Allah pung parenta su ada di muka idong!’

**10** Ma ada kampong ju yang dia pung orang dong sonde mau tarima sang bosong. Kalo dong bekin bagitu sang bosong, na, pi badiri di kampong pung jalan ko angka omong bilang,

**11** ‘Dengar bae-bae! Botong su datang bawa Tuhan pung Kata-kata kasi sang bosong, ma bosong sonde toe sadiki ju. Jadi botong sakarang kabás buang ini kampong pung abu dari botong pung kaki, ko jadi tanda bilang, nanti bosong

---

<sup>◊</sup> **10:5-8:** 1 Korintus 9:14; 1 Timotius 5:18

tanggong risiko sandiri! Ma inga bae-bae! Tuhan Allah pung parenta su ada di muka idong!”<sup>☆</sup>

<sup>12</sup> Bosong tau kota Sodom pung jahat, wuang? Beta kasi tau, é! Nanti pas di hari kiamat, Tuhan kasi hukum orang yang tola buang sang bosong tu, jao lebe barát dari orang Sodom dong!”<sup>☆</sup>

*Orang yang sonde mau tarima sang Tuhan  
Yesus*  
(Mateos 11:20-24)

<sup>13</sup> Yesus omong tamba lai bilang, “Bosong yang ada di kampong Korasin<sup>†</sup> deng kampong Betsaida! Awas, é! Calaka kaná sang bosong! Beta su bekin tanda heran macam-macam di bosong pung batang idong, ma bosong sonde mau parcaya sang Tuhan. Padahal bosong ni, orang Yahudi yang mangaku kanál sang Dia. Ma andekata itu tanda-tanda heran yang Beta bekin di bosong pung kampong jadi kaná di kota Tirus deng kota Sidon, tantu bagini lama orang di situ dong su tobat memang, deng su kasi tengah dong pung sala-sala ko bale iko sang Tuhan. Deng dong ju tantu pake pakean duka, deng taro abu di atas kapala ko jadi tanda bilang, dong ada manyasal deng dong pung sala-sala dong. Padahal orang Tirus deng orang Sidon dong ni, bukan orang Yahudi yang mangaku kanál sang Tuhan.<sup>☆</sup>

---

<sup>☆</sup> **10:11:** Mateos 10:7-14; Markus 6:8-11; Lukas 9:3-5; Utusan dong pung Carita 13:51    <sup>☆</sup> **10:12:** Carita Mula-mula 19:24-28; Mateos 10:15, 11:24    <sup>†</sup> **10:13:** Bahasa Indonesia tulis ‘Khorazim’. Yang asli pung, dari bahasa Yunani tulis Χοραζίν ‘Choradzin’.  
<sup>☆</sup> **10:13:** Yesaya 23:1-18; Yeskial 26:1—28:26; Yoel 3:4-8; Amos 1:9-10; Sakaria 9:2-4

**14** Batúl! Bosong lia sa! Nanti kalo Tuhan putus samua orang dong pung parkara, orang Tirus deng orang Sidon pung hukuman masi jao lebe ringan dari bosong pung hukuman.

**15** Bosong orang kampong Kapernaum! Awas! Bosong jang pikir bilang, nanti Tuhan angka nae sang bosong maso pi sorga. Sonde! Nanti Tuhan lempar buang sang bosong maso pi naraka!\*

**16** Inga bae-bae! Te orang yang dengar sang bosong, sama sa deng dengar sang Beta. Deng orang yang sonde mau dengar sang bosong, sama sa deng sonde mau dengar sang Beta. Tamba lai, orang yang sonde mau dengar sang Beta tu, sama sa deng dia sonde mau dengar sang Tuhan Allah, yang su utus sang Beta datang di ini dunya.”\*

### *Tuju pulu dua utusan dong kambali*

**17** Waktu itu 72 orang utusan datang kambali,\* dong pung hati ada babunga-bunga. Ju dong lapor sang Yesus bilang, “Awii! Pung hebat lai! Waktu botong pake Bos pung nama ko usir setan dong, itu setan dong dengar sang botong, ais ju dong kaluar memang! Talalu!”

**18** Ju Yesus manyao sang dong bilang, “Batúl! Waktu bosong bekin bagitu, Beta ada lia Tuhan Allah lempar buang sang setan deng dong pung bos dari langit, sama ke kilat yang kaluar kiri-kanan dari langit!

---

\* **10:15:** Yesaya 14:13-15   \* **10:16:** Mateos 10:40; Markus 9:37; Lukas 9:48; Yohanis 13:20   ‡ **10:17:** Tulisan bahasa Yunani saparu ada tulis bilang, ‘ana bua 72 orang’. Saparu lai bilang, ‘ana bua 70 orang’. Terjemahan moderen dong, banya yang pili ‘72’.

<sup>19</sup> Inga, é! Setan dong pung bos tu, kotong pung musu. Deng dia ada pung kuasa ju! Ma Beta su kasi kuasa sang bosong ko kasi pata dia pung kuasa. Deng andekata bosong ada injá kaná ular babisa, ko, kalajingking, na, bosong sonde kaná apa-apa. Sonde ada yang bisa bekin calaka sang bosong.<sup>◊</sup>

<sup>20</sup> Bosong pung hati babunga, tagal setan dong dengar sang bosong. Bae ju, ma itu hal kici sa! Lebe bae bosong pung hati babunga, tagal Tuhan su tulis ame bosong pung nama ko jadi Dia pung warga yang maso sorga.”

*Tuhan Yesus pung hati babunga  
(Mateos 11:25-27, 13:16-17)*

<sup>21</sup> Itu waktu, Tuhan pung Roh yang Barisi bekin Yesus pung hati babunga. Ais Dia puji Tuhan bilang, “Bapa! Bapa yang jadi Bos Bésar di langit deng bumi. Beta minta tarima kasi bambanya, tagal Bapa tutu ame ini hal dong dari orang yang anggap diri pintar deng yang tinggi hati dong. Ma Bapa buka ini hal samua kasi ana-na kici dong, deng orang yang randá hati dong. Batúl, Bapa! Te itu yang bekin Bapa pung hati sanáng!”

<sup>22</sup> Ais Yesus kasi tau sang orang banya dong bilang, “Dengar ó! Beta pung Bapa di sorga su kasi samua kuasa sang Beta. Yang tau batúl bilang, Beta ni, sapa, andia cuma Bapa sa. Deng yang tau batúl bilang, Bapa tu, sapa, cuma Bapa pung Ana sa, andia Beta. Deng Beta pili orang

---

<sup>◊</sup> **10:19:** Lagu Puji dong 91:13

laen, ko kasi tau sang dong, ko biar dong ju kanál sang Dia.”<sup>23</sup>

<sup>23</sup> Ais Yesus bale mangada sang Dia pung ana bua dong, deng kasi tau sang dong sandiri bilang, “Bosong ontong batúl, tagal bosong su lia Tuhan pung kuasa.

<sup>24</sup> Raja-raja deng jubir dolu-dolu dong rindu mau lia apa yang bosong su dapa lia, ma dong sonde bisa. Dong ju rindu mau dengar apa yang bosong su dapa dengar, ma dong sonde bisa.”

### *Orang Samaria yang hati mas*

<sup>25</sup> Satu kali, ada satu ahli hukum Yahudi badiri ko mau hiki sang Yesus. Dia tanya bilang, “Bapa Guru! Tolong kasi tau doo! Beta musti bekin apa, ko biar beta tau beta bisa dapa idop tarús sama-sama deng Tuhan di sorga?”

<sup>26</sup> Yesus manyao bilang, “Ba'i Musa tulis apa so'al ini hal? Lu pung mangarti karmana sang dia?”

<sup>27</sup> Itu orang kasi tau bilang, “Dia ada tulis bilang:

‘Lu musti sayang sang Tuhan Allah, *lebe* dari samua, te Dia yang hak parenta sang lu.  
Tagal itu, lu musti salalu rindu sang Dia,  
karjá karás ko iko Dia pung mau,  
deng mangarti sang Dia.’

Ju ada tulis bilang, ‘Lu musti sayang lu pung sodara, sama ke lu sayang lu pung diri sandiri.’”<sup>24</sup>

---

<sup>23</sup> **10:22:** Yohanis 3:35, 10:15    <sup>24</sup> **10:27:** Kapala Agama dong pung Atoran 19:18; Carita Ulang so'al Jalan Idop 6:5

<sup>28</sup> Yesus balas bilang, “Batúl! Kalo lu bekin iko bagitu, lu idop deng Tuhan tarús-tarús.”<sup>☆</sup>

<sup>29</sup> Ma itu orang ada mau bekin diri ke orang alim sa. Ais dia tanya sang Yesus bilang, “Ma beta pung ‘sodara’ tu, yang mana?”

<sup>30</sup> Ju Yesus manyao bilang, “Bagini! Beta mau kasi satu umpama. Nanti lu kasi tau, mana yang batúl-batúl ‘sodara’. Dia pung carita bagini: Ada satu orang Yahudi barangkat dari kota Yerusalem, jalan turun pi Yeriko. Ma takuju sa, ada tukang rampok dong datang korfei barmaen sang dia. Dong papoko sang dia, ais rampas ame dia pung doi deng dia pung pakean samua. Tarús dong lempar buang sang dia di pinggir jalan, ais jalan kasi tengah sang dia. Itu orang su amper mau mati sa.

<sup>31</sup> Ma sonde sangka-sangka, te ada satu kapala agama Yahudi yang jalan turun lewat di situ ju. Ma waktu dia dapa lia ada orang luka-luka yang malenggang di pinggir jalan, dia sonde barenti ko tolong sang dia. Dia serong pi sablá ko jalan tarús sa.

<sup>32</sup> Sonde lama, ju ada satu orang laen yang lewat di situ. Dia tu, orang dari suku Lewi yang biasa bantu di Tuhan Allah pung Ruma Sambayang Pusat. Waktu dia dapa lia itu orang talempar di pinggir jalan, dia pi lia deka-deka sa, ma sonde tolong sang dia. Tarús dia serong pi sablá ko jalan tarús.

<sup>33-34</sup> Sonde lama lai, ada satu orang dari da'era Samaria lewat di situ deng dia pung binatang

---

<sup>☆</sup> **10:28:** Mateos 22:35-40; Markus 12:28-34; Kapala Agama dong pung Atoran 18:5

keledai. Kotong samua tau bilang, orang Yahudi biasa lia deng sablá mata sang orang Samaria dong. Naa, waktu ini orang Samaria lia itu orang yang kaná rampok tu, ju dia jato kasian sang dia. Dia datang deka-deka ko mau tolong itu orang. Dia po'a anggor ko kasi barisi itu orang pung luka-luka dong, ais dia taro minya pi. Tarús farbán bae-bae sang dia, ju angka kasi nae pi atas dia pung keledai. Ais dia bawa itu orang pi sampe di kota. Tarús dia kasi manumpang itu orang di losmen, deng urus bae-bae sang dia. <sup>☆</sup>

<sup>35</sup> Dia pung beso, itu orang Samaria pi kasi panjar doi, dua perak<sup>§</sup> di tuan losmen, deng kasi tau bilang, ‘Pake ini doi ko urus bae-bae itu orang saki sampe bae. Kalo sonde cukup, na, tolong pake tahan bapa pung doi doo. Waktu beta bale lai, nanti beta ganti bapa pung doi samua.’”

<sup>36</sup> Yesus pung umpama sampe di situ sa. Ais Dia tanya sang itu ahli hukum bilang, “Iko lu, mana yang batúl-batúl ‘sodara,’ buat itu orang yang kaná rampok tadi tu?”

<sup>37</sup> Itu orang manyao bilang, “Tantu sa, itu orang yang jato kasian sang dia.”

Yesus bilang, “Batúl, bu! Pi su, ko bekin iko.”

### *Tuhan Yesus, Ma'a deng Mia*

<sup>38-40</sup> Ais itu, Yesus deng Dia pung ana bua dong jalan tarús pi Yerusalem. Ju dong singga di satu kampong. Di situ ada dua basodara, nama Marta deng Maria. Marta minta ko Yesus dong

---

<sup>☆</sup> **10:33-34:** 2 Sajara Isra'el deng Yahuda 28:15    <sup>§</sup> **10:35:** Bahasa Yunani tulis bilang, “dua denari”.

manumpang di dia pung ruma. Ais dong tenga tahan di situ.

Waktu Yesus dudu ko ajar orang dong, Marta batasibu urus makan-minum di dapur. Ma dia pung adi Maria, ada dudu deka-deka di Yesus pung kaki, ko dengar Dia pung omong. Sonde lama, ju Marta maso datang ko mangomel di Yesus bilang, “Bapa, é! Karmana, ó! Beta ada batasibu satenga mati urus makan-minum, baru beta pung adi dudu ena-ena di sini sa. Tolong doo! Suru sang dia bantu beta sadiki di dapur!”<sup>41</sup>

<sup>41</sup> Ma Tuhan Yesus manyao bilang, “Ma'a. Lu ni, batasibu deng pikir macam-macam.

<sup>42</sup> Bae, ma ada satu hal yang lebe panting sakarang. Deng dia dudu dengar Beta pung Kata-kata, Mia su pili yang paling bae. Orang sonde bisa rampas buang itu Kata-kata dari dia.”

## 11

*“Ajar sang botong sambayang”*  
*(Mateos 6:9-13, 7:7-11)*

<sup>1</sup> Satu kali, Yesus pi sambayang. Sambayang abis, ju Dia pung ana bua satu datang ko minta bilang, “Bapa! Yohanis Tukang Sarani su ajar dia pung ana bua dong, ko dong tau sambayang. Botong minta ko Bapa ju ajar sang botong sambayang dolo!”

<sup>2</sup> Ais Yesus bilang, “Bae ju! Sambayang pake conto bagini:

Bapa! Bapa pung nama paling barisi.

---

<sup>41</sup> **10:38-40:** Yohanis 11:1

Biar samua orang angka nae tinggi-tinggi Bapa  
pung nama yang hebat.

Biar Bapa jadi Raja kasi samua orang.

<sup>3</sup> Bapa tolong kasi botong makanan yang cukup  
tiap hari.

<sup>4</sup> Botong minta Bapa lupa buang botong pung  
sala-sala dong,

sama ke botong ju lupa buang orang pung  
sala yang dong bekin-bekin sang botong.

Bapa jaga ko botong sonde bekin jahat.”

<sup>5-6</sup> Ais Yesus ajar tamba sang dong so'al sambayang. Dia pake umpama bilang, “Andekata tengah malam, ada kawan datang dari jao, ko manumpang di lu pung ruma. Ma lu sonde ada apa-apa ko kasi dia makan. Ais lu pi di lu pung kawan laen pung ruma, ko noki-noki dari luar bilang, ‘Bu, é! Kasi tahan beta roti tiga balok doo! Te beta ada tamu di ruma, ma botong ada karíng-karíng sa, ni! Bu, tolong doo! Tiga balok sa! Nanti be ganti!’

<sup>7</sup> Kira-kira nanti lu pung kawan manyao bale bilang, ‘Ko bu lai, ju! Orang ada tidor sonu, ma bu datang ganggu lai! Pintu dong su takonci mati ni! Ana-ana dong su tidor sonu. Jang mara, é! Ma laen kali sa, bu!’

<sup>8</sup> Biar bagitu ju, ma inga bae-bae. Biar itu orang sonde bangun ko kasi sang lu tagal lu dia pung kawan, ma kalo lu maen noki-noki tarús, tantu dia bangun ko kasi.

<sup>9</sup> Bagitu ju, deng sambayang.  
Minta tarús sang Tuhan;  
nanti Dia kasi.  
Cari tarús;

nanti Dia kasi tunju jalan.  
 Eki tarús;  
 nanti Dia buka pintu.

<sup>10</sup> Te samua orang yang minta tarús sang Tuhan Allah, nanti tarima. Yang cari tarús, nanti dapa. Yang eki tarús, nanti Dia buka pintu.

<sup>11</sup> Bosong pikir coba! Dapa di mana, ada bapa, yang kalo dia pung ana minta ikan, na, dia kasi ular?

<sup>12</sup> Ko, kalo ana minta talór, dia kasi kalajingking? Sonde mungkin, to?

<sup>13</sup> Manusia pung dasar memang jahat. Ma bosong pung Bapa di sorga tu, Dia pung dasar bae batúl. Jadi, kalo manusia yang jahat macam bosong sa, suka kasi barang yang bae sang bosong pung ana-ana dong, apalai Bapa! Dia bukan cuma kasi apa yang bosong parlú sa, ma lebe dari itu, Dia kasi Dia pung Roh yang Barisi sang orang yang minta sang Dia.”

*Tuhan Yesus sonde pake kuasa dari setan dong pung bos*

(Mateos 12:22-30; Markus 3:20-27)

<sup>14</sup> Satu kali, Yesus usir kasi kaluar setan dari orang bisu satu. Ais, itu orang mulai omong kambali. Orang dong di situ taheran-heran.

<sup>15</sup> Ma ada ju yang bilang, “Memang sa, Dia bisa usir setan! Ko Dia dapa kuasa dari setan dong pung bos, andia Balsebul na.”<sup>†</sup>

<sup>16</sup> Orang laen dong mau coba sang Jesus. Ais dong minta ko Dia bekin satu tanda heran lai

---

<sup>†</sup> **11:15:** Mateos 9:34, 10:25

ko kasi tunju sang dong bilang, Dia pung kuasa memang dari Tuhan.<sup>☆</sup>

**17** Ma Yesus tau memang dong pung otak kotor. Ju Dia omong bilang, "Kalo dalam satu negara, dia pung rakyat dong bamusu, tantu itu negara jadi ancor-ancor. Bagitu ju, kalo dalam satu ruma, dia pung isi ruma dong ada maen idop bakanjar satu deng laen, na, tantu itu ruma tangga su sonde jadi doi lai!"

**18** Jadi, kalo setan dong maen bamusu deng maen ba'usir satu deng satu, na, dong pung bos su sonde bisa pegang parenta lama-lama lai! Jadi sonde maso di otak, kalo bosong bilang Beta ada pake setan pung kuasa ko usir setan sandiri!

**19** Inga, é! Bosong pung orang dong ju tau usir setan. Dong pake kuasa dari setan, ko? Sonde, to! Jadi bosong jang omong sambarang bilang, Beta ada pake setan pung kuasa ko usir setan. Nanti bosong pung orang sandiri yang putus bilang, apa yang bosong tudu tu, sala.

**20** Ma kalo Beta batúl-batúl usir setan pake Tuhan Allah pung kuasa, itu kasi tunju bilang, Tuhan pung parenta su ada di bosong pung muka idong. Ada, ma tingka ke bosong sonde tau.

**21** Kalo geng satu ada pake sanjata kiri-kanan, ko jaga bae-bae dia pung ruma, tantu dia pung barang samua aman-aman sa.

**22** Ma nanti, ada yang lebe kuat dari dia, datang kasi kala deng rampas ame itu orang pung sanjata dong. Ais itu, dia ju ra'u bawa itu orang pung harta dong ko bagi-bagi kasi dia pung

---

<sup>☆</sup> **11:16:** Mateos 12:38, 16:1; Markus 8:11

ana bua dong. Su bagini lama itu geng partama parcaya dia pung sanjata. Ma sakarang dia su sonde bisa harap itu sanjata dong lai.\*

<sup>23</sup> Inga bae-bae! Orang yang sonde bapartei deng Beta, dia tu, Beta pung musu. Deng orang yang sonde babantu deng Beta pung karjá, na, dia tu, bekin kaco sa.”<sup>◊</sup>

*Setan mau pulang pi dia pung tampa lama  
(Mateos 12:43-45)*

<sup>24</sup> Yesus omong tamba lai bilang, “Kalo kotong usir setan kaluar dari satu orang, dia pi tampa sunyi ko cari tampa barenti cape. Tagal dia sonde dapa tampa yang cocok, ju dia pikir bilang, ‘Ee! Sonde dapa tampa bagini, lebe bae beta pulang pi tengah kambali di itu orang yang dolu tu.’

<sup>25</sup> Ais dia kambali, ju dia katumu itu tampa tu, su sapu barisi deng ta'ator bae-bae.

<sup>26</sup> Ju itu setan pi pange dia pung kawan tuju setan, yang lebe jahat lai dari dia. Ais dong samua pi tengah di itu orang, ju karoyok sang dia. Jadi sakarang itu orang pung idop lebe calaka lai.”

*Yang paling ontong*

<sup>27</sup> Waktu Yesus masih ba'omong deng orang banya tu, ada satu parampuan di situ batarea bilang, “Pak pung mama ontong bésar, tagal dia yang dapa barana sang Pak, deng dapa kasi susu sang Pak!”

---

\* **11:22:** Iko orang yang pintar so'al Alkitab, “geng” di sini, andia setan dong pung bos. Deng “yang lebe kuat dari dia”, andia Tuhan Yesus. ◊ **11:23:** Markus 9:40

**28** Yesus manyao bilang, “Batúl, mama! Ma yang lebe ontong lai, andia orang yang pasang talinga ko dengar Tuhan Allah pung Kata-kata, deng bekin iko!”

*Orang minta Tuhan Yesus kasi tunju bukti doo!  
(Mateos 12:38-42)*

**29** Waktu Yesus masih ba'omong, orang banya dong makarubu kuliling sang Dia. Ju Dia angka omong bilang, “Orang sakarang dong ni, cuma tau bekin jahat sa. Dong maen minta tarús ko Beta bekin tanda heran kasi sang dong, ko dong tau Beta ni, batúl-batúl Tuhan pung orang. Padahal dolu Tuhan su kasi tanda heran sang dong pake Dia pung jubir Yunus. Itu su cukup!

**30** Dolu-dolu, Yunus kasi tau orang kota Niniwe bilang, dong musti tobat dolo. Naa, apa yang jadi di Yunus dolu, jadi tanda kasi sang dong bilang, Tuhan Allah yang utus sang dia. Bagitu ju deng Beta, Manusia Tulen ni. Beta datang kasi tau sang bosong, ko bosong musti tobat dolo. Deng apa yang nanti jadi di Beta, ju jadi tanda kasi orang sakarang bilang, memang Tuhan Allah yang utus sang Beta.<sup>✳</sup>

**31** Nanti di hari kiamat, kalo Tuhan badiri jadi Hakim, nanti ratu dari salatan sana idop kambali, ju badiri jadi saksi. Dia tunju jari ko tudu sang bosong samua yang idop sakarang ni bilang, ‘Bosong samua ni, bodo, é!’ Te dolu itu ratu datang dari jao-jao ko lia deng mata kapala sandiri raja Soleman pung pintar. Padahal sakarang ada Orang di bosong pung teng-tenga

---

<sup>✳</sup> **11:30:** Mateos 16:4; Markus 8:12; Yunus 3:4

yang lebe hebat dari raja Soleman. Ma bosong sonde mau ame pusing sadiki ju sang Dia!\*

<sup>32</sup> Deng bukan dia sandiri sa! Nanti orang dari Niniwe dong ju bangun badiri ko tunju jari sang bosong yang idop sakarang ni bilang, ‘Bosong samua, bodo!’ Dong omong bagitu, tagal tempo hari, waktu Yunus pi kasi tau Tuhan pung mau sang dong, ju dong tobat memang. Padahal sakarang Orang yang lebe hebat dari Yunus ada di bosong pung teng-tenga, ma bosong sonde mau tobat sadiki ju!”\*

*Idop taráng*  
(Mateos 5:15, 6:22-23)

<sup>33</sup> Yesus sambung lai Dia pung omong bilang, “Orang kasi manyala lampu te'oek, ais taro di tampa yang tinggi, ko biar dia bekin taráng itu kamar kasi samua orang yang maso di situ. Sonde ada orang yang kasi manyala lampu, ais tutu ame deng bakul, ko, sambunyi mati sang dia.<sup>†</sup> Itu sonde ada guna apa-apa!\*

<sup>34</sup> Bosong pung mata ju sama ke lampu. Dia bekin taráng bosong pung dalam hati. Kalo mata galáp, orang lia samua-samua deng hati jahat. Ma kalo mata taráng, orang lia samua-samua deng hati bae.

<sup>35</sup> Usaha ko taráng yang ada di bosong pung hati tu, jadi taráng sakali, sama ke matahari pung taráng. Taráng di bosong pung hati tu, jang

---

\* **11:31:** 1 Raja-raja dong 10:1-10; 2 Sajara Isra'el deng Yahuda 9:1-12    \* **11:32:** Yunus 3:5    † **11:33:** Tulisan bahasa Yunani saparu sonde tulis bilang, “ais tutu ame deng bakul”.    \* **11:33:** Mateos 5:15; Markus 4:21; Lukas 8:16

sama ke bulan pung taráng, yang cuma kasi lia bayang-bayang sa.

<sup>36</sup> Kalo bosong pung hati taráng, sampe sonde ada satu nat ju yang galáp, tantu bosong pung idop samua ju taráng, sama ke ada lampu bésar yang kasi taráng bosong pung idop.”

*Tuhan Yesus togor orang Yahudi pung kapala agama dong*

(Mateos 23:1-36; Markus 12:38-40)

<sup>37</sup> Yesus omong abis, ju ada satu orang dari parti agama Farisi undang sang Dia ko datang makan di dia pung ruma. Sampe di sana, ju Yesus maso pi dalam ruma ko dudu di meja makan.

<sup>38</sup> Ma tuan ruma jadi heran lia Yesus dudu makan deng sonde pake cuci tangan lebe dolo, iko orang Farisi pung atoran.

<sup>39</sup> Ais Yesus kasi tau sang dia bilang, “Bosong orang Farisi dong hebat! Bosong pegang karás bosong pung atoran agama! Bosong inga kasi barisi piring deng galás pung luar sampe mangkilat, ma bosong sonde inga ko kasi barisi bosong pung dalam hati yang kamomos tu, yang jahat deng rakus mati pung!

<sup>40</sup> Ngali, é! Jang lupa. Tuhan Allah yang bekin bagian luar. Dia ju yang bekin bagian dalam.

<sup>41</sup> Ma ada lebe bae, bosong kasi sang orang kesian dong dari apa yang bosong punya, ko biar bosong bisa barisi di Tuhan pung muka.

<sup>42</sup> Bosong orang Farisi dong! Bosong nanti dapa calaka! So'al kasi Tuhan satu bagian dari

sapulu bagian, bosong maen ba'itong samua-samua, kici-bésar. Sampe bosong pung bumbu kici ana dari kabón ju, bosong ba'itong mati! Ma bosong sonde toe hal yang pantíng dong. So'al parkara sayang sang Tuhan Allah, deng parkara adil, bosong lupa buang sang dong sa! Memang kotong musti tatáp kasi sang Tuhan Dia pung bagian, ma jang lupa hal-hal yang lebe pantíng dong. <sup>43</sup>

**43** Bosong nanti dapa calaka! Te bosong suka cari tampa yang paling bae dalam ruma sambayang, deng suka cari hormat di tampa-tampa umum.

**44** Bosong nanti dapa calaka! Te bosong sama ke kubur yang dia pung tana su rata. Orang jalan di situ, ma dong sonde tau bilang, di situ ada kubur, tagal kubur pung tana di atas barisi, ma dia pung dalam busuk. Padahal iko kotong pung adat, orang yang injá kubur bekin kotor dia pung diri, jadi sonde pantas maso pi ruma sambayang. Bosong orang Farisi dong sama ke itu kubur! Di luar-luar bosong conto ke barisi mati pung. Ma bosong pung dalam hati ada ponu deng hal busuk.”

**45** Ada satu ahli hukum Yahudi di situ, sambar sang Yesus pung omong bilang, “Bapa Guru! Bapa pung kata-kata tadi tu, puku kaná sang botong ju!”

**46** Ais Yesus balas sang dia bilang, “Batúl! Bosong ahli hukum Yahudi dong, biar ko bosong ju dapa calaka! Bosong bukan bantu orang deng

---

<sup>43</sup> **11:42:** Kapala Agama dong pung Atoran 27:30

bekin ringan dong pung idop, ma bosong bekin tamba susa sang dong deng bekin-bekin bosong pung atoran agama yang barát. Ais bosong kasi pikol orang deng bosong pung atoran macam-macam dong. Ma bosong sandiri sonde bantu pikol coba itu babán deng satu jari ju!

**47** Bosong nanti dapa calaka! Te bosong batasibu bangun batu-batu tugu kasi Tuhan pung jubir dolu-dolu ko kasi hormat sang dong. Padahal bosong pung nene-moyang sandiri yang bunu bekin mati sang itu jubir dong!

**48** Bosong ju satu kaki deng bosong pung nene-moyang. Dong tola buang Tuhan pung jubir, deng bunu bekin mati sang dong. Ais bosong bangun batu kubur kasi itu jubir dong, ko jadi tanda bilang, bosong ju ia bae deng bosong pung nene-moyang.

**49** Tagal itu, Tuhan Allah yang tau semua, parná omong bilang, 'Beta nanti utus Beta pung jubir deng utusan laen dong, ko datang di orang Isra'el dong. Ais, itu orang dong siksa barmaen saparu, deng bunu bekin mati saparu.'

**50-51** Orang yang idop sakarang ni, musti pikol tanggong-jawab dari orang yang su bunu bekin mati Tuhan pung jubir dong. Itu itong dari Tuhan bekin ini dunya, mulai deng Habel pung mati, sampe yang paling ahir, Sakaria. Dia tu, yang kaná bunu di teng-tenga meja korban deng Kamar Barisi di Tuhan Allah pung Ruma Sambayang Pusat. Bosong ju pikol ame dong pung hukuman!\*

---

\* **11:50-51:** Carita Mula-mula 4:8; 2 Sajara Isra'el deng Yahuda 24:20-21

**52** Bosong ahli hukum Yahudi dong! Nanti bosong dapa calaka! Te bosong pegang konci yang bisa buka pintu ko orang dapa mangarti bae-bae Tuhan Allah pung mau. Ma bosong sandiri sonde maso pi situ. Lebe jahat lai, bosong pele ame orang, ko dong jang maso pi situ!"

**53-54** Waktu Yesus omong abis, ju itu guru agama deng orang Farisi dong maruak sang Dia. Mulai itu waktu, dong maen tanya macam-macam ko mau hiki kasi jato sang Dia. Dong ator siasat tarús ko cari-cari hal deng Dia.

## 12

*Jaga diri ko jang iko orang Farisi dong pung pura-pura*

(Mateos 10:26-27)

**1** Itu waktu, ada barapa ribu orang datang ko mau dengar sang Yesus. Dong jalan baseti deng makarubu ame sang Dia. Ju Dia omong lebe dolo deng Dia pung ana bua dong bilang, "Jaga diri ko jang iko orang Farisi dong pung pura-pura. Te dong suka omong laen, ma dong bekin laen."\*

**2** Dong pura-pura bae, ma dong pung pura-pura tu nanti kantara. Te semua yang tasambunyi sakarang, nanti dapa lia.\*

**3** Apa yang bosong omong sambunyi-sambunyi sakarang, nanti orang dapa dengar taráng-taráng. Apa yang bosong kusu-kusu dalam kamar, nanti orang omong karás-karás di muka banya orang."

---

\* **12:1:** Mateos 16:6; Markus 8:15    \* **12:2:** Markus 4:22; Lukas 8:17

*Manusia pung nilei di muka Tuhan Allah  
(Mateos 10:28-31)*

<sup>4</sup> Yesus omong tamba bilang, “Ana dong! Sonde usa taku kalo orang mau bunu sang bosong. Te dong cuma bisa bunu bosong pung badan sa, ma sonde bisa bekin apa-apa deng bosong pung jiwa.

<sup>5</sup> Beta mau kasi tau bilang, bosong musti taku sang sapa. Bosong musti taku sang Tuhan Allah. Te Dia yang bisa bunu sang bosong, ais itu lempar kasi maso bosong pi dalam naraka. Jadi Dia ni, yang bosong musti taku batúl-batúl.

<sup>6</sup> Bosong pikir coba, burung pipit pung harga barapa? Paling mura, to?! Lima ekor dua sen, wuang? Biar bagitu, ma Tuhan Allah sonde lupa buang satu ekor ju.

<sup>7</sup> Bagitu ju Tuhan taro hati sang bosong. Dia tau parsís barapa banya rambu di bosong pung kapala. Jadi bosong sonde usa taku, te Tuhan nilei bosong lebe dari burung pipit bam-banya dong.”

*Jang malu mangaku sang Tuhan Yesus  
(Mateos 10:32-33, 12:32, 10:19-20)*

<sup>8</sup> Ais Yesus omong lai deng Dia pung ana bua dong bilang, “Pasang talinga bae-bae! Kalo ada orang yang barani mangaku sang Beta di muka orang banya di ini dunya, nanti Beta ju mangaku sang dia di muka Tuhan Allah pung ana bua di sorga bilang, dia tu Beta pung orang.

<sup>9</sup> Ma kalo ada orang yang omong di muka manusia bilang, dia sonde kanál sang Beta, nanti

Beta ju omong di muka Tuhan Allah pung ana bua di sorga bilang, Beta sonde kanál sang dia.

<sup>10</sup> Beta ni, Manusia Tulen. Kalo ada orang omong bekin busuk Beta pung nama bae, na, Tuhan Allah masi sadia lupa buang dia pung sala tu. Ma kalo dia omong bekin busuk Tuhan pung Roh yang Barisi pung nama bae, Tuhan Allah sonde lupa dia pung sala.<sup>◊</sup>

<sup>11</sup> Nanti kalo orang hela bawa sang bosong pi tampa urus parkara agama, ko, pi orang pegang parenta dong, tagal bosong parcaya sang Beta, bosong sonde usa taku mau bela diri karmana.

<sup>12</sup> Te nanti itu waktu ju, Tuhan Allah pung Roh yang Barisi ajar kata-kata yang pas ko bosong manyao sang dong.”<sup>◊</sup>

### *Carita orang kaya yang bodo*

<sup>13</sup> Ais itu, satu dari itu orang banya dong tanya sang Yesus bilang, “Bapa Guru! Tolong suru beta pung kaka ko babagi deng beta botong pung bapa pung pusaka.”

<sup>14</sup> Ma Yesus manyao sang dia bilang, “Weh! Sapa yang angka sang Beta jadi Hakim ko putus bosong dua pung parkara macam bagitu?”

<sup>15</sup> Ais Yesus omong sang itu orang banya dong bilang, “Bosong musti ati-ati ko jang saraka. Te harta yang banya sonde jamin idop yang aman.”

<sup>16</sup> Ais ju Dia carita satu umpama bilang, “Ada satu orang kaya, yang dia pung kabón kasi hasil bam-banya.

---

<sup>◊</sup> **12:10:** Mateos 12:32; Markus 3:29    <sup>◊</sup> **12:12:** Mateos 10:19-20;  
Markus 13:11; Lukas 21:14-15

**17** Sampe-sampe dia pung gudang dong su sesak, deng dia sonde tau mau bekin karmana lai.

**18** Ais ju dia putus bilang, ‘Beta mau bekin bagini sa! Beta bongkar buang ini gudang lama dong, ko kasi bangun yang lebe besar, ais simpan beta pung kabón pung hasil deng samua harta milik laen di situ.

**19** Kalo su bagitu, nanti beta omong deng beta pung diri sandiri bilang, “We! Gudang su ponu! Makanan su cukup ko makan sampe taon-taon. Jadi makan-minum ena-ena deng goyang kaki sanáng-sanáng suda!”

**20** Ma Tuhan Allah kasi tau sang dia bilang, ‘Woi! Lu bodo, é! Ini malam ju, lu mati. Ais sapa yang dapa lu pung gudang pung isi samua?’

**21** Jadi bagini! Orang bisa sa kumpul harta bam-banya di ini dunya kasi dia pung diri sandiri, ma di Tuhan Allah pung pikiran, dia tu, miskin, tagal sonde babae deng Tuhan.”

### *Parcaya sa sang Tuhan Allah (Mateos 6:25-34)*

**22** Ais Yesus ajar tamba sang Dia pung ana bua dong bilang, “Bosong sonde usa barepot deng bosong pung idop hari-hari so'al mau makan apa, ko, mau pake apa.

**23** Te kotong pung idop ni, lebe dari apa yang kotong makan, deng apa yang kotong bapake.

**24** Lia coba burung gagak itam dong! Dong sonde tanam, sonde koru, sonde ada pung gudang ko simpan makanan, ma Tuhan Allah piara sang dong. Kalo bagitu, tantu Dia ju bisa piara

sang bosong, tagal Dia nilei bosong lebe dari itu burung dong.

<sup>25</sup> Kalo orang badiri di muka carmín, ais barepot deng dia pung diri, kira-kira dia bisa bekin tamba panjang dia pung umur idop, ko? Sonde bisa!

<sup>26</sup> Jadi, kalo barepot deng hal kici bagitu sonde bawa hasil apa-apa, akurang ko bosong masi mau barepot lai deng hal yang besar dong? Dia pung ontong apa?

<sup>27</sup> Lia coba bunga utan. Dong sonde karjá kabón, deng sonde tanún kaen. Ma raja Soleman pung pakean paling mewa ju, sonde bisa lawan bunga utan pung bagus. \*

<sup>28</sup> Te Tuhan Allah piara rumput kici yang sonde ada pung arti, yang cuma idop ini hari, ais beso mati, ko orang buang pi dalam api. Kalo bagitu, na, Dia ju bisa piara bosong yang pung harga lebe dari itu rumput. Jadi akurang ko bosong sonde batúl-batúl bagantong sang Dia?

<sup>29</sup> Bagitu ju, bosong sonde usa barepot so'al makan-minum. Te nanti Tuhan urus.

<sup>30</sup> Orang yang sonde bagantong sang Tuhan, dong banting tulang ko urus itu hal dong samua. Ma bosong ni jang bagitu, te bosong pung Bapa di sorga su tau samua yang bosong parlú.

<sup>31</sup> Kalo bosong kasi jalan Tuhan Allah pung karjá dolo, nanti Dia ju urus ini hal dong kasi bosong."

*Simpan harta di sorga  
(Mateos 6:19-21)*

---

\* <sup>27</sup> **12:27:** 1 Raja-raja dong 10:4-7; 2 Sajara Isra'el deng Yahuda 9:3-6

**32** Ais Yesus sambung lai bilang, “Bosong sama ke domba satu kumpul kici yang sonde ada pung kuat apa-apa. Ma sonde usa taku! Te bosong pung Bapa di sorga tu, Raja Bésar. Apa yang Dia pung, Dia sanáng kasi sang Dia pung ana sayang dong.

**33** Jadi pi jual buang bosong pung barang dong, abis dia pung doi pi bagi kasi orang miskin dong. Deng bagitu bosong simpan harta di sorga di tampa yang aman deng batahan tarús. Pancuri sonde bisa pi mancuri ame sang dia. Kakarlák ju sonde bisa makan bekin rusak sang dia.

**34** Inga bae-bae! Bosong pung harta di mana, na, bosong pung hati ju ada di situ.”

### *Tukang suru-suru yang siap layani siang-malam*

**35-36** Yesus omong lai bilang, “Siang-malam bosong musti siap sadia ko layani sang Tuhan. Sama ke tukang suru-suru yang mete tunggu dia pung tuan ruma pulang dari pesta kawin. Kalo bos toki pintu, na, dia bisa buka deng capát. \*

**37** Kalo bos datang dapa dia pung orang karjá dong ada batunggu bagitu, tantu dong barontong. Te nanti bos sandiri yang kasi tunju dia pung hati bae sang dong. Dia pake pakean orang karjá, ais pi layani itu orang karjá dong deng makanan ena-ena.

**38** Itu orang karjá dong memang barontong tagal dong layani bos deng bae. Biar bos datang jam barapa sa, tengah malam ko, amper siang, dong salalu siap.

---

\* **12:35-36:** Mateos 25:1-13; Markus 13:34-36

**39** Pikir bae-bae! Kalo ada tuan ruma yang tau parsís jam barapa pancuri mau datang, su tantu dia sonde kasi sampat ko itu pancuri bongkar dia pung ruma.

**40** Jadi bosong musti siap salalu, te sonde ada satu orang ju yang tau parsís kapan Manusia Tulen mau datang kambali.”<sup>◊</sup>

*Ana bua yang satia, deng ana bua yang sonde satia*  
*(Mateos 24:45-51)*

**41** Ais Petrus tanya sang Yesus bilang, “Bapa Guru! Bapa pung umpama tadi tu, cuma kaná sang kotong sandiri sa, ko, kaná samua orang?”

**42-44** Ju Yesus manyao bilang, “Itu umpama kaná di samua orang yang bekin sama ke kapala urusan yang pintar urus deng satia kasi dia pung bos. Te nanti dia pung bos angka sang dia ko bagi makanan kasi orang karjá laen dong. Kalo dia rajin bekin iko dia pung tugas bagitu, biar dia pung bos datang kapan sa, ma dia salalu ada bekin yang batúl. Ais dia barontong, tagal dia pung bos nanti angka sang dia ko urus dia pung harta milik samua.

**45** Ma calaka kalo itu kapala urusan mulai pikir bilang, ‘Eh! Tantu bapatua masih lama baru pulang.’ Tarús dia mulai papoko orang karjá laen dong, laki-laki deng parampuan. Ais dia dudu makan-minum sanáng-sanáng sampé mabo.

**46** Ma satu hari, waktu itu kapala urusan sonde sangka apa-apa, takuju sa bos pulang. Waktu bos dapa tau itu hal dong, ju itu bos langsung papoko

---

<sup>◊</sup> **12:40:** Mateos 24:43-44

sang dia, ais usir buang sang dia, ko dapa dia pung bagian di luar sama-sama deng orang yang sonde satia bekin iko bos pung mau.

<sup>47</sup> Te orang karjá yang tau dia pung bos pung mau, ma sonde siap bekin iko, ko, sonde mau bekin iko, nanti kaná hukuman barát.

<sup>48</sup> Ma orang karjá yang karjá sala tagal dia sonde tau bos pung mau, nanti dia kaná hukuman yang sonde barát. Te orang yang su tarima banya, dia pung tuntutan ju banya. Orang yang tarima karjá bésar, dia pung tanggong-jawab ju bésar.”

*Tuhan Yesus pung ajaran bisa bekin orang bamalawan*

(Mateos 10:34-36)

<sup>49</sup> Yesus sambung Dia pung omong bilang, “Beta datang ko kasi pisa Beta pung orang dari orang laen di ini dunya. Itu sama ke orang pake api ko bakar buang kotoran. Beta pung suka kalo itu api su mulai manyala di mana-mana.

<sup>50</sup> Ma Beta musti pikol sangsara yang barát lebe dolo. Beta nanti sangsara batúl sampe Beta pung tugas su abis.<sup>✳</sup>

<sup>51</sup> Bosong pikir Beta datang bawa dame di ini dunya, ko? Sonde! Beta datang ko bekin orang dong bakanjar deng bekin orang dong tapica-pica tagal Beta pung ajaran.

<sup>52</sup> Mulai sakarang orang basodara dong tapica-pica. Dalam satu kelu, tiga lawan dua, dua lawan tiga.

<sup>53</sup> Papa lawan ana;

---

<sup>✳</sup> **12:50:** Markus 10:38

ana lawan papa.  
 Mama lawan ana;  
 ana lawan mama.  
 Mama mantu lawan ana mantu;  
 ana mantu lawan mama mantu.”<sup>✳</sup>

*Kanál bae-bae hari susa pung tanda-tanda  
 dong*

(Mateos 16:2-3)

<sup>54</sup> Tarús Yesus omong deng itu orang banya dong bilang, “Kalo bosong lia awan tabal muncul di sablá barat, bosong omong, ‘Ini tanda bilang, hujan su mau turun.’ Memang batúl bagitu.

<sup>55</sup> Kalo angin salatan fuu datang, bosong omong, ‘Ini tanda bilang, ini hari panas mati pung!’ Memang batúl bagitu.

<sup>56</sup> Woi! Bosong manusia muka-balakang yang omong laen bekin laen! Bosong pintar kasi mangarti ini bumi deng dia pung cuaca pung mau-mau. Ma akurang ko bosong sonde mau mangarti Tuhan pung mau-mau di ini jaman?”

*Badame deng bosong pung musu dong*

(Mateos 5:25-26)

<sup>57-58</sup> Yesus omong tamba bilang, “Kalo bosong baparkara, akurang ko bosong sonde bisa putus sandiri mana yang batúl! Lebe bae urus dame dolo! Jang sampe bosong su sampe di muka hakim, ais dia putus ko kasi maso sang bosong pi bui.

<sup>59</sup> Te kalo bagitu, tantu bosong sonde bisa kaluar sampe bosong bayar bekin abis bosong pung utang yang hakim putus.”

---

<sup>✳</sup> **12:53:** Mika 7:6

# 13

*Kasi tengah idop yang jahat, ko bale iko Tuhan pung mau-mau*

<sup>1</sup> Itu waktu, ada orang kasi tau sang Yesus bilang, gubernor Pilatus su bunu barapa orang Yahudi dari Galilea waktu dong ada bawa korban di Ruma Sambayang Pusat di Yerusalem.

<sup>2</sup> Dengar bagitu, ju Yesus tanya bilang, “Iko bosong, kira-kira itu orang yang kaná bunu tu, dong pung sala ada lebe besar dari samua orang Galilea yang laen? Andia ko dong kaná hukum mati, ko?

<sup>3</sup> Sonde! Ma kalo bosong sonde kasi tengah bosong pung idop yang jahat, ko bale iko Tuhan pung mau-mau, bosong ju nanti kaná ancor buang sama ke dong.

<sup>4</sup> Ais karmana lai deng itu dalapan blas orang yang mati kaná tendes manara yang rubu di Siloam tempo hari tu? Dong pung sala lebe besar dari samua orang laen di Yerusalem, ko?

<sup>5</sup> Sonde! Ma kalo bosong sonde kasi tengah bosong pung idop yang pakane'o, ko bale iko Tuhan pung jalan lurus, bosong ju nanti kaná ancor buang sama ke dong.”

*Pohon yang sonde babua, sama ke Tuhan pung orang yang sonde ada pung hasil*

**6** Ais ju Yesus kasi satu umpama bilang, “Ada satu orang yang ada pung pohon bua\* di dia pung kabón. Dia maen datang ko maloi coba mau cari tau itu pohon su babua, ko balóm. Ma itu pohon balóm babua.

**7** Ais ju dia suru dia pung tukang kabón bilang, ‘Su tiga taon ni, beta datang ulang kali ko cari ini pohon pung bua, ma beta sonde dapa apa-apa. Jadi potong buang sang dia, te ini pohon cuma makan tampa sa.’

**8** Ma itu tukang kabón manyao bilang, ‘Bapa jang mara. Kasi tempo ini pohon satu taon lai. Biar ko beta pacol kuliling sang dia, ais taro pupuk ko bekin subur sang dia.

**9** Kalo taon datang ini pohon babua, na, bae. Ma kalo sonde, na neu, potong buang sang dia sa.’”

*Tuhan Yesus bekin bae parampuan balakang bongko, kaná deng hari sambayang*

**10** Satu kali, pas deng orang Yahudi pung hari sambayang, Yesus pi ajar di rumah sambayang.

**11** Di situ ada satu parampuan yang dia pung balakang su bongko dalapan blas taon, tagal setan pung bekin. Dia sonde bisa badiri lurus.

**12** Yesus dapa lia itu parampuan ju, Dia pange ame sang dia, ais omong bilang, “Mama! Sakarang mama su bae.”

---

\* **13:6:** Bahasa Indonesia pake kata ‘pohon ara’ dari istila bahasa Yunani *sukē*. Ma Alkitab kasi tunju satu pohon di sana yang orang biasa makan dia pung bua. Di Indonesia sablá timur, orang sonde makan ‘pohon ara’ pung bua. Jadi ‘pohon ara’ di Alkitab bahasa Indonesia, sonde sama ke kotong pung pohon ara di sini.

**13** Ju Yesus taro tangan di itu parampuan. Takuju, dia pung balakang bongko tu lurus memang. Ju dia minta tarima kasi, deng puji-puji sang Tuhan Allah.

**14** Ma itu kapala ruma sambayang mara, tagal Yesus bekin bae orang kaná deng hari sambayang. Ju dia kasi tau orang banya dong bilang, “Satu minggu ada anam hari karjá. Jadi lebe bae orang saki dong datang di itu hari-hari karjá sa, ko cari orang bekin bae sang dong. Jang datang di hari sambayang!”<sup>☆</sup>

**15** Ma Yesus manyao sang dia bilang, “Heh! Orang muka-balakang. Di hari sambayang bosong ju karjá, to?! Te bosong pi kasi lapás bosong pung sapi deng keledai ko kasi minum sang dong, wuang?!”

**16** Ini mama ni, ba'i Abraham pung turunan, sama ke kotong. Setan dong pung bos su ika sang dia 18 taon. Kalo Beta lapás sang dia kaná deng hari sambayang, na, sala ko?”

**17** Dengar bagitu, ju Yesus pung musu dong malu. Ma itu orang banya dong sanáng deng Dia pung karjá yang bagus dong.

*Tuhan Yesus kasi umpama so'al biji yang paling kici*

*(Mateos 13:31-32; Markus 4:30-32)*

**18** Ju Yesus sambung Dia pung omong lai bilang, “Kira-kira Beta banding Tuhan pung orang dong sama ke apa, é?

---

<sup>☆</sup> **13:14:** Kaluar dari Masir 20:9-10; Carita Ulang so'al Jalan Idop 5:13-14

<sup>19</sup> Mula-mula dong cuma sadiki sa, ma lama-lama dong tamba banya. Dong tu mulai sama ke biji yang kici ana sa. Orang tanam sang dia di kabón. Ais ju dia idop ko jadi pohon besar. Tarús burung dong datang basarang di dia pung cabang dong.”

*Tuhan Yesus kasi umpama so'al ragi  
(Mateos 13:33)*

<sup>20</sup> Ais Yesus omong lai bilang, “Kira-kira Beta banding Tuhan pung orang dong deng apa lai, é?

<sup>21</sup> Dia sama ke ragi yang parampuan ame ko campor deng tarigu dua sak,<sup>†</sup> ko bekin banya roti. Ju itu tarigu samua reis sampe besar, tagal itu ragi yang sadiki ana. Tuhan pung orang dong ju pangaru tamba luas bagitu.”

*Sorga pung pintu kici ana  
(Mateos 7:13-14, 21-23)*

<sup>22</sup> Ais itu, Yesus dong mulai jalan pi kota Yerusalem. Iko-iko jalan, Dia singga-singga di kota deng kampong ko ajar orang.

<sup>23</sup> Di satu tampa, ada satu orang tanya sang Dia bilang, “Bapa Guru! Kira-kira cuma sadiki orang sa yang bisa dapa salamat, ko?”

<sup>24</sup> Dia manyao bilang, “Sorga pung pintu maso tu, kici. Jadi pasang kaki ko bosong bisa maso iko situ. Te ada banya orang yang mau coba maso, ma sonde bisa.

<sup>25</sup> Kalo tuan rumah su konci pintu, nanti bosong badiri di luar ko toki-toki pintu, deng ba'eki minta tolong bilang, ‘Bos! Buka pintu dolo!’

---

<sup>†</sup> **13:21:** Bahasa Yunani bilang tarigu 3 *sata*. Satu sata, kira-kira 12 liter. Jadi 3 sata, 36 liter tarigu.

Ma nanti dia manyao bilang, ‘Bosong tu, sapa?  
Beta sonde kanál sang bosong!’

<sup>26</sup> Tarús bosong bilang, ‘Mana bisa bos sonde  
kanál sang botong? Botong yang biasa dudu  
makan-minum deng bos. Bos ju biasa ajar sang  
botong di botong pung istraat dong.’

<sup>27</sup> Ju nanti dia manyao bilang, ‘Beta su bilang  
tadi, beta sonde kanál sang bosong! Bosong ni,  
manusia tukang bekin jahat sa. Iskarobis dari  
sini!’<sup>☆</sup>

<sup>28</sup> Ais nanti kalo Tuhan Allah putus samua  
orang pung parkara, bosong manangis makar-  
ereu deng makan gigi sa. Te bosong dapa lia ba'i  
Abraham, ba'i Isak, ba'i Yakob deng Tuhan Allah  
pung jubir samua su maso dudu di dalam sorga.  
Ma bosong kaná usir buang pi luar sa.<sup>☆</sup>

<sup>29</sup> Nanti manusia datang dari dunya pung  
ujung-ujung, dari matahari nae sampe matahari  
turun; dari utara sampe salatan, ko dudu makan  
rame-rame di Tuhan Allah pung istana.<sup>☆</sup>

<sup>30</sup> Tanda bae-bae ini hal: nanti kalo Tuhan  
putus samua orang pung parkara, ada yang  
orang dolu sangka dia orang kici sa, ma dia  
dapa hormat bésar. Deng ada yang orang dolu  
bilang, dia orang bésar, padahal Tuhan anggap  
dia orang kici sa.”<sup>☆</sup>

*Tuhan Yesus jato kasian sang kota Yerusalem  
pung isi*  
(Mateos 23:37-39)

---

<sup>☆</sup> **13:27:** Lagu Puji dong 6:9    <sup>☆</sup> **13:28:** Mateos 22:13, 25:30

<sup>☆</sup> **13:29:** Mateos 8:11-12    <sup>☆</sup> **13:30:** Mateos 19:30, 20:16; Markus  
10:31

<sup>31</sup> Itu waktu, ada barapa orang Farisi datang mangada sang Yesus, ais kasi tau bilang, "Lebe bae, Bapa Guru ondor jao-jao pi tampa laen, te raja Herodes mau bunu sang Bapa."

<sup>32-33</sup> Ju Yesus manyao bilang, "Heh! Bapatua tu, sama ke musang licik! Bosong pi kasi tau sang dia bilang, 'Beta ada usir setan deng bekin bae orang saki dong ini hari deng beso. Dia pung lusa, baru Beta pung karjá su abis.' Biar karmana ju, Beta masih mau karjá sadiki lai dalam Beta pung jalan pi Yerusalem. Te orang Yerusalem dong yang suka bunu Tuhan Allah pung jubir dong.

<sup>34</sup> Aduu, orang Yerusalem dong, é! Bosong ni yang maen bunu Tuhan Allah pung jubir dong, deng lempar bekin mati utusan yang mau datang tunju Tuhan pung jalan sang bosong. Su ulang kali Beta mau kumpul jaga bosong ko pele ame sang bosong dari jahat, sama ke ayam mai yang mau tutu ame dia pung ana dong di bawa dia pung sayap. Ma bosong sonde mau.

<sup>35</sup> Sakarang Tuhan su sonde toe lai bosong pung ruma sambayang. Ais beso-lusa dia su kosong. Nanti bosong sonde akan lia sang Beta lai, sampe bosong mangaku bilang,  
'Tuhan Allah kasi berkat sang orang yang datang  
bawa Tuhan pung nama,  
tagal Tuhan su utus sang Dia!' "★

## 14

*Tuhan Yesus bekin bae orang, kaná deng hari*

---

❖ <sup>13:35:</sup> Lagu Puji dong 118:26

*sambayang*

<sup>1</sup> Satu kali, kaná deng hari sambayang, orang partei agama Farisi pung kapala satu undang sang Yesus ko datang makan di dia pung ruma. Dia dudu makan, ma ada orang yang mama'u sang Dia ko mau lia Dia mau bekin apa kaná deng hari sambayang.

<sup>2</sup> Itu waktu, ada satu orang saki bere-bere yang ada iko dudu di situ.

<sup>3</sup> Ais Yesus tanya sang ahli hukum Yahudi deng orang Farisi yang ada iko dudu makan di situ bilang, “Iko ba'i Musa pung atoran, bole bekin bae orang saki, kaná deng hari sambayang, ko sonde?”

<sup>4</sup> Ma sonde ada satu orang yang buka mulu. Ju Yesus sonto itu orang saki, ais dia bae memang. Tarús Yesus suru sang dia ko pulang.

<sup>5</sup> Ais itu, Yesus tanya sang dong lai bilang, “Kalo ada ana yang jato maso pi dalam parigi, kaná deng hari sambayang, bosong pi hela kasi kaluar sang dia, ko sonde? Kalo sapi yang jato, bosong kasi tenga, ko, hela kasi kaluar? Tantu bosong hela kasi kaluar. Naa, itu dia pung arti bilang, bosong su karjá, to!”<sup>◊</sup>

<sup>6</sup> Dengar Yesus omong bagitu, sonde ada satu orang ju yang bisa manyao sang Dia.

*Jang cari-cari muka*

<sup>7</sup> Itu waktu, Yesus ada lia-lia orang yang datang makan pesta di itu ruma. Ada banya orang yang pili tampa di muka, ko pi dudu di situ. Lia bagitu, ju Dia omong bilang,

---

<sup>◊</sup> **14:5:** Mateos 12:11

**8** “Ati-ati, ó! Kalo orang undang sang bosong pi pesta kawin, na, jang pi cari tampa dudu di orang besar dong. Te jang sampe tuan pesta ada undang tamu yang lebe pantíng.

**9** Kalo bagitu, tuan pesta nanti datang omong sang lu bilang, ‘Jang mara, é! Bapa tolong pinda pi balakang dolo, te beta su sadia ini korsi kasi ini orang besar ni.’ Ju lu bangun kasi tengah itu korsi deng malu, ko pi dudu di balakang.

**10** Jadi, kalo lu dapa undangan, na, pi dudu sa di korsi paling balakang. Nanti kalo tuan pesta dapa lia sang lu, ju dia datang bilang, ‘Eh, Pak! Mari ko dudu di muka sini sa.’ Deng bagitu bosong dapa hormat di muka tamu semua.◊

**11** Te orang yang angka-angka diri, nanti Tuhan kasi jato sang dia. Ma orang yang bekin diri sama ke orang kici, nanti Tuhan angka nae sang dia.”◊

**12** Ais itu, Yesus omong deng itu tuan rumah bilang, “Laen kali, kalo pak bekin pesta, na, jang undang pak pung kelu deng tamán orang kaya dong sa! Te dong pasti bisa undang balas sang pak.

**13** Ma kalo pak bekin pesta, na, undang orang miskin, orang kaki hela, orang yang sonde bisa jalan, deng orang buta dong.

**14** Tantu dong sonde bisa balas sang pak. Ma kalo pak undang sang dong, Tuhan Allah yang balas. Nanti kalo Dia kasi idop kambali orang parcaya yang su mati dong, Dia sonde lupa pak pung bae.”

---

◊ **14:10:** Kata-kata Mutiara 25:6-7      ◊ **14:11:** Mateos 23:12;  
Lukas 18:14

*Umpama so'al pesta bésar  
(Mateos 22:1-10)*

**15** Dengar bagitu ju, ada orang yang dudu satu meja deng Yesus angka omong bilang, “Paling ontong tu, andia orang yang iko makan rame-rame di Tuhan Allah pung istana, ó!”

**16** Yesus manyao sang dia bilang, “Beta carita kasi umpama bagini: ada satu orang bekin pesta bésar. Ju dia undang orang bam-banya.

**17** Waktu pesta su siap, ju dia suru dia pung tukang suru-suru ko pi pange orang-orang yang kaná undang dong bilang, ‘Mari, te acara su mau mulai.’

**18** Ma dong semua bekin alasan macam-macam ko biar dong sonde bisa datang. Satu kasi alasan bilang, ‘Waa! Beta baru béli ame satu kabón, jadi beta musti pi lia coba dolo. Jang mara ó! Te beta sonde bisa datang.’

**19** Ada laen yang kasi alasan bilang, ‘Beta baru béli ame sapi bajak lima pasang. Beta ada mau pi coba sang dong ni, jadi ma'af, ó!’

**20** Yang laen lai bilang, ‘Beta baru kawin, jadi sonde bisa.’

**21** Ais, itu tukang suru-suru pulang ko lapor dia pung tuan. Dengar bagitu ju, itu tuan mara mau mati. Ais dia parenta itu tukang suru-suru bilang, ‘Kalo bagitu, lu kaluar ko pi capát-capát! Lu pi di semua istraat deng lorong di ini kota, ko undang bawa orang kasian, orang kaki hela, orang buta, deng orang lumpu dong.’

**22** Dengar bagitu ju, itu tukang suru-suru pi undang itu orang dong. Ais dia pulang ko lapor

bilang, ‘Bapa! Dong su datang samua, ma tampa kosong masi banya.’

<sup>23</sup> Ju itu tuan bilang, ‘Kalo bagitu, na, lu pi lai di kampong-kampong di luar kota, sampe di kabón-kabón. Buju-buju sang sapa sa, ko bawa datang sang dong, asal bekin ponu ini tampa pesta.

<sup>24</sup> Dengar, é! Itu orang yang su tola beta pung undangan tu, dong sonde dapa rasa ini pesta pung enak sadiki ju!’”

*Bareken bae-bae dolo, baru iko sang Tuhan Yesus*

*(Mateos 10:37-38)*

<sup>25</sup> Ais itu, Yesus dong jalan tarús pi Yerusalem. Orang banya ada iko sang Dia. Ais Dia mangada sang dong, ju Dia omong bilang,

<sup>26</sup> “Orang yang batúl-batúl mau iko sang Beta, dia musti sayang sang Beta *lebe* dari samua: lebe dari dia pung mama-papa, lebe dari dia pung bini-ana, lebe dari dia pung adi-kaka, malahan lebe dari dia pung diri sandiri. Kalo sonde, itu orang sonde pantas jadi Beta pung ana bua.◊

<sup>27</sup> Te orang yang sonde mau pikol sangsara tagal dia iko sang Beta, dia sonde pantas jadi Beta pung orang. Orang yang mau jadi Beta pung orang, biar orang mau bunu bekin mati sang dia ju, ma dia pikol tarús dia pung sangsara.◊

<sup>28</sup> Jadi kalo mau iko sang Beta, na, bareken bae-bae dolo. Conto ke orang yang mau bangun rumah batingkat. Dia musti itong lebe dolo dia

---

◊ **14:26:** Mateos 10:37    ◊ **14:27:** Mateos 10:38, 16:24; Markus 8:34; Lukas 9:23

pung ongkos sampe alus-alus. Jang sampe doi sonde cukup.

<sup>29</sup> Kalo sonde itong alus-alus, mangkali dia baru bekin ruma pung fanderen, te doi su abis. Ais orang dong katawa bekin malu sang dia,

<sup>30</sup> bilang, ‘Bosong lia coba itu orang dolo! Dia baru bekin fanderen, ma balóm apa-apa, te doi su abis.’

<sup>31</sup> Conto laen, andia so'al baparáng. Raja yang mau baparáng musti dudu ba'itong lebe dolo deng dia pung konco dong. Kalo dia cuma ada pung tantara 10.000 orang, kira-kira dia bisa manáng lawan musu 20.000 orang, ko sonde?

<sup>32</sup> Kalo su itong-itong abis, ma nanti dia kala paráng, na, lebe bae, waktu musu masih jao, dia kirim memang utusan ko ba'urus dame sa.

<sup>33</sup> Bagitu ju orang yang mau iko sang Beta. Dia musti itong pi-datang bilang, dia su siap kasi tengah samua-samua, ko sonde? Te kalo sonde, itu orang sonde pantas jadi Beta pung ana bua.”

*Orang yang sonde pantas iko sang Tuhan Jesus, sama ke garam yang sonde ada pung guna lai*

*(Mateos 5:13; Markus 9:50)*

<sup>34-35</sup> Yesus sambung Dia pung omong deng conto laen lai bilang, “Garam tu, bae. Kotong pake ko bekin enak makanan. Ma kalo garam sonde asin lai, dia pung guna apa? Sonde bisa pake sang dia lai ko bekin enak makanan. Mau bekin pupuk ju, sonde bisa. Kotong angka buang sa. Jadi bosong ju musti jadi sama ke garam,

ko idop basayang deng samua orang. Sapa ada talinga, na, dengar bae-bae, ó!"

## 15

*Domba yang ilang*  
(Mateos 18:12-14)

<sup>1</sup> Itu waktu, orang tukang tagi bea deng orang tar laku-laku laen dong, maen datang sang Yesus ko mau dengar sang Dia. Ma orang Yahudi anggap sang dong tu, orang sonde bae.

<sup>2</sup> Lia bagitu, ju ada orang Farisi deng guru agama Yahudi dong yang mangomek bilang, "Cue! Ini orang batamán deng orang tar laku-laku dong. Malahan Dia dudu makan deng dong lai!"<sup>◊</sup>

<sup>3</sup> Dengar bagitu ju, Yesus carita kasi sang dong ini umpama bilang,

<sup>4</sup> "Andekata dari bosong ada satu orang pung domba saratus ekor. Tarús ada satu ekor yang ilang. Sakarang itu orang musti bekin apa? Tantu dia kasi tengah itu domba yang sambilan pulu sambilan ekor di tampa yang aman, ais dia pi cari sampe katumu itu domba yang ilang tu.

<sup>5</sup> Kalo dia su katumu itu domba, ju dia masa'a bawa pulang deng sanáng.

<sup>6</sup> Sampe di ruma, tarús dia pange dia pung kawan dong, ais kasi tau bilang, 'We! Bosong datang ko sanáng-sanáng deng beta dolo! Te beta su katumu be pung domba yang ilang.'

<sup>7</sup> Naa, di sorga ju bagitu. Kalo ada satu orang sala yang tobat, ais kambali pi Tuhan, sorga pung

---

<sup>◊</sup> **15:2:** Lukas 5:29-30

isi samua sanáng. Dong lebe sanáng tagal ini satu orang yang kambali pi Tuhan, dari sambilan pulu sambilan orang yang idop lurus, deng sonde ilang jalan.”

### *Doi perak yang ilang*

<sup>8</sup> Ais Yesus carita satu umpama laen lai bilang, “Ada satu mama pung doi perak sapulu biji.\* Tau-tau, te ada satu biji ilang. Sakarang dia mau bekin apa? Tantu dia pi bakar lampu ais loti di mana-mana, deng sapu itu ruma sampe di huk-huk, ko cari bae-bae itu doi.

<sup>9</sup> Waktu dia dapa katumu itu doi ju, dia pi pange orang sablá ruma dong, ais kasi tau bilang, ‘We! Bosong datang ko sanáng rame-rame deng beta dolo! Te beta su dapa kambali beta pung doi yang ilang tu!’

<sup>10</sup> Di sorga ju bagitu. Kalo ada satu orang sala yang tobat, ais kambali pi Tuhan, tantu samua ana bua di sorga dong sanáng mau mati.”

### *Ana yang ilang*

<sup>11</sup> Ais Yesus sambung Dia pung carita deng satu umpama laen lai bilang, “Ada satu bapa deng dia pung ana laki-laki dua orang.

<sup>12</sup> Satu kali, itu ana bungsu kasi tau dia pung bapa bilang, ‘Papa! Bagi kasi beta pung harta pusaka sakarang su!’ Ju dia pung bapa bagi itu harta kasi dia pung ana dua-dua.

<sup>13</sup> Sonde lama ju, itu ana bungsu jual dia pung bagian. Ais dia bungkus dia pung pakean, ju dia

\* **15:8:** Bahasa Yunani tulis bilang 10 *drakma*. Satu drakma, andia tukang pung gaji satu hari.

barangkat pi negrí yang jao. Di situ, dia ambur-ambur dia pung doi deng idop foya-foya.

<sup>14</sup> Waktu dia pung doi abis ju, itu negrí kaná musim lapar yang hebat, sampe dia ju idop malarat.

<sup>15</sup> Tarús dia pi cari-cari karjá. Ais satu orang di itu negrí tarima sang dia ko suru dia karjá kasi makan babi.

<sup>16</sup> Tagal itu ana tar tahan lapar lai, ju dia kapingin makan itu babi dong pung makanan. Te sonde ada orang yang mau kasi makan sang dia na.

<sup>17</sup> Lama-lama dia mulai pikir pi-datang bilang, 'Di beta pung papa pung ruma, samua orang karjá dong dapa makan sampe kinyang. Padahal beta di sini su mau mati lapar sa.'

<sup>18</sup> Lebe bae, beta pulang sa pi di beta pung papa. Ais kasi tau sang dia bilang, "Papa! Beta su bekin sala besar sang Tuhan deng papa."

<sup>19</sup> Beta su sonde pantas jadi papa pung ana lai. Biar papa tarima sang beta jadi kuli sa di papa pung ruma, ju bae!"'

<sup>20</sup> Ais pikir bagitu, ju dia bangun ko pulang pi dia pung bapa pung ruma. Dari jao bapatua su dapa lia sang dia, ju jato kasian sang dia. Dia turun dari ruma ko lari-lari pi sambut dia pung ana yang su pulang tu. Ais bapatua paló-ciom sang dia.

<sup>21</sup> Ju itu ana omong deng dia pung bapa bilang, 'Papa! Beta su bekin sala besar sang Tuhan deng papa. Beta su sonde pantas lai jadi papa pung ana.'

<sup>22</sup> Ma dia pung bapa langsung parenta dia pung orang karjá dong bilang, ‘We! Capát, é! Pi ame bawa baju yang paling bagus ko kasi pake sang dia. Taro cincin di dia pung jari, deng sapatu di dia pung kaki.

<sup>23</sup> Pi hela ame itu sapi paron ko horo, te kotong mau bekin pesta rame-rame.

<sup>24</sup> Tagal beta pung ana ni sama ke dia su mati, ma sakarang dia su idop kambali. Dia ilang, ma sakarang beta su dapa kambali sang dia.’ Omong abis bagitu ju, dong mulai bapesta rame-rame.

<sup>25</sup> Itu waktu, ana sulung sonde ada di rumah, te dia ada karjá di kabón. Waktu dia pulang, dari jao dia dengar orang maen musik deng bafoti baronggeng.

<sup>26</sup> Ju dia pange ame satu orang karjá, ais tanya sang dia bilang, ‘We! Ada bekin rame apa ni?’

<sup>27</sup> Itu orang karjá manyao bilang, ‘Bos pung adi su datang. Jadi bapa suru horo sapi ko bekin pesta besar, te dia pung ana su pulang deng salamat.’

<sup>28</sup> Dengar bagitu, ju itu ana sulung mara. Dia su sonde mau maso pi dalam rumah lai. Tarús dia pung bapa pi kokoe sang dia ko maso pi dalam.

<sup>29</sup> Ma dia maruak bilang, ‘Papa! Coba pikir dolo! Bagini lama ni beta banting tulang karjá satenga mati sama ke kuli kasar kasi sang papa. Beta sonde tau langgar papa pung mau. Biar bagitu ju, ma papa balóm parná kasi kambing ana satu ekor ko beta bekin pesta sanáng-sanáng deng beta pung kawan dong.

<sup>30</sup> Ma tau-tau te papa pung ana tukang royal ni, pi maen parampuan bekin abis papa pung

doi. Sakarang dia pulang datang, ju papa horo sapi yang paling bagus ko bekin pesta bésar kasi sang dia.'

<sup>31</sup> Ma dia pung papa manyao bilang, 'Ana sayang, é! Dengar bae-bae! Bagini lama lu tengah sama-sama deng papa. Samua yang papa pung, itu samua ju lu pung.'

<sup>32</sup> Ma sakarang kotong musti bapesta sanáng-sanáng, tagal lu pung adi satu ni. Dolu, sama ke dia su mati, ma sakarang dia su idop kambali. Dia ilang, ma sakarang su dapa kambali.'"

## 16

### *Kapala urusan yang lihai*

<sup>1</sup> Ais Yesus carita tamba satu umpama lai kasi Dia pung ana bua dong bilang, "Ada satu orang kaya yang kasi karjá satu orang jadi dia pung kapala urusan. Ma lama-lama bos dengar isu bilang, itu kapala urusan mulai pakane'o ko bekin rugi sang dia.

<sup>2</sup> Jadi dia pange itu kapala urusan, ko kasi tau bilang, 'Lu ni, karmana? Beta dengar lu maen pakane'o beta pung harta. Sakarang lu pi bekin laporan karjá ko beta pareksa dolo. Te abis itu, beta mau lapás buang sang lu.'

<sup>3</sup> Dengar bagitu, ju itu kapala urusan pikir pidatang bilang, 'Beta su paya ni, ma! Beta mau bekin apa sakarang? Cangkul tana, beta sonde kuat. Jadi tukang minta-minta ju, beta malu.'

<sup>4</sup> Kalo beta su sonde bisa karjá di sini lai, beta musti cari akal, ko biar orang laen dong masih mau tolong tarima sang beta.'

**5** Tagal itu, dia mulai pange ame samua orang yang ada utang sang dia pung bos. Dia tanya orang nomer satu bilang, ‘We! Lu ada utang barapa sang beta pung bos?’

**6** Itu orang manyao bilang, ‘Beta ada utang minya saitun 4.000 liter.’\*

Ju itu kapala urusan bilang, ‘Batúl. Ini lu pung surat utang. Sakarang robe buang su, ais dudu ko capát-capát tulis surat utang baru bilang, lu ada utang 2.000 liter sa.’

**7** Ais dia pi tanya orang nomer dua bilang, ‘Ko lu lai ada utang barapa?’

Dia manyao bilang, ‘Beta utang 1.000 karong padi.’†

Itu kapala urusan kasi tau bilang, ‘Robe buang lu pung surat utang lama tu, abis tulis yang baru bilang, 800 karong sa.’

**8** Dia bekin bagitu, sampe dia pung bos dapa tau dia pung akal. Ma itu bos musti mangaku bilang, itu kapala urusan yang jahat tu, memang lihai.

Naa! Beta kasi tau ini umpama ko bosong mangarti bilang, kalo banding deng orang parcaya, orang yang sonde parcaya memang lebe lihai idop di rakyat sakarang pung teng-tenga.

**9** Jadi bosong pikir coba. Biar orang dunya maen kotor pake dong pung harta, ma lebe bae bosong pake harta dunya ko tolong orang. Deng bagitu, bosong ju dapa tamán bam-banya. Biar

\* **16:6:** Tulisan bahasa Yunani bilang ‘100 *batos*’. Satu batos, andia 35-40 liter. † **16:7:** Tulisan bahasa Yunani bilang ‘100 *koros*’. Satu koros, andia 390 liter.

itu harta abis, ma nanti Tuhan sadia tampa kasi bosong di sorga.

<sup>10</sup> Kalo orang jujur deng hal kici dong, tantu dia ju jujur deng hal bésar. Ma kalo orang pakane'o deng hal kici dong, tantu dia ju pakane'o deng hal bésar.

<sup>11</sup> Kalo orang sonde bisa parcaya sang bosong ko urus harta biasa deng hal-hal kici di ini dunya, karmana ko Tuhan bisa parcaya sang bosong deng hal-hal bésar?

<sup>12</sup> Kalo bosong sonde bisa urus orang laen pung harta, na, sapa yang barani mau kasi harta sang bosong?

<sup>13</sup> Satu tukang suru-suru sonde bisa dengar dua tuan. Te nanti dia binci satu, deng sayang satu. Ko, dia satia deng satu, ma sonde toe deng satu. Bagitu ju deng bosong, te orang sonde bisa sayang Tuhan Allah sama-sama deng doi.”<sup>†</sup>

*Tuhan Yesus omong so'al doi, so'al Tuhan pung Kabar Bae, deng so'al kawin-cere*

*(Mateos 11:12-13, 5:31-32; Markus 10:11-12)*

<sup>14</sup> Itu waktu, ada barapa orang Farisi yang iko dengar Yesus pung omong tadi tu. Ju dong olok-olok sang Dia, tagal dong ada rakus doi.

<sup>15</sup> Ma Yesus manyao bilang, “Weh! Biar bosong bekin barisi diri di muka orang, ma Tuhan Allah kanál bosong pung hati tu, jahat. Ada banya hal yang manusia angka tinggi-tinggi, padahal Tuhan Allah anggap itu hal jahat, deng noju sang dong.

---

<sup>†</sup> **16:13:** Mateos 6:24

**16** Sampe deng Yohanis Tukang Sarani pung datang, kotong orang Yahudi idop iko ba'i Musa deng Tuhan pung jubir dong pung atoran. Ma sakarang Tuhan pung Kabar Bae su tasiar pi mana-mana. Banya orang ada usaha karás ko biar dong idop iko Tuhan pung mau-mau.<sup>☆</sup>

**17** Biar langit deng bumi ilang, ma Tuhan Allah pung atoran sadiki ju sonde akan ilang. Satu titikoma ju sonde ilang!<sup>☆</sup>

**18** Orang yang cere buang dia pung bini, ais kawin lai deng parampuan laen, dia barsina. Ais orang yang kawin deng bini buang, dia ju barsina.”<sup>☆</sup>

### *Carita orang kaya deng Lasarus*

**19** Yesus carita tamba bilang, “Ada satu orang kaya. Dia suka pake pakean bagus-bagus yang bekin dari kaen alus. Siang-malam dia makan-minum ena-ena, deng salalu foya-foya.

**20** Di situ ju ada satu orang malarat. Dia pung nama Lasarus. Dia pung badan ponu deng luka puruk. Tiap hari dia pung tamán dong bawa sang dia ko taro di muka itu orang kaya pung pintu maso.

**21** Dia kapingin dapa makan dari itu orang kaya pung makanan sisa dong, ma dia sonde dapa apa-apa. Cuma anjing dong datang ko lambe-lambe dia pung luka pung nanak.

**22** Ais ju Lasarus mati. Ju Tuhan Allah pung ana bua dari sorga datang ame bawa sang dia, ko kasi dudu di ba'i Abraham pung sablá.

---

<sup>☆</sup> **16:16:** Mateos 11:12-13    <sup>☆</sup> **16:17:** Mateos 5:18    <sup>☆</sup> **16:18:**  
Mateos 5:32; 1 Korintus 7:10-11

Sonde lama te itu orang kaya ju mati, ais orang dong kubur sang dia.

<sup>23</sup> Ma dia sonde maso sorga. Dia maso pi naraka, sama-sama deng banya orang mati. Di situ dia kaná siksa deng sangsara tarús. Ais satu kali, dia angka muka ju dapa lia Lasarus ada dudu sanáng-sanáng di ba'i Abraham pung sablá.

<sup>24</sup> Ju dia batarea bilang, ‘Ba'i Abraham, é! Kasian ame sang beta dolo! Suru sang Lasarus calóp dia pung ujung jari pi dalam aer, ko datang bekin basa beta pung ujung lida sa ju bae. Te beta sangsara satenga mati di api naraka ni!’

<sup>25</sup> Ma Abraham manyao bilang, ‘Naa! Ana, é! Inga bae-bae dolo. Tempo hari, waktu lu masih idop di dunya, lu dapa samua yang bae. Ma Lasarus cuma dapa susa sa. Jadi sakarang Tuhan hibur sang dia di sini, ma lu sangsara.

<sup>26</sup> Lebe-lebe lai, antara lu deng botong, Tuhan ada taro jurang lebar. Jadi orang dari sini sonde bisa pi situ, deng orang dari situ sonde bisa datang di sini.’

<sup>27</sup> Tarús itu orang kaya minta bilang, ‘Kalo bagitu, na, ba'i tolong suru Lasarus pi beta pung papa pung ruma dolo.

<sup>28</sup> Te beta masih ada adi laki-laki lima orang di sana. Suru sang Lasarus pi kasi inga, ko dong kambali suda pi Tuhan. Biar dong mati, na, dong jang maso di ini tampa sangsara ni.’

<sup>29</sup> Ma Abraham manyao bilang, ‘Tuhan Allah su kasi sang dong ba'i Musa deng jubir dong pung tulisan. Lu pung adi dong bisa baca ulang-ulang, ko dong mangarti Tuhan pung mau.’

**30** Ma itu orang kaya protes bilang, ‘Ba’i Abraham, é! Itu balóm cukup. Dong sonde toe Tuhan pung Kata-kata! Musti ada orang mati kaluar dari kubur ko pi kasi tau sang dong, baru dong tobат, ais mau dengar.’

**31** Ma Abraham manyao bilang, ‘Kalo dong sonde mau dengar ba’i Musa deng Tuhan pung jubir dong pung kata-kata, biar orang mati kaluar dari kubur ko pi omong deng dong ju, dong sonde akan dengar.’”

## 17

*Tuhan Yesus ajar so’al orang yang jato sala, deng yang minta ampon  
(Mateos 18:6-7, 21-22; Markus 9:42)*

**1** Yesus kasi tau Dia pung ana bua dong bilang, “Banya kali ada orang yang jato sala, tagal orang laen pung gara-gara. Ma orang yang bekin gara-gara tu, yang paling calaka.

**2** Kalo orang bekin gara-gara sampe ada ana kici yang sonde parcaya sang Beta, Tuhan Allah nanti kasi hukum barát sang dia. Lebe ringan ika batu besar satu di dia pung leher, ais angka buang sang dia pi dalam laut.

**3** Jadi jaga diri bae-bae ko bosong ju jang bekin orang jato sala! Ma kalo lu pung sodara bekin sala, na, togor sang dia. Kalo dia tobat, ais datang minta ampon, na, lupa buang dia pung sala.◊

**4** Kalo lu pung sodara bekin sala tuju kali dalam satu hari, tarús dia tobat, ais dia datang

---

◊ **17:3:** Mateos 18:15

tuju kali ko minta ampon, na, lu musti lupa buang sang dia pung sala tuju kali.”

*Orang musti parcaya Tuhan Allah pung kuasa*

<sup>5</sup> Satu hari, Yesus pung ana bua dong\* datang mangada sang Dia ko minta bilang, “Bapa Guru! Botong pung parcaya sonde kuat. Tolong bekin kuat tamba botong pung parcaya dolo.”

<sup>6</sup> Ju Yesus manyao bilang, “Kalo bosong ada pung parcaya sang Tuhan Allah pung kuasa, biar sadiki ana sa, ma bosong bisa parenta ini pohon besar bilang, ‘Tacabu, ko pinda pi laut!’ Nanti itu pohon iko bosong pung parenta memang.”

*Orang karjá yang bae iko dia pung bos pung mau*

<sup>7</sup> Ais Yesus omong lai bilang, “Ame conto. Ada budak yang pacol tana di kabón, ko, jaga domba di padang. Karjá abis ju, itu budak pulang pi ruma. Sonde mungkin dia pung tuan omong sang dia bilang, ‘Mari ko kotong dua dudu makan sama-sama suda!’

<sup>8</sup> Sonde! Yang wajar tu, dia pung tuan parenta sang dia bilang, ‘Pi ator meja kasi beta dolo. Ais, baru lu makan-minum di balakang.’

<sup>9</sup> Kalo itu budak su bekin iko dia pung tuan pung mau, bosong kira itu tuan nanti minta tarima kasi sang dia, ko? Sonde!

<sup>10</sup> Bosong ju bagitu. Kalo bosong su karjá abis samua yang Tuhan su parenta, na, bosong omong bilang, ‘Botong cuma tukang suru-suru

---

\* **17:5:** Tulisan bahasa Yunani di sini tulis bilang, “utusan”. Lukas suka tulis “utusan” kasi Tuhan Yesus pung ana bua 12 orang dong.

sa, yang sonde pantas tarima apa-apa. Botong sonde cari-cari puji. Botong cuma kasi jalan tugas sa.'"

*Tuhan Yesus bekin bae sapulu orang kusta*

**11** Waktu Yesus dong ada jalan pi Yerusalem, dong sampe di propinsi Galilea deng propinsi Samaria pung batas.

**12** Waktu dong mau maso pi satu kampong di situ, ada sapulu orang kusta datang ko mau katumu deng Yesus. Dong badiri dari jao.

**13** Ais dong batarea rame-rame bilang, "Yesus! Tuan! Kasian sang botong dolo!"

**14** Waktu Yesus dapa lia sang dong, ju Dia suru bilang, "Bosong pi kasi tunju bosong pung badan di kapala agama dolo, ko biar dong pareksa bilang, bosong pung kusta tu su ilang, ko balóm." Dengar bagitu ju, dong pi. Ma di tengah jalan, takuju sa, dong semua bae memang.<sup>☆</sup>

**15** Dong jalan tarús sanáng-sanáng. Ma ada satu yang kambali pi Yesus. Dia batarea bilang, "Puji Tuhan! Te beta su bae!"

**16** Ju dia tikam lutut ko minta tarima kasi bam-banya sang Yesus. (Tau-tau te dia tu, bukan orang Yahudi. Dia orang Samaria yang baparkara tarús deng orang Yahudi dong.)

**17** Ju Yesus tanya orang dong yang iko sang Dia bilang, "Karmana, é? Tadi Beta ada bekin bae sapulu orang, to? Yang sambilan dong di mana?

**18** Akurang ko cuma ini orang asing sa yang datang kambali ko minta tarima kasi sang Tuhan Allah, deng angka puji sang Dia?"

---

<sup>☆</sup> **17:14:** Kapala Agama dong pung Atoran 14:1-32

**19** Tarús Dia kasi tau itu orang bilang, “Lu su jadi bae tagal lu parcaya batúl-batúl sang Beta. Jadi bangun ko pulang deng salamat su!”

*Tuhan Yesus carita so' al hari kiamat, deng Dia pung datang kambali*

*(Mateos 24:23-28, 37-41)*

**20-21** Satu hari, ada barapa orang Farisi yang datang tanya sang Yesus bilang, “Bapa Guru! Coba kasi tau dolo! Kapan Tuhan Allah mulai kasi jalan Dia pung parenta?”

Ju Yesus manyao bilang, “Bagini! Jang sangka Tuhan kasi jalan Dia pung parenta deng tanda macam-macam di ini dunya yang orang bisa pareksa deng mata biji. Orang sonde dapa bukti ko bilang, ‘Coba lia sini! Te Tuhan Allah ada kasi jalan Dia pung parenta di sini!’, ko, ‘Ada di sana!’ Sonde! Te Dia kasi jalan Dia pung parenta di bosong pung teng-tenga dalam orang dong pung hati.”

**22** Ais Yesus kasi tau Dia pung ana bua dong bilang, “Sonde lama lai te Beta, Manusia Tulen ni, su sonde sama-sama deng bosong lai. Nanti deng hari-hari susa dong, bosong rindu mau lia Beta pung datang kambali. Ma Beta balóm datang.

**23** Ais kalo orang dong datang kasi tau bilang, ‘Kristus ada di sini!’ ko, ‘Kristus ada di sana!’ na, bosong sonde usa barepot ko, bacari pi-datang, te dong pung omong tu, putar-balek.

**24** Te nanti kalo Manusia Tulen batúl-batúl datang kambali, dia pung tanda talalu jalás, sama ke kilat yang bacaya ko bekin langit jadi taráng dari ujung pi ujung.

**25** Ma Dia ju musti tanggong sangsara macam-macam dolo. Deng manusia generasi sakarang ni, sonde mau dengar deng mau tola buang sang Dia.

**26** Ma nanti, kalo Dia mau datang kambali, orang dong cuma idop jahat sama ke biasa sa, sama ke di Noh pung jaman.<sup>☆</sup>

**27** Itu waktu, dong ada makan-minum, bekin pesta kawin, sampe deng hari Noh maso pi dalam dia pung kapal. Ma itu orang dong ju sonde mau dengar. Ais takuju sa, banjer besar datang ju bekin ancor sang dong samua.<sup>☆</sup>

**28** Itu ju sama ke orang-orang yang idop jahat di Lot pung jaman. Itu waktu, dong makan-minum, badagang, karjá kabón, deng kasi bangun ruma, deng idop jahat sama ke biasa sa.

**29** Ma orang dong ju sonde mau dengar. Ais, itu pagi, waktu Lot lari kasi tengah kota Sodom, takuju sa, ujan api deng balerang jato datang dari langit ko bakar buang sang dong samua.<sup>☆</sup>

**30** Jadi bosong ati-ati, ó! Jang sampe nanti kalo Manusia Tulen mau datang kambali, orang dong ju cuma idop biasa-biasa sa. Ma takuju sa te Dia muncul datang.

**31** Itu hari, orang yang ada di ruma pung teras, jang maso lai pi dalam ruma ko manyimpan. Orang yang ada karjá di kabón, jang pulang ruma lai ko ame barang.<sup>☆</sup>

**32** Inga apa yang su jadi deng Lot pung bini dolu. Dia mati, tagal dia inga dia pung barang di

<sup>☆</sup> **17:26:** Carita Mula-mula 6:5-8    <sup>☆</sup> **17:27:** Carita Mula-mula 7:6-24    <sup>☆</sup> **17:29:** Carita Mula-mula 18:20—19:25    <sup>☆</sup> **17:31:**

Mateos 24:17-18; Markus 13:15-16

ruma.<sup>☆</sup>

<sup>33</sup> Orang yang sonde mau iko sang Beta tagal sayang dia pung diri, nanti dia pung idop parcuma sa. Ma orang yang mau iko sang Beta sampe sarakan dia pung idop tagal sayang sang Beta, nanti dia dapa salamat, deng idop tarús-tarús deng Tuhan Allah.<sup>☆</sup>

<sup>34</sup> Beta kasi tau memang! Waktu Manusia Tulen datang kembali, kalo ada dua orang tidor di satu tampa tidor, takuju Tuhan angka nae yang satu, deng kasi tengah yang satu.

<sup>35</sup> Kalo ada dua parampuan mol padi sama-sama, nanti Tuhan angka nae yang satu, ma kasi tengah yang laen.

<sup>36</sup> [Kalo ada dua orang karjá sama-sama di kabón, nanti Tuhan angka nae yang satu, deng kasi tengah yang laen.]<sup>†</sup>

<sup>37</sup> Dengar bagitu, ju Yesus pung ana bua dong tanya sang Dia bilang, “Bapa Guru! Nanti itu semua jadi di mana?”

Ju Yesus buang bahasa bilang, “Bagini. Kalo bosong lia burung tukang makan bangke dong tarbáng bakumpul pi mana, bosong su tau itu jadi tanda bilang, pasti dong ada makan bangke di itu tampa.” [Deng maksud tasambunyi, nanti kalo Kristus datang kembali, dia pung tanda dong talalu jalás, kalo orang tau baca.]

---

<sup>☆</sup> **17:32:** Carita Mula-mula 19:26    <sup>☆</sup> **17:33:** Mateos 10:39, 16:25; Markus 8:35; Lukas 9:24; Yohanis 12:25    <sup>†</sup> **17:36:** Ayat 36 sonde ada dalam tulisan bahasa Yunani yang paling bae dong.

## 18

*Carita so'al janda satu, deng hakim yang sonde bae*

<sup>1</sup> Satu kali, Yesus ajar Dia pung ana bua dong pake umpama, ko dong sambayang sonde putus-putus, deng sonde ilang samangat. Dong musti parcaya tarús sang Tuhan.

<sup>2</sup> Dia pung carita bagini: “Di satu kota ada satu hakim yang sonde toe sang Tuhan Allah. Dia sonde nodek sang sapa-sapa ju.

<sup>3</sup> Di situ ju ada satu mama janda yang maen datang di itu hakim ko minta bilang, ‘Bapa hakim! Putus dolo beta pung parkara deng batúl, ó!’

<sup>4</sup> Mula-mula itu hakim sonde paduli deng itu janda. Ma lama-lama dia bosan dengar sang dia. Ais dia dudu pikir bilang, ‘Memang beta ni sonde toe sang Tuhan Allah, lebe-lebe deng manusia.

<sup>5</sup> Ma ini janda su bekin pusing sang beta. Tagal itu, lebe bae beta putus dia pung parkara deng fer dolo. Kalo sonde, nanti dia maen datang bekin cape sang beta tarús.’

<sup>6</sup> Naa, bosong pikir coba itu hakim jahat pung omong tu.

<sup>7</sup> Kalo lama-lama dia su tolong itu janda, tantu Tuhan Allah ju mau tolong Dia pung orang yang sambayang siang-malam ko minta tolong sang Dia. Ma Tuhan sonde tunda-tunda.

<sup>8</sup> Te Dia urus dong pung parkara deng capát. Naa, Beta mau tanya bagini: kalo Beta, Manusia Tulen ni, su datang kambali, kira-kira Beta masi bisa katumu deng orang parcaya di bumi, ko sonde?”

*Orang Farisi satu deng tukang tagi bea satu pi sambayang*

<sup>9</sup> Yesus carita tamba satu umpama so'al orang yang pung parcaya diri tinggi, deng suka pandang enteng orang laen. Dia carita bilang,

<sup>10</sup> “Ada dua bapa pi sambayang di Ruma Sambayang Pusat. Yang satu, orang dari parti agama Farisi; yang satu lai, tukang tagi bea. [Orang Yahudi dong anggap orang Farisi dong, orang suci. Ma dong anggap tukang tagi bea dong, orang sonde bae.]

<sup>11</sup> Sampe di ruma sambayang ju, itu orang Farisi badiri sandiri ko sambayang bilang, ‘Tarima kasi Tuhan, te beta ni, orang bae. Beta sonde jahat ke orang laen dong. Beta sonde jadi pancuri. Beta sonde parakus. Beta sonde maen serong. Tarima kasi, Tuhan, te beta ju sonde jahat ke ini tukang tagi bea ni.

<sup>12</sup> Beta rajin puasa satu minggu dua kali. Deng beta salalu kasi perpuluhan dari samua yang beta dapa.’ Itu orang Farisi sambayang bagitu.

<sup>13</sup> Ma itu tukang tagi bea badiri jao-jao di balakang. Dia sonde barani angka muka ko lia pi langit. Dia cuma sambayang tondo kapala deng hati ancor bilang, ‘Ee! Tuhan Allah. Kasian sang beta, manusia bardosa ni! Kasi ampon sang beta!’

<sup>14</sup> Naa, waktu itu dua orang pulang pi dong pung ruma, kira-kira sapa yang babae deng Tuhan Allah? Itu orang Farisi yang sombong, ko, itu orang tagi bea? Pasti Dia tarima bae itu tukang tagi bea yang randá hati. Ma Dia sonde toe sang itu orang Farisi. Te Tuhan Allah kasi jato

orang sompong, ma Dia angka nae orang yang randá hati.”<sup>18</sup>

*Tuhan Yesus omong kasi berkat sang ana-ana  
(Mateos 19:13-15; Markus 10:13-16)*

<sup>15</sup> Satu kali, orang dong ada koko bawa dong pung ana mea pi Yesus, ko biar Dia taro tangan deng omong kasi berkat sang dong. Lia bagitu, ju Yesus pung ana bua dong togor sang itu orang dong.

<sup>16-17</sup> Ma Yesus sambut ame itu ana-ana dong datang sang Dia. Ais Dia togor Dia pung ana bua dong bilang, “Kasi tengah ko itu ana kici dong datang sang Beta. Bosong jang palang sang dong. Inga bae-bae! Te orang yang mau jadi Tuhan Allah pung orang, dia musti bagantong sang Tuhan Allah, sama ke ana kici bagantong sang dong pung mama deng papa.”

*Orang kaya yang kapingin maso sorga  
(Mateos 19:16-30; Markus 10:17-31)*

<sup>18</sup> Satu kali, ada orang Yahudi pung orang besar satu datang tanya sang Yesus bilang, “Bapa Guru yang terhormat! Beta musti bekin karmana ko biar beta tau parsís bilang, beta bisa maso sorga ko idop tarús deng Tuhan Allah?”

<sup>19</sup> Ju Yesus manyao bilang, “Akurang ko lu sapa sang Beta bilang, ‘yang terhormat’? Cuma satu sa yang terhormat, andia Tuhan Allah sa.

<sup>20</sup> Naa! Lu su tau, to, Tuhan Allah pung atoran dari dolu bilang:

Jang barsina;  
jang bunu orang;

---

<sup>18</sup> **18:14:** Mateos 23:12; Lukas 14:11

jang pancuri;  
 jang jadi saksi putar-balek;  
 deng kasi hormat sang lu pung mama deng  
 papa.”<sup>☆</sup>

**21** Itu orang manyao bilang, “Batúl, Bapa! Beta su iko itu atoran dong mulai dari beta masi kici.”

**22** Dengar bagitu, ju Yesus bilang, “Bae! Ma lu masi kurang satu hal. Andia, sakarang lu pulang ko jual lu pung harta samua. Ais itu, pi bagi-bagi itu doi kasi orang malarat dong. Ais itu, baru lu datang kambali ko iko sang Beta. Te nanti Tuhan Allah balas kasi lu harta di sorga.”

**23** Dengar bagitu, ju itu orang pung hati susa, te dia kaya mau mati.

**24** Lia dia pi deng hati ancor, ju Yesus kasi tau Dia pung ana bua dong bilang, “Orang kaya memang paling susa maso sorga.

**25** Kotong banding deng hal laen. Memang sonde mungkin binatang onta yang besar bisa maso pi dia pung kandang lewat lobang jarom. Bagitu ju orang yang cuma harap dia pung harta, ma sonde harap sang Tuhan, sonde mungkin dia bisa maso sorga.”

**26** Orang yang dengar Yesus omong bagitu dong, tanya sang Dia bilang, “Kalo memang susa kasi orang kaya bagitu, na, orang macam karmana bisa dapə salamat?”

**27** Yesus manyao bilang, “Buat manusia, memang banyak hal sonde mungkin. Ma buat Tuhan Allah semua bisa jadi.”

---

<sup>☆</sup> **18:20:** Kaluar dari Masir 20:12-16; Carita Ulang so'al Jalan Idop 5:16-20

<sup>28</sup> Ju Petrus sambung bilang, “Papa! Botong su jalan kasi tengah botong pung harta samua, ko iko sang Papa. Ma botong nanti dapa apa?”

<sup>29</sup> Yesus manyao bilang, “Pe'u! Dengar bae-bae! Orang yang kasi tengah dia pung ruma, dia pung bini, dia pung adi-kaka, dia pung orang tua, ko, dia pung ana-ana, tagal dia kasi jalan tugas dari Tuhan Allah,

<sup>30</sup> pasti dia tarima kambali lebe banya di ini dunya. Ais kalo ini dunya su kiamat, dia ju dapa idop tarús deng Tuhan Allah.”

*Su tiga kali Tuhan Yesus omong Dia pung mati  
(Mateos 20:17-19; Markus 10:32-34)*

<sup>31</sup> Yesus bawa Dia pung ana bua dua blas orang ko pi omong sandiri deng dong bilang, “Bosong samua su tau bilang, sakarang kotong ada jalan pi kota Yerusalem. Sampe di sana, samua hal yang Tuhan pung jubir dong su tulis dolu so'al Manusia Tulen tu, nanti jadi parsís ke apa yang dong su tulis.

<sup>32</sup> Nanti dong sarakan sang Beta pi orang asing dong yang sonde parcaya sang Tuhan Allah. Ais dong olok-olok sang Beta, bekin hina macam-macam sang Beta, buang luda sang Beta,

<sup>33</sup> firuk sang Beta, abis bunu bekin mati sang Beta. Ma dia pung lusa, Beta idop kambali.”

<sup>34</sup> Dengar Yesus pung omong bagitu, Dia pung ana bua dong bingung, tagal dong balóm bisa tangkap itu kata-kata pung arti.

*Tuhan Yesus bekin bae orang buta satu  
(Mateos 20:29-34; Markus 10:46-52)*

**35** Waktu Yesus dong su mau maso pi kota Yeriko, ada satu orang buta yang ada dudu minta-minta di jalan pung pinggir.

**36** Waktu dia dengar orang banya dong lewat di situ ju, dia tanya bilang, "We! Ada apa ni?"

**37** Ju orang kasi tau sang dia bilang, "Yesus, dari Nasaret, ada lewat di sini."

**38** Dengar bagitu, ju itu orang buta batarea karás-karás bilang, "Yesus! Raja Daud pung turunan, é! Kasian ame sang beta dolo!"\*

**39** Orang yang jalan di muka Yesus togor sang dia ko suru diam. Ma dia ba'eki-eki tamba kuat lai bilang, "Raja Daud pung turunan, é! Kasian sang beta dolo!"

**40** Waktu Yesus dengar bagitu, ju Dia badiri. Ais Dia suru orang pi hela bawa itu orang buta. Sampe di Dia pung muka ju, Yesus tanya sang dia bilang,

**41** "Lu mau Beta bekin apa kasi sang lu?"

Dia manyao bilang, "Bapa! Beta bisa ko beta bisa dapa lia."

**42** Yesus manyao sang dia bilang, "Bae. Tagal lu parcaya bilang, Beta bisa bekin bae sang lu, jadi sakarang lu su bisa dapa lia."

**43** Takuju sa, itu orang pung mata buta su bae memang. Ju dia iko sang Yesus deng puji-puji sang Tuhan Allah. Samua orang yang lia bagitu, ju angka nae puji sang Tuhan.

\* **18:38:** Ada pung banyak pangkat yang tunju sang Mesias, ko, Kristus. Conto ke: Manusia Tulen, Tuhan Allah pung Ana, deng laen-laen. 'Raja Daud pung turunan' ju satu pangkat kasi 'Kristus'. Deng bagitu, ini orang buta mangaku bilang, Yesus tu, Kristus.

## 19

*Tuhan Yesus katumu satu tukang tagi bea,  
nama Sakeos*

<sup>1</sup> Ais Jesus dong maso iko kota Yeriko, ko dong mau jalan tarús.

<sup>2</sup> Di situ ada satu kapala tukang tagi bea kasi pamarenta Roma. Dia pung nama Sakeos, deng dia orang kaya.

<sup>3</sup> Waktu dia dengar Jesus ada mau lewat, ju dia kapingin lia sang Yesus. Ma dia sonde bisa dapa lia deng bae, tagal orang talalu banya makarubu sang Yesus, deng dia pung badan talalu pende.

<sup>4</sup> Andia ko dia lari-lari lebe dolo, ais nae pi atas satu pohon di jalan pung pinggir, yang Jesus mau lewat.\*

<sup>5</sup> Sampe di bawa itu pohon, ju Jesus lia pi atas. Ais Dia pange sang Sakeos bilang, "Sakeos! Mari, turun su! Capát, te ini hari beta mau manumpang di lu pung ruma."

<sup>6</sup> Sakeos taheran-heran. Ju dia turun capát-capát, ais bawa sang Yesus pi dia pung ruma. Dia pung hati sanáng mau mati.

<sup>7</sup> Ma ada banya orang mangomek bilang, "Cue! Sakeos ni, orang tar bae! Akurang ko Yesus maso pi manumpang di dia pung ruma?! Samua orang su tau na!"

<sup>8</sup> Sampe di ruma ju, Sakeos badiri di Jesus pung muka, ais omong bilang, "Bapa Guru! Mulai ini hari beta bagi dua beta pung harta samua, ko kasi satu bagian pi orang malarat

\* **19:4:** Tulisan bahasa Yunani bilang ini pohon *sukomorea*. Jenis pohon itu sonde ada di Indonesia sablá timur.

dong. Kalo beta parná tagi pajak lebe-lebe, beta bayar kambali sang dong ampa kali lipat.”

<sup>9</sup> Yesus manyao bilang, “Bae. Ini hari Tuhan Allah su kasi salamat sang lu deng lu pung kelu samua, tagal lu parcaya sang Tuhan sama ke ba'i Abraham.

<sup>10</sup> Te Tuhan Allah utus sang Beta jadi Manusia Tulen di ini dunya. Beta datang ko cari orang yang su serong dari Tuhan pung jalan, ko kasi salamat sang dong.”<sup>◊</sup>

*Carita so'al budak yang ator bae-bae dia pung tuan pung doi*

(Mateos 25:14-30)

<sup>11</sup> Itu waktu, ada banya orang yang iko dengar sang Yesus. Dong su mau deka-deka deng kota Yerusalem. Dong ju sangka Dia su mau kasi jalan Tuhan Allah pung parenta di situ, sama ke satu raja. Ais Yesus carita kasi sang dong satu umpama lai,

<sup>12</sup> bilang, “Ada satu orang bésar. Dia mau barangkat pi luar negrí, ko dong lantik sang dia jadi raja. Ais itu, baru dia mau kambali lai jadi raja di dia pung negrí sandiri.

<sup>13</sup> Waktu dia su siap mau jalan, dia pange dia pung orang karjá sapulu orang, ais kasi sang dong satu orang satu doi mas.<sup>†</sup> Dia parenta bilang, ‘Bosong pake ini doi jadi modal. Te nanti kalo beta pulang, bosong lapor bosong su ontong barapa.’ Ais ju dia barangkat.

---

<sup>◊</sup> **19:10:** Mateos 18:11    <sup>†</sup> **19:13:** Tulisan bahasa Yunani bilang dia kasi dong, ‘10 mina’. Satu *mina*, andia 100 *denari*, ko, satu tukang pung gaji 100 hari karjá.

**14** Ma dia pung rakyat dong binci sang dia. Jadi dong kirim utusan pi sana ko kasi tau bilang, ‘Botong sonde mau ini orang pegang parenta kasi botong.’

**15** Biar bagitu ju, ma dong lantik sang dia di sana. Ais ju dia pulang. Sampe di dia pung ruma, ju dia pange ame itu orang karjá sapulu orang dong, ais tanya sang dong bilang, ‘Bosong su ontong barapa dari itu doi mas yang beta kasi sang bosong tu?’

**16** Orang karjá partama lapor bilang, ‘Bapa raja! Beta su dapa ontong sapulu kali dari modal yang beta tarima!’

**17** Ju raja kasi tau sang dia bilang, ‘Bagus! Lu ni, orang karjá yang bae. Tagal beta bisa parcaya sang lu deng hal kici dong, andia ko sakarang beta angka sang lu ko parenta sapulu kota.’

**18** Tarús, orang karjá nomer dua lapor bilang, ‘Bapa raja! Beta dapa ontong lima doi mas dari modal yang beta tarima.’

**19** Ais, itu raja puji sang dia bilang, ‘Bagus! Kalo bagitu, beta angka sang lu ko parenta lima kota.’

**20** Ma orang karjá nomer tiga bawa pulang dia pung doi mas. Ais dia kasi tau bilang, ‘Ini bos pung doi! Beta bungkus, ais sambunyi sang dia bae-bae ko jang ilang.

**21** Beta bekin bagitu, tagal beta taku. Beta tau bapa ni orang karás. Te bapa suka ame apa yang bukan bapa pung, deng ketu ame apa yang bapa sonde tanam.’

**22** Dengar bagitu, ju raja masparak sang dia bilang, ‘Lu ni, kurang ajar! Lu pung omong

su hukum lu pung diri sandiri. Lu kira beta ni orang karás, yang ame apa yang bukan beta pung, deng ketu apa yang beta sonde tanam.

<sup>23</sup> Kalo bagitu, na, akurang ko lu sonde pi simpan ini doi di bank? Ko biar waktu beta pulang, beta bisa dapa dia pung bunga. Biar sadiki ju bae.'

<sup>24</sup> Tarús, itu raja suru orang laen dong di situ bilang, 'Ame dia pung doi tu, ko sarakan kasi orang karjá yang dapa ontong sapulu tadi.'

<sup>25</sup> Ma dong protes bilang, 'Pak! Itu orang su dapa cukup. Akurang ko mau ame dari orang yang pung sadiki, ko kasi tamba sang dia lai?'

<sup>26</sup> Ma itu raja manyao bilang, 'Pikir bae-bae! Te orang yang pintar urus apa yang orang su parcaya kasi dia, nanti dia dapa tamba lai. Ma orang yang malas urus, nanti dong ame bekin abis apa yang dia pung.<sup>☆</sup>

<sup>27</sup> Naa! Sakarang bosong pi tangkap beta pung musu dong yang sonde suka beta jadi raja di sini. Bawa sang dong datang di sini, ais bunu sang dong samua di beta pung muka. Pi su!' "<sup>☆</sup>

*Tuhan Yesus maso pi kota Yerusalem  
(Mateos 21:1-11; Markus 11:1-11; Yohanis 12:12-19)*

<sup>28</sup> Yesus carita abis ju, dong jalan tarús pi Yerusalem. Yesus ada jalan di muka.

<sup>29</sup> Waktu su mau deka-deka deng dua kampong, andia Betfage deng Betania, yang ada di

---

<sup>☆</sup> **19:26:** Mateos 13:12; Markus 4:25; Lukas 8:18      <sup>☆</sup> **19:27:**  
Mateos 25:14-30

gunung Saitun pung pinggar, ju Dia suru Dia pung ana bua dua orang ko jalan lebe dolo.

<sup>30</sup> Dia suru sang dong bilang, "Bosong dua pi kampong yang di muka tu. Nanti bosong dapa lia satu keledai ana ada ta'ika di situ. Orang balóm parná nae sang dia. Bosong buka dia pung tali ko hela bawa datang di sini.

<sup>31</sup> Ma kalo ada yang tanya bilang, 'Akurang ko bosong buka itu keledai pung tali?' na, kasi tau sang dong bilang, 'Botong pung Bos ada mau pake sang dia.'"

<sup>32</sup> Ais dong dua pi, ju katumu itu keledai ana, sama ke Yesus pung omong.

<sup>33</sup> Waktu dong ada lapás itu keledai ana pung tali, ju dia pung tuan tanya sang dong bilang, "Akurang ko bosong lapás ini binatang?"

<sup>34</sup> Ju dong manyao bilang, "Botong pung Bos ada mau pake."

<sup>35</sup> Itu tuan tarima bae, ais dong dua hela bawa itu keledai ana pi sang Yesus. Dong buka dong pung salimut di itu keledai ana pung balakang. Ju dong kasi nae Yesus pi atas.<sup>‡</sup>

<sup>36</sup> Orang banya ju ame dong pung salimut deng salendang, ais buka di jalan, ko sambut sang Yesus sama ke tarima orang bésar.

<sup>37</sup> Waktu Dia mulai jalan turun dari gunung Saitun, ju itu orang banya deng Dia pung ana bua dong mulai ba'eki puji-puji sang Tuhan Allah, tagal samua tanda kuasa yang dong su lia tu.

---

<sup>‡ 19:35:</sup> Di sana, orang bésar nae kuda, ma orang kici nae keledai. Tuhan Yesus nae keledai tu, jadi tanda Dia pung randá hati. Di Sakaria 9:9, ju ada satu janji yang bilang orang Isra'el pung raja nanti mau datang nae keledai.

**38** Dong ba'eki bilang,  
 "Dia ni, Raja yang Tuhan Allah utus datang!  
 Tuhan Allah kasi berkat sang Dia!  
 Sakarang manusia su bisa badame deng  
 Tuhan di sorga.  
 Puji sang Tuhan yang dudu parenta di langit  
 yang paling tinggi."<sup>◊</sup>

**39** Ma ada orang Farisi di itu orang banya dong  
 pung teng-tenga. Dong lapor sang Yesus bilang,  
 "Bapa Guru! Togor ko dong jang batarea bagitu,  
 te ini su talalu!"

**40** Ma Yesus manyao bilang, "Hee! Beta kasi tau  
 memang! Kalo ini orang dong tutu mulu, nanti  
 batu dong yang puji sang Tuhan!"

### *Tuhan Yesus manangis kasi Yerusalem*

**41** Waktu dong su deka-deka maso Yerusalem,  
 Yesus dapu lia itu kota, ju Dia manangis

**42** bilang, "Aduu, orang Yerusalem, é! Beta  
 mau ko ini hari bosong tarima dame yang Beta  
 bawa. Ma tagal bosong sonde toe sang Tuhan,  
 jadi sakarang su talambat. Itu dame su jao dari  
 bosong.

**43** Nanti bosong pung musu dong timbun tana  
 kuliling kota pung tembok, ais dong maso sarang  
 sang bosong.

**44** Dong kasi rubu sang bosong pung kota rata  
 deng tana, ais bunu bosong deng bosong pung  
 ana-ana dong samua. Dong sonde kasi tengah satu  
 batu badiri, tagal Tuhan su datang ko mau kasi  
 salamat sang bosong, ma bosong sonde kanál  
 sang Dia!"

---

<sup>◊</sup> **19:38:** Lagu Puji dong 118:26

*Tuhan Yesus maso pi Ruma Sambayang Pusat  
(Mateos 21:12-17; Markus 11:15-19; Yohanis  
2:13-22)*

<sup>45</sup> Ais ju Yesus maso pi dalam Ruma Sambayang Pusat. Di itu ruma pung kintal, orang su bekin jadi pasar ko jual binatang korban. Lia bagitu ju, Yesus mulai usir kasi kaluar sang dong dari situ.

<sup>46</sup> Dia masparak bilang, “Tuhan pung jubir su tulis memang bilang,

‘Beta kasi bangun ini Ruma,

ko samua orang bisa datang sambayang di sini.’<sup>☆</sup>

Ma bosong su bekin sang dia jadi parampok dong pung tampa bakumpul.”

<sup>47</sup> Ais itu, tiap hari Yesus pi Ruma Sambayang Pusat ko ajar di situ. Ma kapala agama Yahudi pung bos-bos, guru agama deng tua-tua adat Yahudi dong cari-cari jalan ko mau bunu sang Dia.<sup>☆</sup>

<sup>48</sup> Ma dong sonde dapa jalan, tagal itu orang banya dong talalu sanáng dengar Yesus pung omong.

## 20

*Dong baso’al Tuhan Yesus pung hak deng kuasa*

*(Mateos 21:23-27; Markus 11:27-33)*

<sup>1</sup> Satu hari, Yesus pi Ruma Sambayang Pusat, ais ajar Tuhan pung Kabar Bae di dia pung kintal. Ju kapala agama Yahudi pung bos-bos,

---

<sup>☆</sup> **19:46:** Yesaya 56:7; Yeremia 7:11    <sup>☆</sup> **19:47:** Lukas 21:37

guru agama dong, deng tua-tua adat dong datang baso'al deng Dia.

<sup>2</sup> Dong tanya bilang, "Sapa kasi hak sang Lu ko bekin kaco di sini kamaren? Coba kasi tau dolo!"

<sup>3</sup> Ju Yesus manyao bilang, "Beta ju mau tanya satu hal, ais baru Beta manyao sang bosong.

<sup>4</sup> Bagini: bosong kanál sang Yohanis Tukang Sarani, to? Sapa kasi kuasa ko dia sarani orang? Tuhan Allah ko, manusia?"

<sup>5</sup> Ju dong barunding pi-datang, deng ba'omong bilang, "Awe'! Kotong su kaná ni ma. Kalo kotong bilang, 'Tuhan Allah yang suru', nanti Dia balas bilang, 'Kalo bagitu, akurang ko bosong sonde parcaya sang Yohanis?'

<sup>6</sup> Ma kotong ju sonde bisa bilang, 'manusia yang suru', te nanti ini orang dong angka batu ko lempar bekin mati sang kotong. Te dong parcaya bilang, Yohanis tu, Tuhan Allah pung jubir."

<sup>7</sup> Ais dong manyao sang Yesus bilang, "Botong sonde tau."

<sup>8</sup> Ju Yesus balas bilang, "Kalo bagitu, Beta ju sonde mau bilang sapa yang suru sang Beta."

*Carita tukang garap kabón anggor  
(Mateos 21:33-46; Markus 12:1-12)*

<sup>9</sup> Ais ju Yesus carita itu orang banya dong, satu umpama lai bilang, "Ada satu orang yang tanam kabón anggor. Dia kasi sewa itu kabón di tukang garap, ko dong babagi hasil. Tarús dia pinda pi luar negrí ko tengah lama di sana.<sup>◊</sup>

<sup>10</sup> Sampe musim ketu bua anggor ju, itu tuan kabón suru dia pung orang karjá satu ko pi

---

<sup>◊</sup> **20:9:** Yesaya 5:1

tarima dia pung bagian dari itu tukang garap dong. Ma itu tukang garap dong papoko itu orang karjá, ais dong usir buang sang dia pulang deng tangan kosong.

<sup>11</sup> Ais, itu tuan kabón kirim dia pung orang karjá satu pi. Ma itu tukang garap dong papoko sang dia, deng bekin malu sang dia. Ais dong usir pulang sang dia deng tangan kosong.

<sup>12</sup> Ju itu tuan kabón kirim lai dia pung orang karjá nomer tiga pi, ma dong papoko bekin luka sang dia, ais dong buang kaluar sang dia.

<sup>13</sup> Itu tuan kabón dudu pikir-pikir bilang, ‘Beta musti bekin karmana lai? Lebe bae beta kirim beta pung ana sayang sa. Tantu dong hormat deng tarima sang dia deng bae-bae.’ Jadi dia kirim dia pung ana barana pi sana.

<sup>14</sup> Ma waktu itu tukang garap dong lia sang dia, ju dong ba'omong bilang, ‘We, bosong lia dolo! Te bapatua su kirim datang dia pung ana sandiri. Dia yang nanti tarima bapatua pung pusaka samua. Jadi mari ko kotong bunu sang dia su! Biar ko kotong yang soa ini kabón.’

<sup>15</sup> Waktu itu ana sampe ju, dong hela raroso bawa sang dia kaluar dari itu kabón, ais dong bunu bekin mati sang dia.

Naa! Beta mau tanya bagini: bosong pikir itu tuan kabón mau bekin karmana deng itu tukang garap dong?

<sup>16</sup> Iko Beta, pasti dia datang ko bunu sang dong samua, ais dia kasi sewa itu kabón pi orang laen.”

Waktu itu orang dong dengar Yesus omong bagitu, ju dong manyao bilang, “Kalo bisa, na,

Tuhan Allah jang kasi hukum sang botong bagitu!"

<sup>17</sup> Ais Yesus lia karás-karás sang dong, ju tanya bilang, "Kalo sonde jadi kasi hukum bagitu, na, akurang ko Tuhan pung jubir su tulis bilang, 'Ada satu batu yang tukang dong su angka buang,

ma sakarang su jadi tiang induk pung batu alas.'<sup>18</sup>

<sup>18</sup> Orang yang ta'antok di itu batu, pasti ancor, tagal kaná hukum. Deng kalo itu batu jato kaná orang, dia ju ancor abis, tagal kaná hukum."

<sup>19</sup> Waktu guru agama deng kapala agama pung bos-bos dengar itu carita, dong tau bilang, Yesus ada ser sang dong pake itu umpama. Dong parsís sama ke itu tukang garap kabón tu. Jadi dong mara mau mati. Ju dong ator siasat ko mau tangkap sang Dia. Ma dong ada eleng sang orang banya yang suka Yesus pung ajaran. Jadi dong jalan kasi tengah sang Dia sa.

*"Kasi Tuhan Allah apa yang Tuhan Allah pung hak"*

*(Mateos 22:15-22; Markus 12:13-17)*

<sup>20</sup> Ais itu, Yesus pung musu dong ada mama'u sang Dia. Dong cari mata-mata yang bisa bekin diri tingka ke orang alim, ko pi hiki coba sang Yesus. Dong harap Yesus bisa omong lawan pamarenta Roma, ais dong mau pi lapor di gubernor, ko biar dong suru orang pi tangkap sang Yesus.

<sup>21</sup> Ju dong kirim itu mata-mata ko pi baso'al deng Yesus bilang, "Bapa Guru! Botong tau Bapa

---

<sup>18</sup> **20:17:** Lagu Puji dong 118:22

pung hati lurus. Bapa sonde tau putar-balek, deng sonde pili muka. Bapa salalu ajar Tuhan Allah pung Kata-kata deng batúl.

<sup>22</sup> Sakarang botong mau tanya satu hal: iko kotong pung atoran agama Yahudi, kira-kira kotong bole bayar pajak kasi pamarenta Roma pung raja bésar, ko sonde?"

<sup>23</sup> Ma Yesus su tau dong pung maksud jahat ko mau hiki sang Dia. Ju Dia manyao bilang,

<sup>24</sup> "Coba kasi tunju sang Beta doi perak satu dolo." Ju dong kasi tunju itu doi sang Dia. Ais Dia tanya bilang, "Ini, sapa pung gambar ni? Deng ini, sapa pung nama?"

Dong manyao bilang, "Itu raja bésar, keser."

<sup>25</sup> Ju Yesus bilang, "Kalo bagitu, na, kasi pamarenta apa yang pamarenta pung hak. Deng kasi Tuhan Allah apa yang Tuhan Allah pung hak."

<sup>26</sup> Dengar bagitu, ju dong taheran-heran, tagal dong sonde bisa hiki ame sang Dia di muka orang banya. Ju dong tutu mulu su.

*Tuhan Yesus ajar so'al idop kambali dari mati  
(Mateos 22:23-33; Markus 12:18-27)*

<sup>27</sup> Ais itu, ada barapa orang dari partei agama Saduki datang ko mau hiki sang Yesus. Orang Saduki dong ajar bilang, orang mati sonde idop kambali lai di hari kiamat. Dong datang baso'al deng Yesus bilang,<sup>28</sup>

<sup>28</sup> "Bapa Guru! Ba'i Musa su tulis kasi tengah sang kotong atoran bilang: kalo ada laki-laki mati, ma sonde kasi tengah ana, na, itu orang

---

<sup>28</sup> **20:27:** Utusan dong pung Carita 23:8

pung adi musti kawin ame dia pung janda, ko biar kasi turunan sang dia pung kaka yang su mati tu.<sup>30</sup>

<sup>29</sup> Memang dolu ba'i Musa ajar bagitu. Ma sakarang botong ada mau tanya bagini: ada tuju laki-laki basodara. Yang sulung kawin, ma dia mati deng sonde kasi tengana.

<sup>30</sup> Ais dia pung adi yang iko sang dia kawin ame itu janda. Sonde lama, te dia mati, ma sonde kasi tengana.

<sup>31</sup> Bagitu ju deng ana nomer tiga. Dia kawin deng itu janda, ma dia ju mati deng sonde kasi tengana. Bagitu tarús-tarús sampe adi bungsu ju mati.

<sup>32</sup> Tarús itu janda ju mati.

<sup>33</sup> Naa! Sakarang botong mau tanya bagini: itu parampuan su parná kawin deng tuju laki-laki. Nanti kalo dunya kiamat, ais Tuhan kasi idop kambali orang mati dong, na, itu parampuan jadi sapa pung bini?"

<sup>34</sup> Ju Yesus manyao bilang, "Manusia bakawin di ini dunya sa.

<sup>35-36</sup> Ma nanti di sorga orang su sonde bakawin lai. Deng di sana dong su sonde mati lai. Dong su sama ke Tuhan Allah pung ana bua di sorga. Te waktu Tuhan Allah kasi idop kambali orang mati, Dia pili ame sang dong ko jadi Dia pung ana-ana.

<sup>37</sup> Dalam ba'i Musa pung tulisan ada carita pohon kici yang tabakar ma sonde angus. Dari itu carita kotong dapa tau bilang, orang mati bisa idop kambali. Di situ Tuhan Allah kasi tau sang

---

<sup>30</sup> **20:28:** Carita Ulang so'al Jalan Idop 25:5

ba'i Musa bilang, 'Beta ni, lu pung ba'i-ba'i pung Tuhan Allah. Andia ba'i Abraham, ba'i Isak, deng ba'i Yakob. Dong samua sémba tarús sang Beta sampe sakarang.'<sup>38</sup>

<sup>38</sup> Padahal itu ba'i dong su mati dari dolu. Ma tagal Tuhan Allah su bilang Dia masih jadi dong pung Tuhan, andia ko kotong tau bilang, dong ada idop. Jadi biar orang su mati ju, dong idop kambali. Te cuma orang idop yang sémba sang Tuhan Allah, bukan orang mati, to?!"

<sup>39</sup> Dengar Yesus manyao bagitu ju, ada guru agama yang omong bilang, "Bapa Guru pung jawab tu, talalu batúl."

<sup>40</sup> Mulai dari itu waktu ju, sonde ada satu orang yang barani tanya lai sang Yesus, te sonde ada yang bisa hiki ame sang Dia na.

*Kristus tu, memang raja Daud pung turunan,  
deng dia pung Bos ju*

(Mateos 22:41-46; Markus 12:35-37)

<sup>41</sup> Ais itu, Yesus masih ajar itu orang dong di Ruma Sambayang Pusat. Ju Dia so'al bale sang dong bilang, "Iko bosong pung pikiran, karmana? Guru agama dong ajar bilang, Kristus tu, andia Orang yang Tuhan Allah su tunju dari dolu-kala. Iko dong, Dia cuma jadi raja Daud pung turunan sa. Ma itu balóm cukup.

<sup>42</sup> Tagal dolu raja Daud sandiri yang tulis dalam buku Lagu Puji dong bilang,  
'Tuhan Allah su kasi tau sang beta pung Bos bilang,

---

<sup>38</sup> **20:37:** Kaluar dari Masir 3:6

“Mari ko dudu di ini tampa terhormat di  
Beta pung sablá kanan.

<sup>43</sup> Te nanti Beta bekin Lu pung musu dong,  
sampe dong ta'alok sang Lu.’”<sup>◇</sup>

<sup>44</sup> Naa! Dari itu tulisan, kotong dapa tau bilang,  
raja Daud sandiri pange sang Kristus tu bilang,  
'Bos'. Dia pung arti, kalo orang bilang Kristus  
tu, cuma raja Daud pung turunan sa, itu balóm  
cukup! Tagal Dia ju jadi raja Daud pung Bos yang  
hak parenta sang dia na!”

*Ati-ati deng guru agama yang tutu dong pung  
sala*

(Mateos 23:1-36; Markus 12:38-40)

<sup>45</sup> Waktu samua orang ada pasang talinga ko  
dengar sang Yesus, ju Dia omong deng Dia pung  
ana bua dong bilang,

<sup>46</sup> “Bosong musti ati-ati deng guru agama dong.  
Te dong suka pasiar pake baju panjang raroso, pi  
katumu banya orang, ko biar orang lia sang dong  
bilang, 'Awii! Dong tu, orang besar, ó!' Dong  
suka cari tampa yang paling terhormat di rumaruma  
sambayang, di pesta, deng di tampa banya  
orang suka bakumpul.

<sup>47</sup> Ma ati-ati, te dong maen putar-balek sang  
janda dong ko rampas ame dong pung ruma. Ma  
di muka banya orang, dong tutu dong pung jahat  
deng badiri sambayang lama-lama. Dong mau ko  
orang bilang dong tu, orang alim. Ma Tuhan tau  
dong pung sala, jadi nanti Dia kasi hukum yang  
lebe barát sang dong.”

---

<sup>◇</sup> **20:43:** Lagu Puji dong 110:1

# 21

*Janda miskin kasi kolekte yang paling bésar  
(Markus 12:41-44)*

<sup>1</sup> Waktu Yesus ajar di Ruma Sambayang Pusat, Dia dapa lia orang kaya dong datang kasi maso kolekte di peti derma.

<sup>2</sup> Dia ju dapa lia satu janda kasian datang iko sambayang. Dia kasi maso doi dua sen di itu peti. Itu doi pung harga paling kici.

<sup>3</sup> Ais Yesus omong deng Dia pung ana bua dong bilang, “Dengar bae-bae! Ini janda kasian ni cuma kasi maso doi dua sen sa, ma dia su kasi lebe dari samua orang.

<sup>4</sup> Itu orang laen dong kasi maso kolekte dari dong pung doi sisa sa. Ma ini janda ni, dia su kasi abis dia pung doi samua-samua. Padahal itu dia pung doi ko idop.”

*Tuhan Yesus kasi tau Ruma Sambayang Pusat pung rubu*

*(Mateos 24:1-2; Markus 13:1-2)*

<sup>5</sup> Itu waktu, Yesus pung ana bua dong omong puji-puji itu Ruma Sambayang Pusat bilang, “Papa! Lia coba ini Ruma pung bagus lai! Dong bekin sang dia pake batu-batu potong yang paling bésar, ais dong susun deng rapi. Deng ada orang yang su kasi barang mahal ko bekin hias Tuhan pung Ruma ni!”

Ma Yesus manyao bilang,

<sup>6</sup> “Ini rumah memang bagus. Ma sonde lama lai, te orang dong kasi rubu abis ini batu samua, sampe rata.”

*Hari-hari susa deng sangsara  
(Mateos 24:3-14; Markus 13:3-13)*

<sup>7</sup> Ais Yesus pung ana bua dong tanya bilang, “Bapa Guru! Apa yang Bapa omong tadi tu, kira-kira nanti jadi kapan? Kalo dia pung waktu su deka, nanti dia pung tanda-tanda karmana?”

<sup>8</sup> Ju Yesus manyao bilang, “Asal bosong jaga bae-bae ko jang kaná tipu. Te nanti ada macam-macam orang datang puku dada bilang, ‘Beta ni, Kristus.’ Ada ju yang bilang, ‘Hari kiamat su deka-deka datang!’ Ma jang parcaya!”

<sup>9</sup> Kalo bosong dengar kabar bilang, orang dong bakaco deng baparág di mana-mana, na, sonde usa taku. Memang, itu samua musti jadi lebe dolo. Ma hari kiamat balóm sampe.

<sup>10</sup> Nanti satu suku baparág lawan suku laen. Satu negara baparág lawan negara laen.

<sup>11</sup> Nanti ada tana tagoyang yang hebat mati pung. Di mana-mana ada musim lapar yang hebat, deng panyaki bahaya marajalela. Nanti orang ju lia ame hal yang bekin bulu badan badiri, deng tanda-tanda hebat di langit.

<sup>12</sup> Ini hal dong samua balóm jadi abis, ma nanti orang dong tangkap sang bosong, deng siksa sang bosong, tagal bosong parcaya sang Beta. Ais dong sarakan sang bosong pi ko orang dong urus bosong pung parkara di ruma-ruma sambayang, deng tahan sang bosong dalam bui. Dong ju suru sang bosong pi mangada sang raja deng orang pamarenta laen dong. Samua ni, tagal bosong iko sang Beta.

<sup>13</sup> Ma bosong musti pake itu sampat ko kasi tau sang dong Beta pung Kabar Bae.

**14** Jadi sonde usa pikir-pikir lebe dolo bilang, bosong mau bela diri karmana.

**15** Te nanti Beta kasi kata-kata yang pas ko bosong bela diri. Deng bagitu, bosong pung musu dong sonde tau mau bilang apa lai.◊

**16-17** Nanti banya orang binci mati sang bosong, tagal bosong iko sang Beta. Ada dari bosong pung kelu sandiri, tingka ke mama-papa, adikaka, sodara-sodara, deng tamán-tamán dong. Nanti ada dari dong yang cari jalan ko jual buang sang bosong, sampe ada bosong saparu yang kaná bunu.

**18** Ma bosong jang taku, te nanti Tuhan sonde lupa sang bosong. Rambu satu urat ju sonde bisa gugur dari bosong pung kapala, kalo bukan Dia pung mau.

**19** Kalo bosong batahan tarús-tarús, tantu Tuhan Allah kasi salamat sang bosong.”

### *Yerusalem pung jato*

(Mateos 24:15-21; Markus 13:14-19)

**20** Yesus omong tamba bilang, “Kalo bosong lia musu dong su kepung ame kota Yerusalem, bosong tau bilang, dia su mau ancor tu.

**21** Lia bagitu, na, orang di propinsi Yudea bangun lari suda pi gunung. Orang yang di kota ju bangun lari suda. Deng orang yang di kampong sonde usa maso pi kota lai.

**22** Te Tuhan kirim itu hari-hari susa dong ko hukum orang yang sonde mau dengar sang Dia. Itu semua jadi pas deng apa yang Tuhan Allah pung jubir su tulis memang dari dolu.◊

---

◊ **21:15:** Lukas 12:11-12   ◊ **21:22:** Hosea 9:7

**23** Itu waktu, orang yang paling kasian, andia parampuan yang ada dudu parú, deng mama-mama yang ada kasi susu ana mera. Itu waktu, anteru dunya dapa susa, deng orang Yahudi samua sangsara barát, tagal Tuhan Allah mara sang dong.

**24** Nanti musu bunu sang dong saparu, deng tawan saparu, ko jadi budak pi mana-mana di ini dunya. Ais orang asing yang sonde kanál sang Tuhan Allah, datang injá-inja bekin kamomos di kota Yerusalem, deng kuasai kota pung isi, sampe dong pung waktu tu, abis.”

*Manusia Tulen pung datang  
(Mateos 24:29-31; Markus 13:24-27)*

**25** Ais Yesus kasi tau so'al Dia pung datang kambali bilang, “Nanti kalo Manusia Tulen su mau datang kambali, ada tanda-tanda kaluar di matahari, di bulan, deng di bintang dong. Di bumi ju ada tanda, andia laut mangamok deng angin ribut bésar, deng galombang raksasa nae datang. Ini samua bekin manusia dong taku deng bingung, sampe dong sonde tau mau bekin apa lai.◊

**26** Kuasa-kuasa yang ada di langit dong tagoyang harba-biruk. Lia bagitu, orang dong jadi taku mau mati, tagal bumi su mau calaka!

**27** Ais itu, baru orang dapa lia sang Beta, ‘Manusia Tulen, turun datang deng awan’. Beta turun deng kuasa, deng Beta pung hebat samua.◊

---

◊ **21:25:** Yesaya 13:10; Yeskial 32:7; Yoel 2:31; Dunya Model Baru 6:12-13   ◊ **21:27:** Daniel 7:13; Dunya Model Baru 1:7

<sup>28</sup> Kalo ini tanda samua su mulai jadi, na, bosong angka kapala suda, te Tuhan pung waktu su sampe ko kasi salamat sang bosong.”

*Umpama dari pohon*

(*Mateos 24:32-35; Markus 13:28-31*)

<sup>29</sup> Ais itu Yesus angka satu umpama bilang, “Bosong taro kira bae-bae sang pohon dong.

<sup>30</sup> Kalo dong pung daon su mulai kuning, itu jadi tanda bilang, musim panas su deka-deka datang.

<sup>31</sup> Bagitu ju deng itu hari-hari susa dong. Kalo dong su muncul datang, itu jadi tanda bilang, Tuhan Allah pung parenta su deka-deka datang.

<sup>32</sup> Beta kasi tau memang! Dari samua orang yang idop sakarang ni, nanti ada yang balóm mati, te itu hari-hari susa su muncul datang.

<sup>33</sup> Biar langit deng bumi su ilang, ma Beta pung Kata-kata batahan tarús.”

*Bosong parlú jaga-jaga Tuhan pung datang*

<sup>34</sup> Ais Yesus sambung Dia pung omong bilang, “Jaga-jaga, te takuju sa Beta su muncul datang! Jang sampe bosong su sonde tau pikir deng batúl lai, ais bosong ada idop deng minum mabo, deng barepot cari idop ena-ena sa. Jang sampe bosong sonde baca dia pung tanda, tagal bosong batasibu deng urusan laen.

<sup>35</sup> Jang pikir bosong sonde kaná. Te Beta datang takuju. Deng kalo Beta datang kambali, sonde ada satu orang ju yang bisa sambunyi diri dari Beta pung muka.

<sup>36</sup> Jadi jaga-jaga tarús. Sambayang jang putus-putus, ko biar bosong bisa batahan di teng-tenga

itu susa samua. Deng bagitu, kalo Beta su datang kambali, bosong sonde malu badiri di Manusia Tulen pung muka.”

<sup>37</sup> Tiap hari Yesus pi ajar di Ruma Sambayang Pusat. Ma kalo su malam Dia kaluar dari Yerusalem ko pi tidor di kampong di gunung Saitun situ.<sup>◊</sup>

<sup>38</sup> Papagi sakali, banya orang dong su datang bakumpul, ko mau dengar Dia ajar di Ruma Sambayang Pusat.

## 22

*Kapala agama Yahudi pung bos-bos cari jalan  
ko mau bunu sang Tuhan Yesus*

(Mateos 26:1-5; Markus 14:1-2; Yohanis 11:45-53)

<sup>1</sup> Itu waktu, su deka deng orang Yahudi dong pung hari bae, andia pesta Roti Sonde Pake Ragi. Di itu hari bae, dong ju horo domba ko bekin pesta Paska. Dong bekin bagitu ko inga tempo dolu, waktu dong pung nene-moyang kaluar dari Masir.<sup>◊</sup>

<sup>2</sup> Itu waktu, kapala agama Yahudi pung bos-bos, deng guru agama dong ada cari-cari jalan ko mau bunu sang Yesus. Ma dong taku itu orang banya bekin kaco, tagal dong suka dengar sang Dia.

*Yudas jual buang sang Tuhan Yesus*

(Mateos 26:14-16; Markus 14:10-11)

<sup>3</sup> Dari Yesus pung ana bua dua blas orang dong, satu pung nama Yudas Iskariot. Waktu kapala

---

<sup>◊</sup> **21:37:** Lukas 19:47    <sup>◊</sup> **22:1:** Kaluar dari Masir 12:1-27

agama Yahudi pung bos-bos cari jalan ko mau bunu sang Jesus, setan dong pung bos ada maso pi Yudas pung hati.

<sup>4</sup> Ais dia kaluar pi cari kapala agama pung bos-bos deng kapala jaga Ruma Sambayang Pusat. Dia mau basakongkol ko jual buang sang Jesus kasi dong.

<sup>5</sup> Waktu itu bos-bos dong dengar Yudas pung omong bagitu, ju dong sanáng mau mati. Dong janji bilang, “Neu! Kalo lu mau jual Jesus kasi sang botong, pasti botong bayar.”

<sup>6</sup> Yudas satuju. Ju dia mulai cari-cari salák ko jual buang diam-diam sang Jesus kasi sang dong, ko biar orang banya dong sonde tau.

*Tuhan Jesus pung ana bua dong sadia pesta Paska*

*(Mateos 26:17-25; Markus 14:12-21; Yohanis 13:21-30)*

<sup>7</sup> Ju orang Yahudi pung hari bae tu su sampe, ko dong mau horo domba ana ko bekin pesta Paska.

<sup>8</sup> Ais Jesus suru Petrus deng Yohanis bilang, “Bosong dua pi lebe dolo, ko sadia kasi kotong makan pesta Paska sama-sama.”

<sup>9</sup> Ju dong dua tanya bilang, “Papa! Botong musti pi ator meja di mana?”

<sup>10</sup> Dia manyao bilang, “Kalo bosong maso pi dalam kota Yerusalem, nanti bosong dapa katumu satu laki-laki ada masa'a kumbang aer. Pi iko sang dia sampe di ruma.

<sup>11</sup> Kasi tau tuan ruma di situ bilang, ‘Botong pung Bapa Guru ada minta kamar ko mau pake

bekin pesta Paska deng Dia pung ana bua dong.  
Ada, ko?’

<sup>12</sup> Nanti itu tuan ruma kasi tunju sang bosong  
satu kamar luas di lante atas. Dia su sadia  
langkáp itu kamar. Tenga cuma bosong dua pi  
sadia makan di situ sa.”

<sup>13</sup> Ais dong dua pi. Ju dong katumu deng  
samua yang Yesus su kasi tau memang sang  
dong. Ju dong sadia makan Paska di situ.

*Pesta Paska*  
(*Mateos 26:26-30; Markus 14:22-26; 1 Korintus 11:23-25*)

<sup>14</sup> Waktu samua su siap, Yesus dong datang.  
Dia ame tampa di meja, deng Dia pung utusan  
dong ju dudu makan pesta.

<sup>15</sup> Ju Yesus kasi tau sang dong bilang, “Beta su  
talalu kapingin dudu makan ini pesta Paska deng  
bosong, lebe dolo dari Beta dapa sangsara.

<sup>16</sup> Tanda ini bae-bae. Te abis ini, Beta su sonde  
dudu makan ulang pesta Paska deng bosong lai.  
Nanti orang tau deng taráng-taráng bilang, Bapa  
ada pegang parenta, baru Beta makan pesta  
ulang lai.”

<sup>17</sup> Tarús Dia angka ame galás yang ada isi bua  
anggor pung aer. Ais Dia minta tarima kasi sang  
Tuhan Allah, ju sorong itu galás kasi sang dong.  
Tarús Dia omong bilang, “Tarima ini galás, ko  
bosong satu-satu minum.

<sup>18</sup> Inga, é! Mulai ini malam, Beta su sonde  
minum aer anggor lai. Nanti orang tau deng  
taráng-taráng bilang, Bapa ada pegang parenta,  
baru Beta minum lai.”

**19** Ais Dia angka ame roti satu balok, ju Dia minta tarima kasi sang Tuhan Allah. Ais Dia bekin pica-pica itu roti, ju sorong kasi sang dong. Dia bilang, “Ini roti ni, Beta pung badan yang Beta sarakan kasi sang bosong samua. Tiap kali bosong makan ini roti, bosong musti inga sang Beta.”

**20** Waktu dong su makan abis, ju Dia angka ame galás isi aer anggor. Tarús Dia omong lai bilang, “Ini anggor ni, Beta pung dara, yang tapo'a ko kasi salamat sang bosong. Tuhan Allah pake ini dara ko ika janji baru deng bosong.◊

**21** Ma ati-ati, te ada orang yang sakarang dudu sama-sama di ini meja, yang nanti jual buang sang Beta.◊

**22** Memang Beta, Manusia Tulen, musti mati iko Tuhan Allah pung mau. Ma orang yang jual buang sang Beta tu, awas! Te nanti dia pikol dia pung calaka!”

**23** Dengar bagitu, ju Yesus pung ana bua dong mulai batanya bilang, “Kira-kira sapa yang mau bekin jahat sang Dia bagitu?”

*Tuhan Yesus pung ana bua dong bakanjar so' al sapa yang paling besar*

**24** Ju Yesus pung ana bua dong mulai bakanjar bilang, sapa dari dong yang paling besar.◊

**25** Ma Yesus togor sang dong bilang, “Di suku-bangsa yang sonde kanál sang Tuhan, raja dong tendes dong pung rakyat deng parenta lebe-lebe.

◊ **22:20:** Yeremia 31:31-34    ◊ **22:21:** Lagu Puji dong 41:10

◊ **22:24:** Mateos 18:1; Markus 9:34; Lukas 9:46

Padahal dong mau ko rakyat subu sang dong bilang, ‘Bapa yang tolong rakyat’.

<sup>26</sup> Ma bosong sonde bole bagitu. Yang mau jadi orang bésar, dia pung idop musti batúl-batúl jadi sama ke orang kici ko layani samua orang. Yang mau jadi bos musti layani sama ke tukang surusuru.<sup>☆</sup>

<sup>27</sup> Bosong pikir coba, orang bésar tu, yang mana? Orang yang dudu di meja, ko, yang layani meja? Su tantu orang yang dudu tu, dia yang orang bésar, to? Padahal Beta sonde bekin diri bagitu. Beta datang ko layani sang bosong.<sup>☆</sup>

<sup>28</sup> Bosong ni yang salalu sama-sama deng Beta waktu Beta kaná sungsara.

<sup>29</sup> Beta pung Bapa su angka sang Beta ko pegang parenta di Dia pung karaja'an. Jadi sakarang Beta ju angka sang bosong,

<sup>30</sup> ko biar nanti bosong dudu makan satu meja deng Beta di sorga. Beta ju kasi kuasa ko bosong parenta dua blas suku yang ada di Isra'el.”<sup>☆</sup>

*Tuhan Yesus kasi tau nanti Petrus manyangkal sang Dia*

*(Mateos 26:31-35; Markus 14:27-31; Yohanis 13:36-38)*

<sup>31</sup> Ais Yesus kasi tau sang Petrus bilang, “Pe'u. Setan dong pung bos ada mau coba kasi pisa bosong samua dari Beta, sama ke orang tapis barás ko kasi pisa dia pung katák dari barás.\*

---

<sup>☆</sup> **22:26:** Mateos 20:25-27, 23:11; Markus 9:35, 10:42-44    <sup>☆</sup> **22:27:**

Yohanis 13:12-15    <sup>☆</sup> **22:30:** Mateos 19:28    \* **22:31:** Di tulisan bahasa Yunani, dong subu Petrus pung nama laen, andia Simon.

<sup>32</sup> Ma Beta ada sambayang kasi sang lu, Pe'u, ko biar lu parcaya tarús sang Beta. Nanti kalo lu su kembali datang di Beta, na, lu musti kasi kuat lu pung sodara dong pung hati.”

<sup>33</sup> Ju Petrus manyao bilang, “Sonde, Papa! Beta sonde akan kasi tengah sang Papa. Te beta sadia maso bui sama-sama deng Papa. Biar mati sama-sama deng Papa ju, bae.”

<sup>34</sup> Ma Yesus manyao bilang, “Pe'u! Dengar bae-bae. Ini malam, ayam balóm kokore'o, ma lu su manyangkal tiga kali bilang, lu sonde kanál sang Beta.”

*Tuhan Yesus pung orang musti siap kaná susa*

<sup>35</sup> Ais ju Yesus omong sang dong bilang, “Tempo hari, waktu Beta utus sang bosong ko pi kasi tau Beta pung Kabar Bae pi mana-mana, Beta bilang bosong sonde usa bawa doi, tas, deng sandal. Itu waktu, bosong ada kurang apa?”

Ju dong manyao rame-rame bilang, “Tempo hari, botong sonde kurang satu apa ju!”<sup>☆</sup>

<sup>36</sup> Ais Dia omong tamba bilang, “Ma sakarang su laen. Kalo bosong ada doi, na, bawa. Kalo ada tas, na, bawa ju. Kalo sonde ada kalewang, na, pi jual bosong pung baju satu, ko béli.

<sup>37</sup> Te orang Yahudi dong anggap Beta ke orang jahat. Ais sabantar lai dong datang tangkap sang Beta. Te itu kaná pas deng apa yang ba'i Yesaya su tulis memang bilang:

‘Dong cap ame sang Dia sama ke orang jahat!’”<sup>☆</sup>

---

<sup>☆</sup> **22:35:** Mateos 10:9-10; Markus 6:8-9; Lukas 9:3, 10:4    <sup>☆</sup> **22:37:**  
Yesaya 53:12

**38** Dong kasi tau bilang, “Papa! Botong ada bawa parang dua.”

Ju Yesus manyao bilang, “Cukup su. Sonde usa omong itu lai!”

*Tuhan Yesus pi sambayang di gunung Saitun  
(Mateos 26:36-46; Markus 14:32-42)*

**39** Abis makan Paska ju, Yesus deng Dia pung ana bua dong kaluar pi gunung Saitun, sama ke biasa.

**40** Sampe di situ ju, Dia kasi tau sang dong bilang, “Bosong musti sambayang ko biar bosong jang kaná coba'an.”

**41** Ais Dia ondor dari dong sadiki. Dia jalan sonde talalu jao, ju tikam lutut ko sambayang bilang,

**42** “Papa! Kalo Papa mau, na, angka buang jao-jao ini sangsara dari Beta. Ma jang iko Beta pung mau; biar iko Papa pung mau sa.”

**43** [Ais Tuhan pung ana bua satu dari sorga datang ko kasi kuat Dia pung hati.

**44** Te Dia su sangsara satenga mati, sampe Dia pung karingat tetes kaluar sama ke dara.]†

**45** Sambayang abis, ju Dia bangun ko pi katumu deng Dia pung ana bua dong. Ma dong ada tidor, tagal dong talalu cape deng hati susa.

**46** Ais Yesus togor bilang, “Naa! Akurang ko bosong ada tidor?! Lebe bae bosong sambayang ko biar coba'an datang, na, bosong sonde jato.”

---

† **22:44:** Tulisan bahasa Yunani yang paling tua deng yang paling bae sonde tulis ayat 43-44 ni.

*Dong tangkap sang Tuhan Yesus  
(Mateos 26:47-56; Markus 14:43-50; Yohanis 18:3-11)*

**47** Yesus masih omong bagitu, te Yudas (satu dari ana bua dua blas orang tu), datang deng bawa orang banyak. Dia datang deka-deka sang Yesus ko mau paló-ciom sang Dia.

**48** Ma Yesus togor sang dia bilang, “We, Yudas! Lu mau jual buang sang Manusia Tulen ni pake ciom, ko?”

**49** Waktu Yesus punya ana bua laen dong dapa tau Yudas punya akal jahat bagitu, ju dong tanya sang Yesus bilang, “Papa! Botong lawan sang dong sa, ko? Te botong ada bawa parang.”

**50** Ju satu dari dong cabu dia punya parang, ais potong bekin putus satu orang punya daon talinga sablá kanan. Itu orang tu, kapala agama Yahudi punya bos besar punya orang suru-suru.

**51** Ma Yesus manyao bilang, “Suda lai! Jang lawan sang dong!” Ju Dia sonto itu orang punya talinga, ais bekin bae sang dia.

**52** Orang-orang yang datang tangkap Yesus tu andia: kapala agama Yahudi punya bos-bos, tua-tua adat, tukang jaga Ruma Sambayang Pusat, deng orang laen lai. Yesus tanya sang dong bilang, “Karmana? Bosong pikir Beta ni, orang jahat, sampe bosong datang tangkap sang Beta pake kalewang deng kayu kudung, ko?

**53** Tiap hari Beta ajar sang bosong di Ruma Sambayang Pusat, ma sonde ada satu orang datang tangkap sang Beta ju. Ma biar sa! Ini,

bosong pung waktu su. Sakarang setan dong pung bos yang pung kuasa ni!”<sup>53</sup>

*Petrus manyangkal sang Tuhan Yesus  
(Mateos 26:57-58, 69-75; Markus 14:53-54, 66-72; Yohannis 18:12-18, 25-27)*

<sup>54</sup> Ais dong tangkap ame sang Yesus, ju dong hela bawa sang Dia pi kapala agama Yahudi pung bos besar pung ruma. Petrus ju ada iko sambunyi-sambunyi dari balakang.

<sup>55</sup> Di itu ruma pung kintal orang ada bekin api unggun. Petrus ju pi iko dudu panggang api di situ.

<sup>56</sup> Ada satu hamba parampuan dapa lia sang Petrus dudu deka api. Dia lia bae-bae Petrus pung muka, ais dia lapor kasi tau orang laen di situ bilang, “Hee! Ini orang ju iko-iko sang Yesus!”

<sup>57</sup> Ma Petrus manyangkal bilang, “Sonde! Beta sonde kanál itu Orang ma. Lu ada tau apa?”

<sup>58</sup> Sonde lama, ju ada satu orang buang mata ko lia sang Petrus, abis omong bilang, “Memang, lu ni, satu dari Yesus pung orang dong, to?”

Ma Petrus protes bilang, “Sonde! Lu sam-barang sa!”

<sup>59</sup> Kira-kira satu jam lai ju, ada satu orang laen lai omong bilang, “Woi! Beta tau, ini orang ni, Yesus pung ana bua satu, te dia ju orang Galilea.”

<sup>60</sup> Ma Petrus manyangkal deng karás bilang, “Lu omong kosong tu!” Pas Petrus omong bagitu, ju ayam kokore'o.

---

<sup>53</sup> **22:53:** Lukas 19:47, 21:37

**61** Ju Yesus bale muka ko lia sang dia. Ais Petrus inga Yesus pung omong tadi tu bilang, “Ini malam, ayam balóm kokore'o, ma lu su manyangkal sang Beta tiga kali.”

**62** Inga ame bagitu, ju Petrus jalan kaluar dari itu kintal deng manangis makarereu.

*Dong papoko deng hina sang Tuhan Yesus  
(Mateos 26:67-68; Markus 14:65)*

**63** Ais, itu orang yang jaga sang Yesus mulai olok-olok sang Dia, deng papoko barmaen sang Dia.

**64** Tarús dong tutu ame Dia pung mata pake kaen, ais dong tanya bilang, “Hoi! Kalo lu jadi Tuhan pung jubir, na, coba lu rai! Sapa yang falungku sang lu?”

**65** Ais ju dong maki ancor sang Dia.

*Tuhan Yesus di tampa urus parkara agama  
(Mateos 26:59-66; Markus 14:55-64; Yohanis 18:19-24)*

**66** Papagi sakali, kapala agama Yahudi pung bos-bos, guru agama, deng tua-tua adat dong su bakumpul ko urus Yesus pung parkara. Ais dong suru ko orang hela bawa Yesus datang di tampa urus parkara agama.

**67** Waktu Dia su maso, ju dong tanya sang Dia bilang, “Coba lu kasi tau dolu! Lu ni memang batúl-batúl itu Kristus, ko?”

Ju Yesus manyao bilang, “Biar Beta manyao batúl ju, bosong sonde parcaya.

**68** Ais kalo Beta tanya bale sang bosong satu hal, pasti bosong sonde manyao.

<sup>69</sup> Sonde lama lai, Tuhan Allah mau pake Dia pung kuasa hebat, ko angka nae sang Beta, Manusia Tulen ni. Ais Beta dudu di Dia pung sablá kanan ko parenta sama-sama deng Dia.”<sup>☆</sup>

<sup>70</sup> Dengar bagitu, ju dong samua tanya bilang, “Kalo bagitu, lu pikir lu ni, Tuhan Allah pung Ana, ko?”

Ju Yesus manyao bilang, “Memang, bosong pung omong bagitu, batúl.”

<sup>71</sup> Ju itu orang yang urus parkara dong rame-rame omong bilang, “Kotong samua su dengar sandiri, wuang? Dia angka diri jadi Tuhan Allah pung Ana. Ini, hojat! Iko kotong pung atoran agama, kalo ada orang bekin diri sama ke Tuhan, itu orang musti mati. Jadi karmana? Kotong sonde parlú saksi lai. Hukum mati sang Dia su!”

## 23

*Dong bawa sang Tuhan Yesus pi gubernor Pilatus*

(Mateos 27:1-2, 11-14; Markus 15:1-5; Yohanis 18:28-38)

<sup>1</sup> Ma, yang urus parkara agama Yahudi dong tu, sonde ada pung hak ko hukum mati orang. Andia ko dong bawa sang Yesus pi mangada sang gubernor dari pamarenta Roma di situ, andia Pilatus. Dong mau ko gubernor yang hukum sang Dia.

<sup>2</sup> Jadi sampe di gubernor pung muka, ju dong kasi tau Yesus pung sala-sala dong bilang, “Ini orang ni, tukang lawan pamarenta Roma. Dia ajar bilang, orang jang bayar pajak kasi

---

<sup>☆</sup> 22:69: Lagu Puji dong 110:1

pamarenta. Dia ju angka diri bilang dia ni, Kristus, orang Yahudi pung raja.”

<sup>3</sup> Dengar bagitu, ju gubernor tanya sang Dia bilang, “Batúl, ko? Lu ni, orang Yahudi pung raja, ko?”

Tarús Yesus manyao bilang, “Batúl. Sama ke pak omong tu.”

<sup>4</sup> Pareksa abis, ju gubernor mangada itu kapala agama pung bos-bos deng itu orang banya. Ais dia bilang, “Bagini. Beta sonde dapa ini Orang pung sala sadiki ju.”

<sup>5</sup> Ma dong batahan bilang, “Sonde, pak gub. Ini orang pi ajar di mana-mana, tusu-tusu rakyat ko marontak. Dia bekin kaco mulai dari propinsi Galilea sampe di kota Yerusalem sini.”

### *Gubernor kirim Tuhan Yesus pi raja Herodes*

<sup>6</sup> Dengar bagitu ju, gubernor tanya sang dong bilang, “Kalo bagitu, dia ni, orang Galilea, ko?”

Ju dong manyao bilang, “Batúl, pak. Dia dari Galilea!”

<sup>7</sup> Dapa tau bagitu ju, gubernor suru dong antar sang Yesus pi mangada sang raja Herodes, yang parenta propinsi Galilea. Itu waktu, dia ada di kota Yerusalem.

<sup>8</sup> Naa, raja Herodes su dengar banya carita so'äl Yesus, deng dia su kapingin lia sang Yesus dari dolu. Dia ada harap-harap ko bisa lia Yesus kasi tunju satu-dua tanda heran. Andia ko, waktu dong antar Yesus pi sang dia, dia pung hati sanáng.

<sup>9</sup> Ju Herodes tanya macam-macam hal sang Yesus, ma Dia sonde manyao apa-apa.

**10** Herodes masih ba'omong deng Yesus, ma kapala agama pung bos-bos deng guru agama dong mulai omong ulang lai Yesus pung sala macam-macam sang raja.

**11** Ais raja Herodes deng dia pung tantara dong mulai iko ejek deng olok-lolok bekin hina sang Yesus. Ju dong kasi pake sang Dia satu baju bagus sama ke raja dong biasa pake, ais dong ejek tarús. Ais dong kirim pulang sang Dia pi gubernor Pilatus.

**12** Dolu itu gubernor deng raja Herodes bamusu. Ma mulai itu hari dong dua basobat.

*Gubernor kasi jato hukum mati sang Tuhan Yesus*

*(Mateos 27:15-26; Markus 15:6-15; Yohanis 18:39—19:16)*

**13** Ais ju gubernor Pilatus pange itu kapala agama Yahudi pung bos-bos deng tua-tua adat laen dong, sama-sama deng itu orang banyak, ko datang bakumpul dengar dia pung putusan.

**14** Dia omong bilang, "Bosong bawa Yesus datang sang beta, deng tudu sang Dia bilang, Dia suka tusu-tusu rakyat ko malawan pamarenta Roma. Beta su pareksa sang Dia alus-alus di bosong pung muka, ma beta sonde dapa Dia pung sala apa-apa.

**15** Raja Herodes su pareksa sang Dia lai, ma sonde dapa Dia pung sala apa-apa ju. Andia ko dia kirim kembali ini Orang sang beta. Ini Orang sonde ada pung sala apa-apa, jadi beta sonde bisa hukum mati sang Dia.

**16** Jadi beta mau putus bagini: beta suru firuk sang Dia, ais beta lapás sang Dia."

**17-18** Dendar bagitu, ju dong mulai batarea rame-rame bilang, "Sonde bisa! Bunu sang Dia. Lapás sang Barabas sa."

[Dong batarea bagitu, tagal tiap taon kalo orang Yahudi dong bekin pesta Paska, gubernor biasa lapás satu orang bui iko dong pung mau.]\*

**19** (Barabas ni, maso bui tagal dia jadi tukang kipas, marontak lawan pamarenta Roma di kota Yerusalem, deng dia ju bunu orang.)

**20** Ma gubernor mau lapás sang Yesus. Jadi dia tanya ulang sang orang banya dong bilang, "Karmana kalo beta lapás sang Yesus ni?"

**21** Ma dong samua batarea rame-rame bilang, "Sonde! Paku bekin mati sang Dia di kayu palang sa! Paku bekin mati sang Dia di kayu palang!"

**22** Ma gubernor rasa itu sonde batúl, ais dia tanya ulang lai kali yang katiga bilang, "Akurang ko beta musti paku bekin mati sang Dia bagitu? Dia pung jahat apa? Beta su pareksa sang Dia, ma beta sonde dapa satu alasan ju, ko mau hukum bekin mati sang Dia. Jadi biar ko beta suru firuk sang Dia sa, ais lapás sang Dia."

**23** Ma itu orang samua batarea lebe kuat lai, ko paksa mau paku bekin mati sang Dia di kayu palang. Ahirnya, gubernor sonde bisa tahan,

**24** ju dia putus iko dong pung mau sa.

**25** Ais dia lapás sang Barabas, yang tukang marontak deng tukang bunu orang tu. Ma dia sarakan Yesus pi dong pung tangan, ko biar dong bekin sang Dia iko dong pung mau.

\* **23:17-18:** Ayat dalam kurung ni, sonde ada di tulisan bahasa Yunani yang paling tua dong.

*Dong paku tagantong sang Tuhan Yesus di kayu palang  
 (Mateos 27:32-44; Markus 15:21-32; Yohanis 19:17-27)*

**26** Ais itu, tantara Roma dong hela bawa sang Yesus kaluar dari kota Yerusalem. Di tengah jalan dong katumu satu orang dari kota Kirene, nama Simon. Dia baru datang dari luar kota. Dong paksa sang dia ko pikol ganti Yesus pung kayu palang, ais jalan iko Yesus pung balakang.

**27** Itu hari, banya orang datang iko manonton sang Yesus. Ada ju mama-mama yang manangis makarereu sang Dia.

**28** Dengar dong manangis bagitu, ju Yesus mangada sang dong, ais omong bilang, “We! Mama-mama dari Yerusalem. Sonde usa manangis kasi Beta. Lebe bae manangis kasi bosong pung diri sandiri, deng bosong pung ana-ana dong.

**29** Te nanti beso-lusa susa bésar mau datang, sampe orang omong bilang, ‘Parampuan yang paling barontong, andia parampuan yang sonde parná barana, deng yang sonde parná kasi susu ana mera.’

**30** Waktu itu susa bésar datang, orang dong sangsara mau mati, sampe dong minta bilang, ‘Lebe bae, gunung-gunung rubu datang ko tendes ame sang botong su!’ Dong ju omong bilang, ‘Deng sangsara bagini, lebe bae bukit-bukit kubur ame sang botong su!’<sup>30</sup>

**31** Naa, kalo orang bisa bekin susa bagini buat orang yang sonde ada pung sala, apalai deng

---

<sup>30</sup> **23:30:** Hosea 10:8; Dunya Model Baru 6:16

orang jahat?"<sup>†</sup>

**32** Waktu tantara dong bawa sang Yesus tu, dong ju hela bawa dua orang jahat ko mau hukum bekin mati sama-sama deng Dia.

**33** Dong sampe di satu tampa, nama ‘Tulang Kapala’. Ju dong paku sang Yesus deng itu dua orang jahat, di dong satu-satu pung kayu palang. Ais dong tanam kasi badiri itu kayu palang dong. Dong paku tagantong orang jahat satu di Yesus pung sablá kanan, deng yang satu lai di Dia pung sablá kiri.

**34** [Itu waktu, Yesus sambayang bilang, “Bapa! Lupa buang ini orang dong pung sala, te dong sonde tau apa yang dong bekin.”]<sup>‡</sup> Ais ju tantara dong hela lot ko mau tau sapa yang dapa Dia pung pakean.<sup>§</sup>

**35** Banya orang datang manonton di itu tampa. Orang Yahudi pung bos-bos dong olok-olok sang Yesus bilang, “Dia su kasi salamat orang laen, ma sonde bisa kasi salamat Dia pung diri sandiri. Kalo Dia ni batúl-batúl Kristus, yang Tuhan Allah su pili memang, na, tengen ko Dia turun sandiri dari itu kayu palang suda.”<sup>¶</sup>

**36** Itu tantara dong ju ejek sang Dia. Dong kasi minum sang Dia anggor asam,<sup>§</sup>

<sup>†</sup> **23:31:** Tulisan bahasa Yunani asli bilang, “Kalo orang bisa bekin bagini kasi pohon yang masih idop, apalai deng pohon yang su mati.”    <sup>‡</sup> **23:34:** a: Kalimat dalam kurung ni, sonde ada dalam banya tulisan bahasa Yunani yang paling tua deng yang paling bae.    <sup>§</sup> **23:34:** Lagu Puji dong 22:19    <sup>§</sup> **23:35:** Lagu Puji dong 22:8    <sup>§</sup> **23:36:** Lagu Puji dong 69:22

**37** deng batarea olok-olok bilang, “Kalo lu ni batúl-batúl orang Yahudi pung raja, na, kasi salamat lu pung diri suda!”

**38** Dong tulis di satu papan bilang,  
“Ini orang Yahudi pung raja.”

Tarús dong paku itu papan di Yesus pung atas kapala, ko kasi tau alasan dong hukum sang Dia.

**39** Satu orang jahat yang paku tagantong di Yesus pung sablá ju iko ejek bilang, “Lu batúl Kristus, ko? Kalo bagitu, na, kasi salamat sang kotong samua su!”

**40** Ma itu orang jahat satu togor sang dia bilang, “Weh! Lu ni, sonde taku sang Tuhan Allah, ko? Te lu ju dapa hukum mati sama ke Dia.”

**41** Kotong dua kaná hukum pas deng kotong pung jahat. Ma ini Orang sonde bekin jahat apa-apa.”

**42** Ju dia omong tamba bilang, “Yesus, é! Nanti kalo Pak su maso pi Pak pung karaja'an, na, inga sang beta, é.”

**43** Yesus manyao bilang, “Beta janji! Ini hari ju, lu maso pi dalam sorga sama-sama deng Beta.”

*Tuhan Yesus mati  
(Mateos 27:45-56; Markus 15:33-41; Yohanis 19:28-30)*

**44-45** Itu waktu, su tengah hari. Ma matahari sonde bacaya, ais galáp gulita tutu ame itu tampa sampe jam tiga sore. Di Ruma Sambayang Pusat ada gorden besar yang tagantong ko pele Tuhan Allah pung Kamar yang Paling Barisi. Takuju sa, itu gorden tarobe putus bagi dua. <sup>◊</sup>

---

<sup>◊</sup> **23:44-45:** Kaluar dari Masir 26:31-33

**46** Di itu tampa ‘Tulang Kapala’, ju Yesus batarea bilang, “Bapa! Sakarang Beta sarakan Beta pung roh pi Bapa pung tangan.” Dia omong abis bagitu, ju Dia pung napas putus memang.◊

**47** Ada komandán tantara Roma yang badiri deka di Yesus pung kayu palang. Waktu dia lia Yesus pung mati tu, ju dia puji Tuhan Allah bilang, “Awii! Ini Orang batúl-batúl Orang hati lurus, é!”§

**48** Waktu orang banya yang bakumpul di situ dapa lia Yesus pung mati ju, dong manyasal, ais pulang deng hati susa.

**49** Ma Yesus pung orang dong ada badiri dari jao, ko lia Dia pung mati. Mama-mama yang iko sang Dia dari Galilea sampe di Yerusalem, ju ada di situ.◊

*Dong kubur sang Tuhan Yesus  
(Mateos 27:57-61; Markus 15:42-47; Yohanis 19:38-42)*

**50-51** Waktu Yesus su mati, ju ada satu orang cari jalan ko mau kasi turun Dia pung mayat dari kayu palang ko kubur bae-bae sang Dia. Itu orang pung nama Yusuf, dari kota Arimatea. Dia pung hati lurus, bekin banya hal yang bae. Dia ada tunggu-tunggu ko Tuhan Allah kasi tunju Dia pung pegang parenta. Dia ju anggota yang dudu urus parkara agama Yahudi, ma dia sonde satuju deng dong pung putusan ko hukum mati sang Yesus.

---

◊ **23:46:** Lagu Puji dong 31:5    § **23:47:** Kata bahasa Yunani di sini, dia pung arti ju bisa bilang, “Ini Orang sonde ada pung sala.”    ◊ **23:49:** Lukas 8:2-3

**52** Tagal dia mau kasi turun Yesus pung mayat dari kayu palang, andia ko dia pi mangada sang gubernor Pilatus ko minta mau urus itu mayat.

**53** Dapa isin ju, dia pi kasi turun. Ais dia bungkus itu mayat deng kaen alus. Tarús dia pi taro itu mayat dalam satu lobang batu, yang orang baru pahat abis. Itu tampa kubur tu, balóm ada yang pake.

**54** Yesus pung mati tu, kaná deng hari Jumat. Waktu Yusuf dong su kubur abis tu, hari su sore. Kalo matahari su tanggalám, na, orang Yahudi pung hari sambayang su mulai.

**55** Itu mama-mama yang datang sama-sama deng Yesus dari Galilea, dong ju pi iko sang Yusuf ko mau tau dia taro itu mayat di kubur mana.

**56** Lia bae-bae itu kubur pung tampa, ais itu mama dong pulang ko sadia rampe deng minya wangi. Waktu matahari tanggalám, ju dong barenti karjá, iko orang Yahudi pung atoran hari sambayang. Dong tunggu hari sambayang lewat, baru dong mau pi siram Yesus pung mayat.◊

## 24

*Tuhan Yesus idop kambali!*

(Mateos 28:1-10; Markus 16:1-8; Yohanis 20:1-10)

**1** Hari Minggu amper siang, itu mama dong bawa itu minya wangi deng rampe ko pi Yesus pung kubur.

---

◊ **23:56:** Kaluar dari Masir 20:10; Carita Ulang so'al Jalan Idop 5:14

<sup>2</sup> Sampe deng sampe ju, dong dapa lia batu besar yang dong pake ko tutu itu kubur pung pintu, su taguling pi pinggir.

<sup>3</sup> Tarús dong maso pi dalam kubur, ma dong sonde dapa lia Yesus pung mayat di situ.

<sup>4</sup> Jadi dong tabingung-bingung. Takuju sa, ada dua orang yang pake pakean mangkilat, datang badiri di dong pung sablá.

<sup>5</sup> Itu mama dong taku mau mati, ais tondo sampe di tana. Ju itu dua orang tanya bilang, "Akurang ko bosong datang cari orang yang idop di orang mati dong pung tampa?

<sup>6</sup> Yesus su sonde ada di sini lai! Te Dia su idop kambali. Mangkali bosong su lupa apa yang Dia parná bilang waktu masi di Galilea, ko?

<sup>7</sup> Te Dia kasi tau memang bilang, nanti dong jual buang Manusia Tulen pi orang jahat pung tangan. Ais dong paku bekin mati sang Dia di kayu palang. Ma dia pung lusa, Dia su idop kambali."<sup>◊</sup>

<sup>8</sup> Dengar bagitu, baru dong dapa inga Yesus pung omong dolu tu.

<sup>9</sup> Ju dong pulang capát-capát, ko kasi tau samua-samua sang Yesus pung ana bua yang sablás orang, deng orang-orang laen yang iko sang Dia.

<sup>10</sup> (Mama-mama yang pi kubur tu, andia Yako-bis pung mama Maria, deng Maria dari kampong Magdala. Ada ju Yohana deng barapa mama laen lai. Dong tu yang pi carita ini samua kasi Yesus pung utusan dong.)

---

<sup>◊</sup> **24:7:** Mateos 16:21, 17:22-23, 20:18-19; Markus 8:31, 9:31, 10:33-34; Lukas 9:22, 18:31-33

<sup>11</sup> Ma waktu ana bua dong dengar itu carita, dong pikir itu mama dong omong kosong sa.

<sup>12</sup> Ma Petrus bangun ko lari-lari pi kubur. Sampe di sana, dia lia maso pi dalam itu kubur, ma dia cuma dapa lia kaen bungkus mayat sa. Tarús dia pulang deng pikir-pikir bilang, “Ini su karmana ni?”\*

*Tuhan Yesus pung ana bua dua orang katumu sang Dia di jalan pi Emaus*

(Markus 16:12-13)

<sup>13</sup> Itu hari ju, Yesus pung ana bua dua orang pi satu kampung, nama Emaus. Dia pung jao kira-kira 11 kilo dari kota Yerusalem.<sup>†</sup>

<sup>14</sup> Dong jalan deng ba'omong Yesus pung mati.

<sup>15</sup> Takuju sa, Yesus sandiri deka-deka sang dong dua, ais jalan sama-sama deng dong.

<sup>16</sup> Ma dong sonde kanál, kalo Dia tu, Yesus, te Tuhan ada bekin ko dong jang kanál.

<sup>17</sup> Ju Yesus tanya sang dong bilang, “Bosong dua ni, asik ba'omong apa, é?”

Dengar bagitu, ju dong dua badiri. Dong pung muka tingka ke susa sakali.

<sup>18</sup> Ais, yang nama Kleopas, tanya sang Dia bilang, “Pak ni, tingka ke orang baru, yang sonde tau apa-apa yang baru-baru jadi di Yerusalem ni, ko?”

<sup>19</sup> Ju Yesus tanya bilang, “Ada apa tu?”

Dong manyao bilang, “Ko Yesus, dari Nasaret tu! Dia tu batúl-batúl Tuhan Allah pung jubir.

\* <sup>24:12:</sup> Ada tulisan bahasa Yunani saparu yang sonde tulis ini ayat 12. † <sup>24:13:</sup> Tulisan bahasa Yunani tulis bilang, “60 stadia dari Yerusalem”. 60 stadia tu, sama deng 11,1 kilo.

Deng Tuhan kasi kuasa sang Dia ko bekin tanda heran macam-macam. Dia ju pintar ajar orang. Orang dong samua sanáng deng Dia. Deng Tuhan ju sanáng deng Dia.

<sup>20</sup> Ma tau-tau, te botong pung kapala agama Yahudi pung bos-bos deng tua-tua adat tangkap ame sang Dia. Tarús dong sarakan sang Dia pi gubernor ko hukum mati sang Dia. Ais dong paku bekin mati sang Dia di kayu palang.

<sup>21</sup> Mula-mula botong samua harap bilang, Dia tu, Kristus, yang datang kasi lapás botong pung bangsa dari orang pamarenta Roma yang tendes sang botong. Ma hari Jumat baru-baru ni, dong su bunu sang Dia.

<sup>22</sup> Sakarang botong su tamba bingung. Te tadi botong pung mama dong datang lapor bilang, pagi-pagi dong ada pi kubur.

<sup>23</sup> Ma dong carita bilang, Yesus pung mayat su ilang. Ais dong dapa lia Tuhan Allah pung ana bua dari sorga, yang kasi tau sang dong bilang, Yesus su idop kambali!

<sup>24</sup> Dengar bagitu, ju botong pung kawan barapa orang lari pi kubur. Ais dong ju dapa lia sama ke itu mama-mama dong pung omong tu. Dong sonde dapa lia Yesus pung mayat ju.”

<sup>25</sup> Dong dua carita abis bagitu, ju Yesus togor sang dong bilang, “Bosong pung bodo lai! Aku-rang ko bosong sonde mau parcaya apa yang Tuhan pung jubir dong su kasi tau memang dari dolu!

<sup>26</sup> Te dong su tulis bilang, Kristus tu, musti dapa sangsara macam bagitu, baru Dia tarima hormat deng kuasa yang hebat.”

**27** Tarús Yesus ajar sang dong, samua yang Tuhan pung jubir dong su tulis memang so'al Kristus. Mulai dari ba'i Musa pung tulisan, sampe deng jubir-jubir laen dong pung.

**28** Waktu dong su amper sampe di Emaus, ju Yesus bekin tingka ke Dia mau jalan tarús.

**29** Ma dong dua minta bilang, "Papa! Tenga manumpang sa deng botong ini malam, te matahari su mau tanggalám ni." Ju Yesus maso sama-sama deng dong pi dalam ruma.

**30** Waktu dong dudu mau makan, ju Yesus ame roti satu balok. Tarús Dia sambayang minta tarima kasi sang Tuhan Allah, ais Dia bekin picapica itu roti. Waktu Dia sorong itu roti kasi dong dua,

**31** baru dong dua kanál bilang, itu, Yesus. Ma takuju ju, Dia ilang dari dong pung muka!

**32** Ju dong dua ba'omong bilang, "Awii! Waktu dengar Dia omong bekin jalás jubir dong pung tulisan tadi, kotong rasa tingka ke kotong pung hati ada manyala-manyala."

**33** Itu waktu ju, dong dua bangun ko pulang memang pi Yerusalem. Dong katumu deng Yesus pung ana bua sablás orang, deng orang laen dong yang ada bakumpul di situ.

**34** Ju itu ana bua dong kasi tau sang dong dua bilang, "Memang batúl! Tuhan Yesus su idop kambali! Tadi Dia kasi tunju diri sang bu Pe'u."<sup>‡</sup>

**35** Ais, itu dua orang ju carita samua yang jadi di jalan, sampe dong dua bisa kanál sang Yesus

---

<sup>‡</sup> **24:34:** Tulisan bahasa Yunani bilang 'Simon' di sini. Simon tu, andia Petrus pung nama laen.

waktu Dia bekin pica-pica roti.

*Tuhan Yesus tunju muka sang ana bua dong  
(Mateos 28:16-20; Markus 16:14-18; Yohanis 20:19-23; Utusan dong pung Carita 1:6-8)*

<sup>36</sup> Waktu dong masi bacarita bagitu, takuju sa, Yesus sandiri su badiri di dong pung teng-tenga. Dia kasi salam sang dong bilang, “Saloom!”

<sup>37</sup> Ma dong takuju deng taku, te dong kira itu hantu.

<sup>38</sup> Ma Yesus omong bilang, “Akurang ko bosong taku bagini? Bosong sonde parcaya bilang, ini Beta yang su idop kambali, ko?

<sup>39</sup> Coba lia Beta pung tangan deng kaki. Ini Beta. Sorong tangan ko raba sandiri sa! Biar bosong parcaya bilang, ini Beta, bukan hantu. Te hantu sonde ada pung badan, ma bosong samua bisa lia Beta pung badan, to?!”

<sup>40</sup> Masi omong bagitu ju, Dia kasi lia sang dong bakás luka di Dia pung tangan deng kaki.

<sup>41</sup> Dong sanáng mau mati, tagal Yesus su idop kambali. Cuma dong babingung, te dong sonde bisa mangarti karmana ko bisa jadi bagitu. Ju Yesus tanya sang dong bilang, “Bosong makan apa di sini, é?”

<sup>42</sup> Ju dong sorong kasi sang Dia ikan panggang sapotong.

<sup>43</sup> Yesus tarima itu ikan, ais Dia makan di dong pung muka.

<sup>44</sup> Tarús Dia omong bilang, “Karmana? Bosong masih inga waktu Beta sama-sama deng bosong dolu? Beta kasi tau tempo hari bilang, samua yang Tuhan Allah pung jubir dong tulis so'al Beta

tu, musti jadi. Andia dari ba'i Musa, dari jubir laen dong, deng dari buku Lagu Puji dong.”

<sup>45</sup> Ais ju Dia buka bekin taráng ko dong mangarti batúl Tuhan pung Tulisan Barisi pung arti.

<sup>46</sup> Dia omong tamba bilang, “Tuhan pung jubir dong su tulis bilang, Kristus, yang Tuhan kirim datang tu, musti dapa sangsara macam-macam, ais Dia mati. Ma nanti dia pung lusa, Dia idop kembali. Ko dong su tulis samua na!

<sup>47</sup> Sakarang Beta kasi kuasa ko bosong bawa ini Kabar Bae ni, pi samua suku-bangsa mulai dari Yerusalem sini. Kasi tau sang dong bilang, orang yang mangaku sala deng kembali pi Tuhan, nanti Tuhan hapus buang itu sala dong samua.

<sup>48</sup> Bosong musti jadi saksi ko carita bilang, Beta dapa sangsara, ais mati, tarús idop kembali.

<sup>49</sup> Nanti Beta kirim datang Roh yang Barisi, yang Beta pung Bapa su janji. Ma bosong musti tunggu sa di kota Yerusalem sini, sampe tarima kuasa dari sorga.”<sup>☆</sup>

*Tuhan Yesus ta'angka nae pi sorga  
(Markus 16:19-20; Utusan dong pung Carita 1:9-11)*

<sup>50</sup> Satu hari, Jesus bawa sang dong kaluar kota. Waktu dong sampe deka deng kampong Betania, Dia angka tangan ko omong kasi berkat sang dong.<sup>☆</sup>

<sup>51</sup> Dia masih omong kasi berkat bagitu, ju Dia ta'angka nae pi sorga.

---

<sup>☆</sup> **24:49:** Yoel 2:28-29; Yohanis 14:16-17; Utusan dong pung Carita 1:4    <sup>☆</sup> **24:50:** Utusan dong pung Carita 1:9-11

Lukas 24:52

clxxx

Lukas 24:53

**52** Lia bagitu ju, dong samua tikam lutut ko sémba sang Dia. Ais dong pulang pi Yerusalem deng hati talalu sanáng.

**53** Tiap hari dong bakumpul di Ruma Sam-bayang Pusat ko angka puji sang Tuhan Allah.

Pak Teo! Beta pung carita sampe sini dolo.

Saloom,  
Lukas

**Kupang Malay Bible  
The New Testament in Kupang Malay of West Timor,  
Indonesia  
Perjanjian Baru dalam bahasa Kupang Melayu**

copyright © 2007 Unit Bahasa dan Budaya

Language: Kupang Malay

Translation by: Wycliffe Bible Translators

Contributor: Chuck Grimes

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 18 Apr 2025 from source files dated 31 Aug 2023

31bebd9e-5b05-5c6f-8d77-a8baf218a06a